
This is a reproduction of a library book that was digitized by Google as part of an ongoing effort to preserve the information in books and make it universally accessible.


Google™ books

<https://books.google.com>



78. Bb. 41.
4 Bde.

MENTEM ALIT ET EXCOLIT



K. K. HOFBIBLIOTHEK
ÖSTERR. NATIONALBIBLIOTHEK

78. Bb. 41. 4 Bde.

601

IZTINE VERE

V U

RAZLAGANYIH Y RAZGOVORIH

POLEG

VU CZESZARZKO-KRALYEVZKIH DERSAVAH

PREPISZANOGA

KATEKISMUSHA

V U

Cheterdeszetih Nāvukih y Chetīreh
Ponavlyanyih iztoga Nāvuka razdélene,

za podvuchanye Kerztchantzva, z-pridanemi
na krépoztno dersanye zpadajúchemi Nāvuki
szlósene,

y poleg nemskoga popisxane

P O

FERENCZU KAR. SCHLOISSNIGG,

ztolne Czirkve Zagrebechke Präbendaru.

ZTRAN I.

OD VÉRE.

Vu ZAGREBU,
stampano vu Szlovarniczi Franye Suppan.
1840.



PREDGOVOR.

Ako sze réch Bosja prizpodablya dobromu szémenu, koje, kada na dobru zemlyu opàda, ztoverztnoga szàda donasha; — ako sze prizpodablya szvétlosti, koja ztèzu nashega vremenitoga putivanya razszvétchuje, y nam pokasuje, odkud doshli, y kam iti imamo; — ako sze prizpodablya vràchtvu, koje nashu dùshu, ako ova tak neszrechna je bila, da vu grèh opala je, nazad zvrachi; ako sze prizpodablya hràni, koja nasz na pùtu sivlenya jáchi, da dùsnoztì nashega zránya y ztalisha zversheno izpuniti moremo; — tak je ochitno, kulika dusnozt duhovnéh Paxtirov je, da ovo széme, ovu szvétlost, ovo vràchtvo, ovu hrànu izrucheném szebi ovczam prilichno, y neprilichno vu vszøj terplyivnoztì podeliju. —

*Merzlocha proti vszemu, kaj
szvéto je, je obchinska falinga, koja
pri vezdashnih kerztchenikih vidi sze,
koja anda tulike vu zkvarjenye por-
nuti mora — y jeli szluga Jesusha
Kriztusha, koj od nyega poszlan je,
da poszla nyegvoga na zemlyi zver-
shava, y nyegvo Kralyestvo povek-
shava, mirno gledel bude, kak kra-
lyestvo duha peklenzkoga vu szre-
dini nyemu izruchene chréde razshi-
ravasse? Jeli ovakov bi bil poszlan,
da nyén Pastir y Otecz, ali salo-
ztni szvedok nyéne vekivechne szmerti
bude? — Zaizto pomiluvanya vreden
je duhovni Pastir on, koj tak ne-
szrechen je, da takvoj Obchini pred-
pozstavlyen je, vu koji pomènkanye
dobrih dersany ochitno y obchinsko
poztało je; ali ovakov naj sze zpo-*

mene, da ravno zato od Boga izbran, y k-nyoj poszlan je, da ovu popravi y na dobri put oberne : zakaj je duhovni Pastir szól zemlye y szvetlost szvéta, nego da onomu, kaj od gnyiloché popadneno je, pomore, y one, koji vu tmiczi szediju, razszvétiti? Néje potrebno vrachítelya zdравem, nego betèsnem. Czeli szvét lesal je vu bludnoztih, kada pervi szlusbeniki Evangeliuma vu nyega poszlani bili jeszu; y ravno po tom szpoznali szû oni szvetost y potrebochu poshilanya szvôga; oni dersali szû szami szebe za szlûge, y za orudelje szvelichenya, koje milosserdnozt bosanzka czelomu pokvarjenomu chlovechanzkomu pokolenyu ponudya. Jeli nészmo y mi nyim vu nyihovem poshilanyu, y vu nyihovi cháxti szlédeli?

Jeli miszlimo mi, da Bog vsze hmanye kerztcheniki, k-kojem on nasz poshilya, zbog nasz zkonchal bude? Jeli miszlimo mi, da nyegova miloszerdnost, kada nasz poszlala, y nam onu iztu chäst, koju pervi vucheniki obnashali jeszu, izruchila je, volyu imala néje, vu nami nyim orudelja y szluge xvelichenya poszlati? —

Izpunimo anda volyu ovu najvekshega y najszvéteshega Pastira nashega Jesusha Kriztusha, ar xpunavanyem ove, czilya nashega poshilanya, y czilya oneh, k-kojem poszlani jeszmo, zadobili budemo; — da sze dobra y krepoztna dersanya med kerztcheniki nazad vpeľaju, tak prez dvojimbe potrebno je, da vu oneh, koja na véru nyihovu

zpadaju, temelyito podvuchiju sze,
 ar prava véra je jedina, koja szerd-
 cza lyudih popravlya; iz szerdcza
 pako izhadyaju, veli szam pochetnik
 vére Jesush Kriztush, vszi chini
 chloveka — najbolje pako bude, da
 pri detczy, vu mladozti pochmemo,
 ar prigiblivessa je shiba, kak staro
 drévo; iz toga czilya takaj ne zda-
 vna od Goxpodina Biskupa, kakti
 za izruchene szebi ovcze skerblyi-
 voga velikoga dühovnoga Pastira,
 napravlyeno je, da zvun pri raneh
 Meshah navadnoga kerztchanskoga
 podvuchanya, y popoldashno po-
 czeli Biskupii dersati sze ima, da
 ovak stem predi pri kerztchenikih
 chednozt dersanyih vpelya sze y vte-
 melyi sze, ter iz nyih hasznoviti ko-

trigi domovine, y dopadni szlusbeniki vishnyega Goshpodina Boga postati moreju.

Da poszla ovoga navùchanya dùhovnem Paztirom leseshega vchinim, tak ja, pokehdob iz kola zkerbitelyov dush tak rekùch izishel jeszem, da vendar za dobro oveh nekaj vchiniti hoteti vidim sze, szlededcha podrùchanya vu Vére kerstchanske istinah, iz nemskega vu drage domovine ove jezík, najmre horvatzki, preneszel jeszem; — naj primeju poszla ovoga z-szerdczem onakvem, z-kakvem ja nyega zapochel jeszem, y ja za vesz moj trud obilno naplatchen budem.

Czeli poszel razdelen je na chetiri ztrani. Perva ztran je od vére vu deszetéh Navukih. — Druga je

od úfanya y lyùbavi vu dvanàiztéh Nàvukih. — Trejta je od szvéteh Shakramentov vu dvanàiztéh Nàvukih. — Chetertaje od dùsnosti kerstchanske vu shestih Nàvukih, y jednem pridavku od obchìnzkeh y najpotrebnesheh Nàvukih vére kerstchanske vu chetiréh ponovlenih Nàvukih. Czeli ov poszel szlosen je iz cheterdeszetéh Nàvukih y chetiréh ponavlanyih. Vszaki Nàvuk szlosen je iz dvéh, tréh ali najvishe chetiréh pitanyih, koja detchinzki razlosena, zopet poleg szebe razgovore imaju, po kojéh detcza zverhu chujenéh spítavaju sze. — Najzadnich, kajti ovakva kerstchanska podvùchanya návadno z-nagovorom dokànchaju sze, tak pridani szû vszigde tri Nàvuki, jeden iz staroga, drugi iz no-

voga zakona, y trejti iz chednih dersany Nāvukih; zmed kojéh jeden vszakuput po dokonchanom Nāvuku potrebuвати sze more. Navuchaju-chemu szlobodno je kojega goder zmed oveh pervo, drugo ali trejto leto potrebuвати; y kajti vnogi Nāvuki malo vekshi bi bili, tak mudrost Navuchitelya dūhornoga y ovde pomochi szí bude znála.

*Piszał szém vu Zagrebu mesze-
cza Listopada 1839.*

S.

Zàvjetek perve Ztrani.

P o g l a v j e I. O D V É R E.

Nàvuk 1.

Kaj je véra, y kak je potrebna.

Ztran

- Pitanye* 1. Kaj je kerztchanzko-katolichanzki véruvati? . . . 1
— 2. Jeli je véra vszakomu chloveku, koj zvelichiti
sze hoche, potrebna? 9
- I. *Dokànchanye Nàvuka.* Abraham pokasuje szvoju véru
z-chinmi 15
- II. — — Apostoli odperťo valuju Bosan-
ztvo Jesusha. 17
- III. — — Obchinzka dùsnozt kerztcheni-
kov véru szvoju temelyito
navchiti sze 18

Nàvuk 2.

Od temelynéh Nàvukov vére Kerztchanzko-katolichanzke.

- Pitanye* 1. Kaj vszaki chlovek, poklamkam k-vsivanyu
ràzuma dojde, potrebno znati y véruvati mora,
da zvelichenye zadebi? 20
- 2. Kaj vszaki kerztchenik katholik zvàn gorire-
cheneh temelyiteh kerztchanzko-katolichan-
zkeh vére Nàvukov josche znati, y véruvati
mora? 30
- 3. Kaj je vszakomu kerztcheniku katholiku zapo-
vedano znati? 39

<i>I. Dokànychye Nàvuka.</i>	Tobiash podvùcha szvoga szina vu ztràhu Bosjem.	41
<i>II.</i>	— — Jesush poziva dètczu k-szebi.	42
<i>III.</i>	— — Dùsnozt Roditelyih, da szvoju dètczu za ran vu pervih tème- lyitih nàvukih vére podvuchiju	44

Nàvuk 3.

Od pervoga kotriga Vére.

<i>Pitanye 1.</i>	Kaj je Bog?	46
— 2.	Koje zvershenozti iliti laztovitozti Bosje imamo oszebujno vpamet vzeti?	53
<i>I. Dokànychye Nàvuka.</i>	Bog ochituje szebe Mojseshu	63
<i>II.</i>	— — Pavel nazveztcha vu Athèni pravoga Boga.	65
<i>III.</i>	— — Boga poznati, je perva vszeh znanoztih.	67

Nàvuk 4.

Od preszvcloga Trojztva.

<i>Pitanye 1.</i>	Jeli je vech Bosanzkih Pershon?	68
— 2.	Kak, ý po chem valuje kerztchenik katolik preszvento Trojztvo?	72
<i>I. Dokànychye Nàvuka.</i>	Pogled brunchene kàche oszlo- badya od ognenih kàch vgris- nyeno Izraelcze	76
<i>II.</i>	— — Pri kerztu Jesusha ochituju sze tri bosanzke Oszobe.	78
<i>III.</i>	— — Napravlanye krisa je jedna zta- rinzka y hasznovita nàvada	80

Nàvuk 5.

Od Ztvàrjanya.

<i>Pitanye 1.</i>	Gdo je vsza ztvoril?	81
— 2.	Zakaj je Bog Angele ztvoril?	88
— 3.	Zakaj je Bog lyúdi ztvoril?	92

- I. Dokànychye Nàvuka.** Dva Angeli oszlobadyaju Lotha y nyegove iz Szodome . . . 99
- II.** — — — Lazar vu naruchaju Abrahama, y bogatsh'vu peklù naj nasz zbudyavaju, da' czilyu nashega ztvàrjanya primerno sivemo . . . 101
- III.** — — — Zroki, iz kojeh Bogu véro szlusiti moramo . . . 103

Nàvuk 6.

Od drugoga y trejtloga kotriga vére.

- Pitanye 1.** Kak sze izgovarja drugi kotrig vére? . . . 105
- **2.** Kaj zadersava vu szebi trejti kotrig vére? . . . 113
- I. Dokànychye Nàvuka.** Mojsesh oszlobadya lyudztvo Izraelzko iz szusanztva . . . 118
- II.** — — — Chùda, koja pri narodyenyu Jesusha vchinyena jeszu, szvedochiju, da Narodyeni pravi Mesziash biti mora . . . 120
- III.** — — — Velikocha lyubavi Bosanzke vu zkrovnoztì vtelovlenya . . . 122

Nàvuk 7.

Od chetertloga, peloga y sheztloga kotriga vére.

- Pitanye 1.** Kaj zadersava vu szebi cheterti kotrig vére? . . . 124
- **2.** Kaj zadersava vu szebi pèti kotrig vére? . . . 129
- **3.** Kaj zadersava vu szebi shezti kotrig vére? . . . 134
- I. Dokànychye Nàvuka.** Izaak pokoren je otczu szvômu do szmerti . . . 136
- II.** — — — Jesush pokasuje po szvojoj szmerti, y goreztajanyu, da on pravi szin Bosji je . . . 138
- III.** — — — Put traplyenih je najszegurneshi put vu Nèbo . . . 140

Nàvuk 8.

Ztran

Od szèdmoga y oszmoga kotriga vére.

- Pitanye* 1. Kaj zadersava vu szebi szèdmi kotrig vére? 142
 — 2. Kaj zadersava vu szebi oszmi kotrig vére? 146
I. Dokànchanye Nàvuka. Bog szam pokasuje Izraelczem
 pri odhotku iz Aegyptusha po
 danu po oblaku, po nochi po
 ognenom ztúpupúta vu Kanaan 153
II. — — Apostoli dobivaju Dùha szve-
 toga y chiniju Chúda . . . 155
III. — — Zàdnyi szùdnyi dan, je dan
 ztraha za greshnika . . . 157

Nàvuk 9.

Od Czirkve, y od Obchinztva Szvèteh.

- Pitanye* 1. Kaj zadersava vu szebi deveti kotrig vére? . 159
 — 2. Kaj zadersava vu szebi deveti kotrig vére od
 Obchinztva szvèteh? . . . 166
I. Dokànchanye Nàvuka. Barka Noéma je kip Czirkve
 kerztchanzke . . . 170
II. — — Kriztush poztavlya Petra za
 Glavu Czirkve . . . 171
III. — — Obchinztvo Szvèteh nasz priti-
 ravati mora, da dobro chinimo 173

Nàvuk 10.

Od deszetoga, jedenàistoga y dvanàistoga kotriga vére.

- Pitanye* 1. Kaj zadersava vu szebi deszeti kotrig vére? 175
 — 2. Kaj zadersava vu szebi jedenàizti kotrig vére? 178
 — 3. Kaj zadersava vu szebi dvanàizti kotrig vére? 183
I. Dokànchanye Nàvuka. Makabæanzka mati nagovarja
 szvoje szedem szine po po-
 gledu neba na ztalno podna-
 shanye múk . . . 188
II. -- — Jesush razglashenoi gréshniczi
 opraztcha gréhe . . . 190
III. — — Véra vu jedno buduče gorezta-
 janye je moguchi nachin szu-
 prot ztràhu szmertì . . . 192

POGLAVJE I.

Od Vére.

NÀVUK 1.

Kaj je Véra, y kak je potrebná?

PITANYE 1.

Kaj je kerztchansko-katholichanski véruvati?

Razlåganye.

Kajti véra kerztchanska katholichanska vu Bosanzkih nazveztchenyih temeli sze, tak potrebno je najpervich znati, jeli, y kak Bog nazveztchenya vchinil je.

Szamo ono je moguche nazveztiti, kaj josche neznano, otajno y zkrto je. Ako komu kaj povedamo, kaj predi vre znal je, tak nyemu nikaj ne nazveztchamo. Nazveztiti znamenuje anda tuliko, kak nekaj neznanoga povedati, ali kaj zkrovnoga ochituvati. Ako nam chlovek kaj nazveztcha, tak je ovo jedno chlovechansko nazveztchenye — nazveztcha nam pako Bog kaj, tak je to jedno Bosanzko nazveztchenye.

Bosanzko nazveztchenye nam na vszaki nachin je potrebno; ar mi moramo Boga na onakov nachin postuvati, kak on od nasz postuvan biti hoche; metemtoga, kak malo mi znamo, kaj chlovek koj hoche, ako on

1.
*Nazveztiti
znamehuje
kaj nezna-
noga zna-
no vchinitt.*

2.
*Bosanzko
nazveztche-
nye je po-
trebno.*

ovo nam nepové, ravno tak malo moremo mî znati, na koj nachin Bog postuvati sze hoche, ako on nam ovo ne nazvezti.

3. *Bog zaizto nazveztchenya je vchinil.* Bog y zaizto nazveztchenya je vchinil. On, iztina je, y z-vsakem zmed nasz poszebe né govoril; ovo nite né potrebno. Kada kraly vszem szvojem podlosnikom kaj obznaniti hoche, tak ne govori on szam vszakomu poszebe, nego on dozove szamo nekoje k-szebi, ovi poszlushaju rech Kralya, zapisheju ovu, y obznanuju ovu oztalem podlosnikom, ter potverdyuju ovu z-pechatom y z-podpizkom Kralya. Ravno ovak y Bog vchinil je rech szvoju k-nam dojtî. On vu razluchnih vreme-nih izkazal sze je nekojem szvétem lyudem ochituval nyim, kaj drugem lyudem naj po-veju ali pisheju, y podtverdil je rech szvoju z-znamenym chudochinov. Ovakvi szveti lyu-di navlaztito bili szû Mojsesh y Proroki, Je-sush Kriztush, y Apostoli.

4. *Kaj szveto pismo je, y kak sze ovo razae-lyiva.* One knige, ali pizma, koja po nadehne-nyu Bosjem pizana jeszu, zovu sze knige Bosje, ali szveto pismo. Pred dosheztkom Jesusha Kriztusha, iliti vu ztarinzkih vréme-nih piszali szû Mojsesh y Proroki po nadeh-nenyu Bosjem: zato sze zoveju nyihove kni-ge, *knige Bosanzke, ali szveto pismo ztaro-ga zákona*. Po dosheztku Jesusha Kriztusha, iliti vu novih vrémenih piszali szû Apostoli po nadehnenyu Bosjem, y zato sze zboveju nyi-hove knige, *knige Bosje, ali szveto pismo novoga Zakona*. Ove Zkorom vszigde marlyi-vo prepiszavale sze y chuvala sze jeszu. Zato, imamo ove josche vu rukah, ne, iztina je vu pervom rukopiszu, nego vu prèpiszu.

Kulikoputi szveti lyudi kaj po nadeh-
 nenyu Bosanzkem nazveztili ali piszali jeszu, ^{5.} *Bog takaj po*
 tak vszigdar pridali jeszu: *Ovo Bog veli, ovo szvètek lyu-*
Gozpon veli: y da pokaseju, da ovo ne nyi- *dih potver-*
 hova laztovita, nego rech Bosja je, tak vchi- *dit je vchi-*
 nili szû velika chuda. Mojsesh prepelyal je *nyena Na-*
 lyudztvo Izraelzko po szuhom chez cherleno *zveztcheny z-*
 morje. Proroki nazvezтчali szû buducha, ko- *chudochi-*
 ja chlovek znati nemre, y koja vendar potlam *ni.*
 zpunila sze jeszu. Kriztush y Apostoli zvrachili szû v-hipu betesne, y zbudili mertve: ovo zaizto chlovek z-lasztovitum mochjum vchiniti nemrê. Bog anda po nyimi vchinil je chuda, za pokazati, da oni iztinito govorili y piszali jeszu.

Mi niti dvojiti neszmemo; da chûda ova ^{6.} *Chûda ova*
 nebi bila vchinyena; ar vnogî nazochni szve- *zaizto szû*
 doki potverdili szû to, vu navuk ovêh szve- *vchinyenu.*
 teh lyudih veruvali, y za ovoga kerv szvoju prelejali. Jeli pako gdo zbog laslyivêh y zmi-shlenih chûdochinih tak ztalno navuku veruval bude, da za ovoga vûmre? Ne zaizto! nigdo rad nevûmre zbog iztine, vnogo menyê za ochiveztu làs.

Ja malo predi povedal jeszem; da pred ^{7.} *Jesush Kri-*
 dosheztkom Jesusha Kriztusha Mojsesh y Pro- *ztush nazve-*
 roki, po dosheztku Jesusha Kriztusha pako *ztil je novo-*
 Apostoli po nadehnenyû Bosjem piszali jeszu; *ga Zakona,*
 ar Jesush Kriztush szami nikaj né piszal, on *y podigel*
 szamo nazveztil je jednoga novoga Zákonâ, *Czirkvu*
 vu kojega vszi lyudi veruvali jeszu, koje zato *kerztchan-*
 kerztchenike, y nyihovu zkupchinu, kerzt- *zku.*
 chanzku Czirkvu imenujemo.

Jesush Kriztush zebralszi je dvanâizt lyu- ^{8.} *Nahadya sze*
 dih, koje on Apostole iliti poszlenike imenu- *takaj rech*
 val je; kajti oni navuka nyegvoga po czelem *Bosja nepi-*

*szana, illi szvetu zazshirili y nazveztchali jeszu. Ovi po
vuztno pre- szmertí Jesusha Kriztúsha popisnali szû nyé-
davanye.*

gve návuke y chine, ali ne vsze, nego óni
vnoga navuztno nazveztchali jeszu, koja nig-
dar popisnali nészu, kak szam sz. Pavel vu
liztu na Theszalonitancze valuje, kada nye
opominya, da ne szamo naredbe pizsane,
nego y navuztno dane naj obdersavaju. (2.
Thess. 2.) Od ovud vidisze, da rech Bosja
nepiszana nahadya sza, y da nam Bog, kakti
lyubljeni Otecz szvojoj detczy nekoja pizm-
no, nekoja pako navuztno dal je. Metemtoga
jeden Otecz pizmno ali navuztno naj kaj
reche, tak ova vszigdar rech Otcza oztane;
ravno ovak je pizsana kak y nepiszana rech
Bosja jedna prava rech Bosja, kajti obodvo-
ja od Boga dohadya. Mi zovemo nepisanu
rech Bosju takaj *vuztno predavanye, navuk
predyih*, kajti ova szamo vuztno nazveztche-
na je, y od vuzt do vuzt prehadyala je tak,
kak vi szami, moja Detcza! morebiti tulika
pripovedati chuli, y zopet dalye prîpovedali
jezte.

9.
*Czirkva mo-
re rech Bos-
ju za neru-
vati napre-
voztarlyati.*

Ako anda jeden navuk vszigdar y vszig-
de, ter od vszeh vu kerztchanzkoj Czirkvi
zpoznan je, tak ima on od Apostolov szvojega
pochetka, y mora sze za Bosanzkoga dersati,
akoprem on vu sz. pizmu nenahadya sze.
Vendar nijeden kerztchenik vu tom szvoje
lastovito mishlenye, nego izrechka Czirkve
naj szleduje y poszluhne; ar jeden kerztchenik
more faleti, ali czela Czirkva faleti nemre.
Czirkva od Apostolov dobila je rech Bosju,
ona zna, kaj vszako vreme, vszigde, y od
vszeh zpoznano bilo je, ona anda more na-

pervoztavlyati, kaj kakti rech Bosja veru-
vatisze ima.

Nahadyaju sze vendar vnogi kerztcheni-
ki, koji na navuk Czirkve nepaziju, y nepi-
szanu rech Bosju za iztinitu nedersiju, ali
ovo neszu kerztcheniki katjoliki. Kerztehe-
niki katjoliki dersiju vsza za iztinita, kaj Bog
nazveztil je, y Czirkva za veruvati naper-
voztavlya ali piszano je, ali né. Zato ve-
lisze: *kerztchanzko katholichanzki verivati*
je vsza za iztinito dersati, kaj Bog je nazve-
ztil, y Czirkva za veruvati napervoztavlya,
ali je piszano, ali né.

10.

*Kerztcheni-
ki katjoliki
veruju tak
dobro kaj
piszane, kak
kaj nepisza-
no je.*

Razgovori.

1.

Kaj znamenuje nazveztiti? — Jeli je mo-
chi ono nazveztiti, kaj predi vre znano bilo
je? — Kada anda ti komu kaj znanoga po-
vesh, jeli ti nyemu kaj nazveztchash? kaj
znamenuje anda nazveztiti? — Kada telbi
chlovek koj kaj nazveztcha, kakvo je to na-
zveztchenye? — Kada pako Bog? —

*Kaj zname-
nue nazve-
ztiti, y kuli-
koverzti je
Nazveztche-
nye?*

2.

Szmemoli mi Boga na drugi nachin po-
stuvati, nego on hoche? — Moremoli ali
znati, kak Bog postuvati sze hoche, ako on
ovo ne nazveztiti? — Je anda Bosanzko Na-
zveztchenye nam potrebno? Zakaj?

*Je bosanzko
nazveztche-
nye potreb-
no?*

3.

Je Bog nazveztchenya vchinil? Je Bog
z-tobum sze zpominyal? Ali z-kojem zmed

*Je Bog kaj
nazvezttil?*

nasz? — Odkud znash, da Nazveztchenya Bosanzka nahadyaju sze? Kada kraly zapovedi dava, jeli on szam z-vsza-kem podlosnikom zpominyati sze mora? — Kada anda Bog kaj nazveztchuje, morali sze on szam z-vsza-kem chlovekom zpominyati? Koga zove kraly k-szebi, kada on zapovedi daje? — Y po chem pokasuju szlusbeniki, da ovo zapoved kralya je? — Je sze Bog kojem sz. lyudem ochituval? Po chem je Bog szvoju rech za zpoznati vchinil? Zakaj anda velish, da Bosanzko Nazveztchenye nahadya sze? — Po kójech szvèteh lyudih pako nam je Bog kaj nazveztìl? — Jeszi kaj chul od kakvoga Mojsesha etc.? —

4.

*Kaj je sz.
pishmo ru
obchinzkom?
Ztaroga y
novoga za-
kona? — kak
je k-nam
doshlo?*

Kak sze zoveju one knige koje iz nadeh-nenya Bosanzkoga pishane jeszu? — chlovechanzke? — Koji szvèti lyudi szû pred-dosheztkom Jesusha Kriztusha pishali? — Kada szû Mojsesh y Proroki sivali? — K-kojemu zakonu anda zpadaju knige oveh? Zakaj k-ztaromu? — Koji szveti lyudi szû pako po dosheztku pishali? K-kojemu zakonu zpadaju anda knige Apostolov? — Zakaj k-novomu? Imano mi josche ove knige? Kak szû ove knige do nasz doshle? — Jeszu one vishe-puti prepishane? —

5.

*Kak szû sz.
lyudi rech
Bosju pod-
tverdili?*

Kada sz. lyudi rech Bosju nazveztchali je-szu, kaj szû pridali? Jeszu oni rekli, ovo ve-limo mi? — Po chem szû pako sz. lyudi rech Bosju podtverdili? Po kakvih chinih? —

Kak je Mojsesh Izraelcze chez cherleno morje prepelyal? — Kakva dugovanya nazveztchali szû Proroki? koja vre vchinyena jeszu? — Kakva chuda vchinil je Kriztush y Apostoli? Kak szû oni betesne zvrachili? kaj szû oni z-mertvemi vchinili? —

6.

Moreli chlovek z-laztovitum mochjum chûda chiniti? — Gdo je Gozpon narave? *Gda je po szvêtech lyudih chûda chinil, y nyihove trechi objachil?*
Gdo more zverhu naravzkeh jakoztih chiniti?
Gdo je anda po szvetih lyudih chûda chinil?
Moreli Bog lás podtverditi? — Po chem je Bog rechi oveh sz. lyudih podtverdil? Jeszu ovi sz. lyudi iztinu govorili? Zakaj? —

7.

Morebiti szû ovi chudochini zmishlyeni? *Jeszu, sze ovi chudochini vu iztini dogodili?*
Zakaj ne? — Jeszu ove szamo retki nazochni szvedoki z-szvojum kervjum podtverdili?

8.

Je Jesush Kriztush szam takaj koja pi-szàl? *Kojega Zakona je Jesush K.?* — *Kojega Zakona je Jesush nazveztal, y koju Ztaroga?* — Kak zovemo one lyudi, koji vu Jesusha Kriztusha veruvali jeszu? — *Y kak Czirku je on podigel?* — Y kak sze zove nyihova zkupchina? —

9.

Kuliko lyudih zebrał szî je Kriztush za Apostole? — *Jelt sze nadaya takaj rech Bosja nepiszana?*
Kaj to znamenuje: Apostol? —
morebiti tuliko kak poszlenik? — Gde szû morali ovi dvanaizt lyudi navûka Jesusha K. prodekuvati? — Zakaj je anda Kriztush ove lyudi imenuval Apostole? — Jeszu ovi Apostoli vsze popiszali, kaj nyim Bog nazveztil

je? Jeli sz. Pavel zapoveda szamo pisanomu navuku veruvati? — Nahadya sze anda y rech Bosja nepiszana? Zakaj? — Kak sze zove rech Bosja nepiszana? — Zakaj zove sze ona *vuztno predavanye*? — Jeli otec szinu szvojemu vszigdar pishe, ali nyemu vuztmeno kaj poruchi? Jeli vuztmena rech ne ovde rech Otcza? — Jeli nechini y Bog z-nami kak y Otec z-detczum? Jeli je Bog szamo piszati dal, jeli né takaj vuztmeno nam prepizke daval? — Jeli navuztna rech Bosja né takaj jedna prava rech Bosja? — Moramoli mi na vuztnu rech Bosju kak y pisanu za iztinu dersati? Zakaj?

10.

*Gdo more
rech Bosju
razluchava-
ti, y za ve-
ruvati na-
pervozta-
vlyati?*

Kak moremo poznati jeli nepiszani navuk od Apostolov dohadya? Ako on vszako vreme y vszigde za takvoga zpoznan nébil? — Y gdo vishe razme, jeden kerztchenik szam, ali czela kerztchanzka Czirkva? — Moramoli nashu laztovitu miszel, ali obchinzku Czirkvu szleduvati y-ovu poszluhnuti? Zakaj obchinzku Czirkvu? — Jeli je obchinzka Czirkva rech Bosju prijela y zachuvala? — Gdo more anda napervoztaviti, kaj veruvati moramo? — Zakaj obchinzka Czirkva? —

11.

*Kaj je kerzt-
chanzko-kat-
holicchanski
veruvati?*

Jeli vszi kerztcheniki obchinzku Czirkvu prestimavaju? Dersiju vszi takaj nepisanu rech Bosju za iztinitu? Koji kerztcheniki dersiju za iztinito, kaj Czirkva za veruvati napervoztavlya? Nekatholiki? — Y koji kerztcheniki dersiju rech Bosju nepisanu za iztinitu? Kaj je kerztchanzko - catholicchanski veruvati?

PITANYE 3.

*Jeli je Véra vszakomu chloveku, koj svelichiti
sze hoche, potrebna?*

Razláganye.

Predi, nego vam, Dragi! potrebochu Vére pokasem, morate znati, kaj ova rech *véruvati* znamenuje. *Véruvati* neznamenuje za iztinito dersati, kaj szami vidimo y pochutimo, nego za iztinito dersati ono, kaj koj Prestimani nam veli, ako taki ovo szami nevidimo y nepochutimo. Ovak v. p. za iztinzko dersite, da mi vezda vu Czírkví jeszmo, ali ovo neznamenuje *véruvati*: ar vi ovo szami vidite, y pochutite. Metemtoga ako vam od korunenya nashega Kralya, y od onch, koja pri ovem pripetila sze jeszu, bi pripovedal, kaj niti ja, niti vi videli nézte, kaj meni szamo veliki lyudi, koji poleg bili jeszu, bi bili povedali, tak to za iztinzko dersati bi morali, y to znamenuje *véruvati*.

Chlovek szam najmenye videti y zezvedeti more; vú vnogeh mora sze on zapuztchati na zpoznanje y pripovedanje drugeh lyúdi, oszebito vi Detcza! koja josche mlada jezte. Vi metemtoga vendar tuliko vre previdite, da vszakomu *véruvati* né mochi, ar drugach visheputi bi sze vkanili; szamo prestimanem lyudem moremo *véruvati*, y z-chem vekshe je prestimanye onóga, koj nam kaj pripoveda, ztem veksha je nasha véra. Prestimanye anda onoga, koj kaj poveda, je temely vére.

1.
*Veruvati
znamenuje
za iztinito
dersati kaj
ne vidimo.*

2.
*Vera temelyi
sze na pre-
stimanye o-
noga, koj
kaj veli.*

3. Gdo pako ima pri nami prestimanye? —
Koj muder, y iztinit je, on ima prestimanye. morebiti on, koj nikaj nezna, ali rád láse? Zaizto ne; ar perveshi lehko od drugoga vkaniti sze more, drugi pako rad vkaniti hoche. Szam on anda pri nami prestimanye ima, koj muder, y iztinit je; kajti mudri tak lehko vkaniti sze nemre, iztiniti vkaniti neche.

4. Kaj miszlite, Dragi! je gdo tak múder
Bog je izta nepreszesna mudrozt y iztinitozt. y iztinit, y ima gdo tuliko prestimanye, kak Bog? On je szam vekivechna iztinitozt, y nepreszesna mudrozt koja niti vkaniti, niti vkanyen hiti more. Kada anda visheputi jednomu chloveku verujemo, kajti on muder y iztinit je, za kuliko vnogo bolye nebudemo verurali vsza, kaj nam Bog poveda, kada on izta nepreszesna mudrozt y iztinitozt je.

5. Y ova véra Detcza moja! je nam tak
Prez vére néje mogu- che zvelichi- ti sze. potrebna, da prez ove niti Bogu sze dopazti, niti zvelichiti sze moremo; ar sz. Pavel pishe vu listú na sidove odperto: *Prez vére né mogu- che Bogu dopazti sze.* (Hèbr. 11) Je pako nemoguche Bogu dopazti sze, tak je takaj nemoguche zvelichiti sze; ar Bog niko- ga nezvelichi, koj sze nyemu nedopada: vre pako nyemu sze nijeden chlovek ne dopada, koj na nyegvu rech nikaj ne dersi, y nyega kakti nemudroga y laslyivoga zametava, kak goder y nam sze nedopada, ako gdo nashoj rechi neveruje, ter nasz kakti nezpametne y laslyive lyudi zametava.

6. Metemtoga na zvelichenye josche né
Kerztchenik mora véru szvoju, pervich z- zadozta, da szamo vu szerdczu verujemo, kaj Bog je nazveztil, kerztchenik katolik mora takaj véru szvoju *pervich z-* chinmi po-

kazati. Véru z-chinmi pokazati znamenuje, chinmi pokazati.
 ono vchiniti, kaj verujemo v. p. mi verujemo, da pokora, molitva, pokornost potrebna je, y mi vchinimo pokoru, mi molimo, mi szmô pokorni, tak pokasujemo véru z-chinom, y ovo je potrebno, ako zvelichiti sze hochemo; ar vera prez chinov je mertva, kakti télo prez dûha. Zato veli sz. Jakob: *Kak telo prez dushe mertvo je, jednakem nachinom véra prez dobrâh del mertva je.* (Jac. 2.) K-chemu je mertvo telo? ono vszigdar oztaje jedno telo, koje chloveka szrechnoga vchiniti nemre, kajti ono mertvo je; ravno ovak, kaj haszni véra prez chinov? ona izitina je, je jedna véra, ali zvelichiti ona nemre chloveka, kajti mertva je. *Kaj haszni, Bratja moja! pita gori recheni Apostol Jakob vu svojem liztu: ako gdo veli, da Véru ima, chinov pako néma? moreli gâ takaj Véra zvelichenoga vchiniti?* (Jac. 2.)

Kerztchenik katolik mora takaj *drugoch* 7.
On moravéru svoju drugoch z-vuztmi ochivezto valuvati.
 ona, kaj vu szerdczu véruje, kada je potrebno, z-vuztmi ochivezto valuvati. Dobro pazite, Dragi! *kada je potrebno*: ar néje vszigdar potrebno véru valuvati, y vszem lyudem prez razluke povedati, da kerztchenik katoliki jeszmo. Ovo szamo onda je potrebno, kada ovo dika Bosja, y dobro blisnyega nashega potrebuje. Dika Bosja ovo potrebuje, vu peldi: ako pred pravdenom szudczem iz Vére bi sze zpítavali. Dobro blisnyega nashega ovo od nasz potrebuje, ako blisnyi nash zhog nashega muchanya vu véri szlab y dvojen bi poztal. Vu obodvójih, lokoliczah dusnozt je vszakoga kerztchenika katolika,

da on szvoju véru odperto z-vuztmi valuje,
y kak najbolye brani.

R a z g o v o r i.

1.

*Kaj znamě-
nuje véruva-
ti?*

Jeli ti za iztinito dersish, da vezda vu
Czírkví jeszmo? — Jeli pako to znaměnuje:
veruvati? Zakaj ne? — Ako tebi od koru-
nenya nashega Kralya kaj bi povedal, jeli to
za iztinito dersal budesh? — Jeszi ti koru-
nenye videl? Zakaj bi ti vendar korunenye
za iztinito dersal? Jeli nészu ovo prestimani
lyudi povedali? — Y kada kaj za izitnito der-
simo, kaj prestimani lyudi povedali jeszu,
kak to zovemo? — Kaj znaměnuje anda véru-
vati? —

2.

*Vu chem sze
temelyi vé-
ra vu ob-
chínzkom?*

Morali jeden chlovek vsze videti y zpoz-
nati? Moramoli anda visheputi takaj rech-
jam drugeh véruvati? — Jeli taki vszakomu
véruvati moramo? Jeli sze nebudemó vishe-
puti vkanili? — Kojem lyudem anda véru-
vati moramo? Neprestimanem? Vu chem sze
temelyi anda Véra? Vu prestimanyu dru-
goga?

3.

*Gdo ima pri
nami presti-
manye?*

Gdo ima pri nami prestimanye? koj ni-
kaj nezna, ali koj láse? Zakaj nema on pre-
stimanye, koj nikaj nezna? — Jeli ovakov
lehko vkaniti sze more? — Y zakaj nema on
prestímanye, koj rad láse? — Jeli jeden
laslyivecz rad vkanyuje? Jeli mudri y iztiniti

takaj tak lahko vkanyuje, ali vkaniti sže more? — Zakaj ima anda mudri y iztinzki chlovek prestimanye? —

4.

Je gdo tak muder kak Bog? — Jeli né on izta nepreszesna mudrozt? — Moreli sže anda Bog kada vkaniti? Zakaj ne? — Y jeli Bog vszigdar iztinu govori? Jeli né on vékivechna iztina szam? Jeli anda bude Bog kada vkanil? Zakaj ne? — Verujeshli kaj jeden mudri y iztinzki chlovek povéda? Zakaj verujesh? — Gdo je anda nepreszesna mudrozt y iztina szam? Zakaj moremo anda vérúvati, kaj Bog nazveztil je?

Gdo je mudrozt y iztinitoxt izta?

5.

Moremoli prez vére Bogu dopazti sže? Y ako sže Bogu nedopadamo, moremoli sže zvelichiti? Komu moramo anda dopadati tersziti sže? Zakaj Bogu? — Jeli sže nam dopada chlovek, koj nikaj neveruje? Jeli nasz ovakov chlovek dersi za zpametne y iztinite? Nego za kakve nasz dersi? Y moremo sže mi Bogu dopazti, ako mi neverujemo, koja on nam poveda? Za kakvoga budemo mi nyega dersáli? Za Neizmerno mudroga y iztinitoga? Nego za kakovoga? — Je anda véra vszakomu chloveka potrebna, koj zvelichiti sže hoche? — Kaj veli Pavel sidovom? — Zakaj je anda véra vszakomu chloveku, koj zvelichiti sže hoche, potrebna? —

Jeli je moguče prez Vére Bogu dopaztisze?

6.

Jeli je na zvelichenye zadozta, da kerztchenik katholik szamo vu szerdczu veruje,

Morali kerztchenik katholik vé-

ru szvoju z- kaj Bog je nazveztil? Po chem mora anda
chinmi po- kerztchenik véru szvoju *pervich* pokazati?
kazati? Kaj to znamenuje, véru z-chinmi pokazati?
V. p. mi vérujemo da molitva potrebna je,
ter vendar nemolimo, je to véru z-chinmi
pokazati? Jeli mi pokasujemo véru vu chinu,
ako ono nevchinimo, kaj vérujemo? — Je
télo prez dúha sivo? — Moreli mertvo télo
chloveka zvelichíti? Y kakva je Véra prez
chinov? Moreli anda véra prez chinov chlo-
veka zvelichiti? Zakaj ne? Kaj veli sz. Apo-
stol Jakob? Zakaj mora anda kerztchenik vé-
ru z-chinmi pokazati?

7.

Morali Zchem mora kerztchenik katolik szvoju
kerztchenik véru *drugoch* pokazati? — Kada mora on tó
szvoju véru vchiniti? y kada ne? — Jeli je pako vszig-
takaj odper- dar potrebno véru szvoju z-vuztmi valuvati?
to z-vuztmi Moremoli *vszem* lyudem povedati: *ja szém*
valuvati? *kerztchenik katolik*? — Jeli ali nepotrebuje
dika Bosja visheputi, da véru z-vuztmi valu-
jemo? — Vu peldi, ti sze od tvojech pöglava-
rov zbog vére pitash, kaj bi moral vchiniti?
Zakaj valuvati? Jeli ovo ovde potrebuje dika
Bosja? — Jeli kada y dobro blisnyega na-
shega potrebuje, da véru z-vuztmi valujemo?
V. p. Ako gdo zbog tvojege muchanya vu vé-
ri bi dvojil, kaj bi ti moral vchiniti? — Za-
kaj bi valuval? Jeli ovo ovde dobro blisnye-
ga tvojege potrebuje? —

I. Dokànychanye Nàvuka.

Abraham pokasùje szvoju Vèru z-chinmi.

Abraham, Dragi! bil je jeden bogabojechi chlovek, on bil je vre ztár zkupa z-szvojum senum Szarum, ter nészu imali deteta, kaj nye jako saloztilo je. Jednoch izkazal sze je Bog Abrahamu, y obechal nyemu, da on nyemu jednoga szina, y od ovoga vnosinu Odvetkov dal bude. Abraham véruval je, kaj nyemu Bog obechal; y ako taki czeli szvét bibil rekel, da tak ztari zakonzi lyudi nikakvu detczu vishe imati nemreju, tak vendar Abraham Bogu bi bil véruval. Zato y veli Pavel vu liztu na Rimlyane: *Abraham véruval je Bogu, y ovo pripiszano je nyegvoj pravichnozi.*

Ali kak? jeli vèra Abrahama nikaj drugo nebila, kak jedna nedvojna dopadnozt zverhu obechanya y rechi Bosanzke? Kaj je on drugach vchinil, da véru szvoju takaj z-chinòm pokase? chujmo! Bog zapovedal mù je, da vu szvojih ztarih dnevih iz hise szvoga Otcza, od szvojih priatelyov y radyakov naj odide, y vu dalechnì ország putuje. Abraham pripravlya sze na put, zprichava sze vszem, y podajesse vu szedemdeszet y petom letu dobe szvoje z-Szarum szvojum senum; y z-Lothom szvojem szinom na put, ter dohadya vu Kanaan jeden plodni ország. Ovde jednoch zbog bolshe pashe med paztiri Abrahamovi y Lothovemi naztala je szvadya; Abrahama saloztilo je to, y dopuztil je ztrichichu szvojemu zbog mira szlobodno zebrati szì, y oditi vu koje goder okolicze Orszaga nyemu sze dopadalo bude. Jednoch szedel je on okolo poldneva nedalko od szvoje kolibe, y zapazil je tri putnike iz dalka dohadyajuche; on ztal sze je, ishel nyim naproti, pozdravil nye poleg navade, y prozsil, da k-nyemu sze naj naverneju, da nye nahranil bude; ovi tri putnikì prijeli szù pozivanye ovo, y bili szù od Abrahama

kak najholye podvorjeni. Putniki ovi bili szû Angeli; jeden zmed nyih ochituval je nyemu, da vu Szodomu y Gomorhu idu, da tam ove greshne varashe z-ognyem y z-sveplom zkonchaju. Abraham pun szmiluvanya proszil je za ove varashe, da Gozpon zbog pravich-nih ovem hmanyem bi oprozil. — Kaj zadnich rekel budem od one prevelike podlosnozi nyegve, z-kojum on szam szvojega najdragshega jedinoga szina Izaaka, Bogu alduvati je hotel, y zaizto alduval bi bil, ako Bog po Angelu od szmertnoga vudarcza nyemu odztu-piti nehibil zapovedal?

Szami pokazi, da Abraham ne szamo tverдно vu Boga verúval, nego takaj szvoju véru z-szvetemi chi-ni pokazal je. Kaj morem anda onem na pol kerztche-nikom, koji stimaju, da vre vsze vchinili jeszu, ako szamo vsze tverдно véruju, kaj Bog rekel y nazveztil je, vu oztalem pako sze malo za dobre chine Vére zkerbiju, na konczu rechi, kak, kaj vre jednoch Jesush Kriztush Sidovom, koji sze ravno zato, kajti iz poko-lenya Abrahamovoga izhadyaju, za szvete y zebrane dersali jeszu, odgovoril je: *Ako vi szini Abrahamovi jezte, tak poztavite takaj Chime Abrahamove.* (Ioan. 8.) Dersite Zapovedi vashega Boga, kak Abraham ove dersal je; budite mirni z-blisnyem vashem, kak y Abraham z-ztrichichem szvojem Lothom bil je. Szmiluj-te sze gladnem y sedynem, okrepite ove kak y Abraham pútnike nahramil y okrepil je. Molite za vashe, y vszeh greshnikov pobolshanye, kak Abraham za Szodomitancze proszil je. Aldujte najzadnich Bogu, vasz szame, vashu detczu, y vsza, koja vam draga jeszu, z-veszelyem, kak Abraham szvojega Szina Izaaka alduval je. Ako vi szini Abrahamovi jezte, tak vchíni-te takaj, kaj Abraham vchínil je. Amen.

II. Dokàuchanye Nàvuka.

Apostoli odperto valuju Bosanztvo Jesusha.

Jesush Kriztush pochetnik vére bil je vre trideszët lét ztâr, kada on navuchati pochel je. Shimon, koj y Peter ozîva sze, y Andrash, bili szû dva pervi koje on poleg morja Galaleanzkoga za szvoje naszlednike pozval, y za ribiche lyudih vchinj je. Jakob y Janush, dva szini Zebedeushevi ovem szledeli jeszu; zvun oveh pozval je josche oszem drugeh, zvekshinum ribiche, ove ozval je on Apostole, iliti poszlenike. Ovem ochituval sze je Jesush tak po szvojeh navukih, kak y po chudochinih. Po tom vchinyeno je, da nyega vszikam szledúvali, tverdno vu nyega véruvali, y takaj szvoju véru odperto valuvali jeszu. Ar kada nye Jesush jednoch bibil pital, kaj lyudi od nyega veliju, za koga nyega dersiju, tak odgovorili szû, y rekli: Mester! nekoji zmed lyudih dersiju tebe za Ivana kerztitelya, drugi za Eliasha, nekoji za Jeremiasha Proroka, veksha ztran pako dersi tebe za jednoga ztaroga proroka, koj sze od mertveh ztal je. Vezda premenil je Jesush szvoje pitanye, y rekel: *kaj velite pako vi, gdo szém ja?* (Matth. 16) Y taki odgovoril je Peter vu imenu vszeh drugéh: *Ti jeszi Kriztush, szin Boga sivoga:* pravi Mesziash, chekani odkupitely szvétà.

Ztanimó ovde, y vidimo, kakov navuk od ovud za nasz izpelyati sze more. Kak, Dragi! ako Peter, ako vszi oztali Apostoli ztem zadovolyni bili nészu, da vu szerdczu vu Jesusha véruvali jeszu, nego dapache ovu véru odperto valuvali jeszu, nebudemoli mi takaj ovo za jednu nashih najperveshih dusnoztih dersali, da nashu véru, kada potrebno je, vszigdar nepreztrasheno valujemo? Jeli znate, koja vre Jesush Kriztush od onoga plashlyivcza rekel je, koj sze szramoval bude, odperto za kerztchenika, tojezt za Vuchenika, koj vu

Schlojssnigg Izbine Vére Del. I.

Jesusha veruje, izdati sže? Koj zbog mene y rechi mo-
je pred lyudmi szramuje sže, z-onem sže takaj szin
chlovechji szramuval bude, kada on vu szvoje y Otcza
szvojega y szveteŭ Angelov Velichantzvo dojde. (Luc.
9.) Kakva ovo ztrahovita grosnya za one, koji iz ztra-
ha praznoga zespotavanya, odperte dusnoztŭ vére za-
puztchaju! koji sže szramuju vezdashno yreme vu kola
razvuzdaneŭ mudriashev za kerztchenika izdatisze, vé-
ru, czirkvu, nenye szlusbenike y obichaje braniti y za-
govorjati! Ovakvi zaizto temeljito bojati sže imaju,
da y Jesush naszudnyem dnevu z-nyimi sže szramuval,
y za szvoje vuchenike zpoznal nebude.

III. Dokànychanye Nàvuka.

*Obchinszka dùsnozt Kerztchenikov je, Véru
szvoju temeljito navchili sže.*

Véra, Dragi! koju mi valujemò, vszakomu kerzt-
cheniku tû dusnozt nalase, da sže nyu temeljito na-
vchi. Tergovecz vu tergovini, pravdoznanecz vu zna-
noztŭ pravicz, vojnŭk vu potrebnih nyemu, y vszaki
chlovek vu dusnoztŭh ztalisha szvojega podvuchiti sže
y temeljito vputiti sže terszi. Vszaŭki, koj szrechu po
kakvi znanozti, mestriji ali rukotvorztvu vchiniti, y
vu ovoj napreduvati hoche ove temeljito navchiti ter-
szil sže bude. Med vszemi znanozti pako né nijedna,
koja tak jako na nasz zpada, y nam tak oszebujna biti
mora, kak Véra! Ova takaj ima szvoje naredbe y du-
snoztŭ, koje, ako dobri kerztchenikŭ poztati selimo, te-
meljito poznati, y znati moramo; dusnozt anda je
vszakoga, ovu z-vszum marlyivoztŭjum navchiti sže.
Nigdo ovoj dusnoztŭ odrechi sže praviezu néma: ar
kakgoder kerztchenik vu Boga véruvati, vu nyega sže

ufati, y nyega lyubiti dusen je, ovak takajshe vszaki ovoga Boga zpoznati, nyegva obechanya znati, y nyegve zapovedi navchiti sze dusen je.

K-tomu pitam ja: Gdo szmô mi kakti kerztcheniki? Jeli nészmo vucheniki Jesusha Kriztusha? On, on je nash, y to nash jedini Navuchitely. *Vash Mester je jeden jedini, Kriztush, vi pako vszi jezte Bratja med vami, y vucheniki ovoga Mestra.* (Matth. 23.)

Jeli anda né jedna zmed najperveshih dusnoztih ova, da mi nyegva podvuchanya poszlushamo, navuku nyegvomu sze aldujemo, y ovoga nam znanoga y laztovitoga vchínimo? Mi szmô kerztcheniki predi, nego varaschani, vojniki, pravdoznanczi, rukotvorczy jeszmo, anda je perva zmed vszeh dusnoztih nashih, da sze vu oneh podvuchimo, koja na Vêru nashu zpadaju.

O terszite sze anda ovu pervu dusnozt verno izpuliti, Kerztcheniki dragi! Terszite sze Boga, y Jesusha Kriztusha prav zpoznati, y vu ovoj znanozti, koja k-vekiivechnomu, sivlenyu pelya, bolye y bolye napredovati. Terszite sze vashu véru, k-kojoj po miloszerdnoztii najdobrotivneshega Boga pred tulikemi milionu lyudi pozvani jezte, zkrovnoztii, koje ona vuchí; dobra, koja ona obechuje; dusnoztii, koje ona prepiszava pravo y temel'yito poznati navchiti sze. Poprimite na ov czily vam szlusechega nachina, koj pred vszemi drugemi vu jednom marlyivom pohadyanyu kerztchanzkih Navuchànyih poztavlyen je. Vu oveh vam razlosno y temel'yito iztine vére y dusnoztii kerztchanzke napervoztavlyaju sze, vu oveh zopet vam vu pamet donashala sze budeju, koja morebiti vre pozabili jezte, vu oveh pamet vasha razbiztrila sze, volya vasha genula sze, y kerztchanztvo vashe objachilo sze bude. Amen.

NÀVUK 2.

*Od temelnéh navukov Vère kerzt-
chanzko - katholichanzké.*

PITANYE 1.

*Kaj vszaki chlovek, poklam kam k-vsivanyura-
suma dojde, potrebno znati y véruvati mora,
da zvelichenye zadobi?*

Razláganye.

1. Chlovek dohadya k-vsivanyu razuma,
kak berse zna, kaj dobro, ali kaj zlo je. V.
Chlovek do- hadya k-vs- kak berse zna, kaj dobro, ali kaj zlo je. V.
hadya k-vs- p. Vi moja Detcza! vre znate, da sheptati,
ivanyu raz- szmejati sze, zgledavati sze vu Czirkevi kaj
uma, kada szmejati sze, zgledavati sze vu Czirkevi kaj
zna, kaj do- zlocheztoğa je; szuprotivno pako, da molit-
bro ali zlo je. zlocheztoğa je; szuprotivno pako, da molit-
va, pobosnozt y chednozt kaj dobroğa je.
Vi anda vre znate dobro od zla razluchiti,
vi imate vsivanye razuma.

2. Véra, kak zadnich rekel jeszem, k-zve-
Vszaki chlo- lichenyu je potrebna. Metemtoga chlovek zto-
vek, mora prav onda pocheti more kaj znati y véruvati,
najpervich koja Bog nazveztil je, kada k-sivanyu razu-
temelyite ma dojde Poleg toga, néje zadozta, da
navuke zna- ma dojde Poleg toga, néje zadozta, da
ti, y véru- ma dojde Poleg toga, néje zadozta, da
vati. chlovek szamo vu obchinzkom véruje, y
miszli: ja Bogu vsza vérujem. Ne zaizto!
ar Bog k-nam odperto y vu oszebnom govo-
ril, je, mi anda nyemu odperto, y vu osze-
bnom takaj veruvati morámo. Nahadyaju'sze
nekoji návuki Vère, prez kojeh mi druge
véruvati nemrémo, y zoveju sze zato te

melyni navuki Vere kerztchanzko-katholichanzke. Mi vszigdar poztavlyamo predi temelya, nego zidamo, anda takaj predi temelyne návuke Vére kerztchanzko-katholichanzke znati y véruvati moramo. Ove temelyne návuke vam dauasz raztolnachiti hochu

Pervi temelyni návuk Vére kerztchankokatholichanzke je, *da jeden Bog je.* Neje Boga, tak neje niti Bosanzkih nazveztchenyihiliti ochituvanyih, anda niti vére. Neje Boga, tak neje niti postuvanya Boga, anda niti vére, koja vu nachinu Boga postuvati poztavlyena je. Czela Véra temelyi sze vu Bogu. Návuk od jednoga Boga je jeden temelyni navuk. Mi znamo ali takaj iz razuma, y iz Bosanzkih ochituvanyih, da je jeden Bog.

3.
Navuk, da
jeden Bog
je, je jeden
temelyni na-
vuk.

Y zaizto dragi! oglejte sze pravo po szvétu. Szvét ov szlosen je iz neba y zemlye. Na nebu szvetiju szuncze, meszcz y neizbrojene zvezde. Na zemlyi nahadya sze vnosina zaszada, drevja, kamenya, sivine. Ove ztvari nészu szame sze napravile: ar jeden chlovek dohadya od drugoga, jedno sivinche od drugoga. Drevja takajshe nészu szama sze napravila, nego ona iz zemlye dohadyaju. Josche menye napravila szû szama sze kamenye, zemlya, szuncze, meszcz y zvezde; ar ova szû szama mertva téla.

4.
Ztvari oro-
ga szvéta
nészu sze
szame na-
pravile.

Ztvari ovoga szvéta nészu takaj pripetcze poztale, ar szuncze, meszcz y zvezde imaju szvojega narednoga techaja: chetiri ztranke lèta, protuletje, leto, jeszen, zima szlediju naredno jedna za drugum. Zemlya naredno donasha szàda. Tela lyudih y nèmeh ztvarih jeszu naredno szlosena, vsze je onak, kak,

5.
Ztvari ovo-
ga szvéta
nészu pri-
petcze po-
zlate.

kada, y gde biti mora. Vu szvetu anda je najlepshi red. Ako anda nijedna hisa prez mestra, nijeden vert prez vertlara, naztati nemre, kak bibil mogel ov tak lepi szvet pripetcze, y prez pochetnika poztati?

6.
Pochetnik
ovoga szve-
ta né chlo-
vek, nego
Bog.

Ztvari ovoga szveta imaju anda Pochetnika, koj ove napravil, y tak naredno y lepo vredil je. Gdo pako bi mogel biti ov pochetnik? Morebiti jeden chlovek? o zaizto ne! vszi lyudi zkupa nebibili mogli jednoga jedinoga sivoga cherva, jedno jedino polyzko czvetje, vnogo menye jednoga czeloga szveta napraviti. Pochetnik ovoga szveta mora vishe nego chlovek ali szvet izti biti. Mi zovemo nyega Bog. Je anda jeden Bog, kajti ztvari ovoga szveta niti od szebe szameh, niti pripetcze, niti od lyudih poztati nészu mogle.

7.
Vszaki chlo-
vek mora
potrebno
nati y vé-
ruvati: per-
vich, da je
jeden Bog.

Bog odperto je ochituval y veruvati zapovedal, da je jeden Bog; ar sz. Pavel odperto pishe vu szvojem liztu na sidove: *koj k-Bogu dojtí hoche, on mora veruvati, da on je.* (Hebr. 11.) Hoche rechi: koj jednoch zvelichiti sze hoche, on za tverdno dersati mora, da je jeden Bog. Chlovek, kada k-vsi-vanyu razuma dojde, mora potrebno znati y veruvati, pervich: *dá je jeden Bog.*

8.
Naplachy-
vanye y ka-
stiga jeszu
za ohchin-
zko dobro
potrebna.

Drugi temelyni navuk vére kerztchanzko-katholichanzke je: *Da Bog pravichni szudecz je, koj dobro naplachuje, zlo pako kastiguje.* Ovo poveda nam nash laztoviti razum; ar premiszlite szami, moja detcza! kakov izgled bi bil vu jednom Orszagu, ako lyudem vsze vchiniti bi bilo dopuztcheno. Poztavimo, da sze detczy vu skoli sheptanye y igra dopuzti, tak nikaj drugo nebudu vchi-

nila, kak sheptala y igrala sze. Ali poztavimo, da sze lyudem robiti y krazti dopuzti, tak oni josche bolye budu robili y krali. Oni, iztina je znaju prepoved chizto dobro, y mi nye visheputi opominyamo; ali rechi szame nészu zadozta nye od zla zdersati, y k-dobromu pritirati. Glavni nachin, nye od zla zdersati jeszu josche kastige, y glavni nachin, nye na dobro zbuditi, je josche naplachuvanye.

Vi znate, draga detcza! da jeden zpametni y dobri Otec dobru detczu, y jeden zpametni y dobri Gozpon dobre podlosnike lyubi. Bog je nash najvekshi Gozpon y Otec, on je zevszema muder y dobrotiven, on hoche lyudi szrechne imati, on nye anda takaj od zla zdersati mora. Bog anda kastiguje zlo. Po naplachuvanyu zbudyavaju sze lyudi na dobro, Bog anda dobro naplacha.

9.
Bog kastiguje y naplacha. On je pravichen szudecz.

Bog dobro zna, kaj vszaki zaszlusi, kajti on vszaznajuchi je, nyega niti chazt pershone, niti prikazi zaszlepiti nemreju, kajti zevszema szvét je. Bog naplachuje y kastiguje peleg zaszlusbe, on je anda pravichni szudecz.

Bog takaj odperto je ochituval, y veruvati zapovedal, da on pravichni szudecz je; ar sz. Pavel ne veli szamo: *koj k-Bogu dojtí hoche, on veruvati mora, da on je, nego on josche pridaje: y da on oneh, koji nyega iztchu, naplatitely je.* (Hebr. 11.) Vsza chlovek mora anda *drugoch* potrebno znati y veruvati, da Bog pravichni szudecz je, koj dobro naplachuje, zlo pako kastiguje. Lyudi retko puti naplachuju poleg zaszlusbe, kajti

10.
Vszaki chlovek mora znati y veruvati da Bog pravichni szudecz je.

szlabi, bludni y hmanyi jeszu. Ako anda Bog pravichni szudecz nebibil, tak hotenye y selya k-dobrem chinom frisko bi preztala. Nut! kakov temelyni nàvuk je, nàvuk od jednoga szudecza Bosanzkoga!

11.

Vszaki chlo-
vek mora
znati y ve-
ruti, da
tri bosanzke
pershone je-
szu.

Trejtì temelyni nàvuk Vére kerztchanzko-katholichanzke je: *Da szú tri pershone Bosanzke vu jednom bitju, y naradi Otecz, szin y Dùh szveti.* Ovo, iztina je, nepoveda nam razum nash, ali Bog nam je to ochituval, ar sz. Janush Apostol pishe: *Tri jeszu, koji szvedochantzvo davaju vu nebu, Otecz, Szin y Dùh szveti, y ovi tri jedno jeszu.* (1 Joann. 5.) Vszaki chlovek mora anda véruvati, da tri Bosanzke pershone jeszu, y da vsze tri jedno bitje, y jednu naravu imaju. Bogu Otczu pripishuje sze ztvorjenye, szinu odkuplenye, Dùhu szvetomu poszvetchenye. Vsza dobrochinztva, koja mi vérujemo, temelyiju sze vu tréh Bosanzkih pershon: nàvuk od treh Bosanzkeh pershon je anda jeden temelyni nàvuk.

12.

Vszaki chlo-
vek mora
Vtelovlenye
y szmert
szina Bo-
sanzkoga
veruvati.

Cheterti temelyni nàvuk Vére kerztchanzko-katholichanzke je: *Da druga pershona Bosanzka je chlovek poztala, da nasz po szvojój szmertì na krisu odkupi, y na veke zvulichene vchini.* Ovo takaj nam razum nash nepoveda, ali Kriztush nam je to ochituval, y za veruvati potrebno napervoztavil, kada Nikodemushu rekel je: *tak lyubil je Bog szvéta, da szina szvojéga jedinorodyenoga dal je, da vszi, koji vu nyega véruju, ne zkvariju sze, nego sivlenye vekivechno imaju.* (Joann. 3.) Po gréhu najmre vszi lyudi dopeli szú vu szusanztvo dùha peklenzkoga. Jeden chlovek drugoga nebibil mogel odkupiti,

kajti vszi vu szusanztvu ovom bili jeszu; tak poszlal je Bog szina szvojega, koj chlovekom poztalje, da nasz po szmertí na krisu odkupi. Vu ovo vtelovlenye szina Bosanzkoga temelyi sze vsze oproztchenye y vsza miloxtcha. Navuk od vtelovlenya szina Bosanzkoga je anda temelyni navuk Vére kerztchanzko-katholichanzke.

Razgovorí.

1.

Kada dohadya chlovek k-vsivanyu razuma? — Dersishli ti sheptanye vu Czírkví za zlo? Dersishli pako moliti vu Czírkví za dobro? znashli anda dobro od zla razluchavati? — Imash anda vre vsivanye razuma? Zakaj? Kada dohadya chlovek k-vsivanyu razuma? —

Kada dohadya chlovek k-vsivanyu razuma?

2.

Je véra vszakomu chloveku k-zvelichényu potrebna? Mora chlovek predi véruvati, nego k-vsivanyu razuma dojde? Kada mora anda vszaki chlovek znati y véruvati, kaj Bog nazveztil je? — Jeli je zadozta, miszliti szí: *Koje navuke Vera kerztchanzko-katholichanzke moramo najpervich znati, y véruvati?*

ja Bogu vsza vérujem? — Jeli Bog né odperto y vu oszebnom govoril? Moramoli anda y mi Bogu odperto y vu oszebnom véruvati? Zakaj? — Kak sze zoveju oni navuki Vére, vu kojeh sze vszi drugi temelyiju? Kada hisu delamo, kaj najpervich poztavlyamo? Koje návuke Vére kerztchanzko-katholichanzke moramo najpervich znati?

3.

*Je návuk,
da jeden Bog
je, jeden te-
melyni návuk?*

Koj je pervi temelyni návuk vére kerztchankø - katholichanzke? Ako nebi bilo Boga, bili onda Bosanzka ochituvanya bila? Ako pako Bosanzkih ochituvanyih nebi bilo, bili véra nahadyati sze mogla? Znashli, kaj véra je? Kak sze zove nachin Boga postuvati? Ako Boga nebi bilo, bili onda postuvanye Boga iliti véra nahadyati sze mogla? Vu chem temelyi sze anda czela véra? Je návuk, da jeden Bog je, jeden temelyni návuk? Znamoli mi, da jeden Bog je? Odkud? Szamo iz Bosanzkih ochituvanyih? —

4.

*Kaj je szvét?
y koje Ztvari
ri nahadya-
ju sze vu
szvétu?*

Jeszi sze ti vre kada ogledel vu szvétu? Iz chesza je szvét? Vidishli nèbo y zemlyu? Kakve ztvari zpasujesh na nébu? Kaj szvétu po dnevu? V-nochi? — Y kakve ztvari jeszu na zemlyi? Vidishli drevja, kamenýe, nème ztvari? —

5.

*Jeszu sze o-
ve ztvari
szveta szame
napravile?*

Jeszu sze lyudi y nème ztvari szame napravile? Moreli kaj szebe szamo napraviti? Jeli nedohadya chlovek od chloveka, jedno svinche od drugoga? — Morebiti sze je y pervi chlovek szam napravil? Zakaj ne? — Jeli je pervi chlovek kaj drugo bil, nego chlovek? Jeli je imal on vech Jakoztih, kak drugi lyudi? — Jeszuli y drevja szebe szama napravila? Odkud ova izhadyaju? Jeli sze je pako zemlya szama napravila? Zakaj ne? Je ona kaj sivoga? — Jeszu sze szuncze y zvezde szame napravile? Zakaj ne? Kakva szú to téla? siva? —

6.

Morebiti szû pako ztvari ovoga szvéta *Jeszu ztvari ovoga* pripetcze naztale? Jeli szuncze vszako leto *szvéta pripetoze naztale?* jednako izhadya? — Jeszu ruke y noge pri chlovekû na krivem meztu? Jeszu anda vsza na szvetu tak vredeyna, kak biti mora? — Je anda red vu szvétu? Zakaj? Moreli lepa hisa pripetcze naztati? Gdo' jé k-podignenyu hise potreben? Y jeli né szvet naredno y lepo napravlyen? — Jeli je mogel anda szvét pripetcze naztati? Zakaj ne? —

7.

Ali morebiti szû lyudi pochetnik szvéta? *Jeli je chlovek pochetnik szvéta?* Morejuli vszi lyudi zkupa jednoga sivoga cherva nachiniti? Zakaj anda nemre chlovek pochetnik szvéta biti? —

8.

Kak imenujemo pochetnika Szvéta? *Je Je vu iztini jeden Bog?* Jeszu ztvari szvéta szame od szebe naztale? Ali szû ztvari szvéta pripetcze, ali od lyudih vchinyene? Je anda vu iztini jeden Bog? Zakaj?

9.

Jeli je Bog takaj ochituval, da je jeden *Je véra vu jednoga Boga k-zvelichenyu potrebu?* Bog? Kaj veli sz. Pavel, koj k-Bogu dojt hoche, kaj mora véruvati? Je anda potrebno k-zvelichenyu, da vu jednoga Boga vérujemo? Zakaj?

10.

Koj je drugi temelyni navuk vére kerztchanzko — katholichanzke? — Kak bi izgledalo vu skoli, ako detczy vsze bi bilo dopuztcheno? V. p. Ako detczy sheptanye bi bilo *Jeli je potrebno zlo kastiguvati dobro pako naplachatiti?* dopuztcheno, kaj bi oni vchinili? Ali kak bi

zgedalo vu jednom Orszagu, ako lyudem vsze vchiniti bibilo dopuztcheno? V. p. Ako lyudem tatbine bi bile dopuztchane, kaj bi oni vchiniti? — Jeli lyudi nikakve zapovedi neznaju? Jeli sze oni visheputi opominyaju? Jeli szû rechi zadozta, da sze od zla odvra-
chaju? koj je zglavni nachin lyudi od zla zdersati? — Kaj chini navuchitely, kada detcza za rêchi vishe nikaj nemaraju? — Koj je zglavni nachin lyudi na dobro zbuditi? Kaj obechuje navuchitely na konczu lëta, ako marlyivi jezte? —

11.

*Jeli Bog ka-
stiguje zlo,
y naplacha
dobro?*

Kakvu detczu lyubi jeden mudri v do-
bri Otecz? zlocheztu? — Y kakve podlosni-
ke lyubi jeden mudri y dobr. Gozpon?
Gdo je nash najvekshi Gozpon y Otecz? —
Gdo je zevszema muder y dobrotiven? Ho-
cheli Bog lyudi szrechne imati? Zakaj? —
Kaj chini lyude szrechne? Na kaj mora Bog
lyude zbuditi? — Kaj chini lyude neszre-
chne? Od chesza mora Bog lyudi odvrachati?
Po chem sze lyudi od zla odvrachaju? —
Jeli Bog zlo kastiguje? Zakaj? Po chem sze
pako lyudi na dobro zbudyavaju? Jeli Bog
naplacha dobro? Zakaj?

12.

*Je Bog pra-
vichen szu-
decz?*

Znali Bog zversheno, kaj gdo zaszlusi?
Zakaj? — Ali morebiti pazi Bog na chazt
pershone, ali na prikaze? Zakaj ne? —
Gdo je zevszema szvet? — Kak zovemo mi
onoga szudecza, koj poleg zaszlusbe naplachu-
je ali kastiguje? — Poleg chesza Bog anda
naplachuje ali kastiguje? — Kakov Szudecz
je Bog? — Zakaj pravichen szudecz? —

13.

Je Bog takaj véruvati zapovedal, da on pravichni szudecz je? — Jeli sz. Pavel szamo veli: koj k-Bogu dojtí hoche, on mora véruvati, da on je? Kaj on josche pridaje? — Moramoli véruvati, da Bog pravichen szudecz je? Zakaj? Y bili mi vnogo dobro vchinili, ako naplachuvanye nebi véruvali? — Bili pako naplachuvanye véruvali, ako pravichnoga szudcza nebi véruvali? — Je návuk, da Bog pravichen szudecz je, jeden temelyni návuk? Zakaj?

Morali vszaki chlovek potrebno znati, y véruvati, da Bog pravichni szudecz je?

14.

Koj je trejti temelyni návuk Vére kerztchanzko - katholichanzke — Jeli ovo nam razum nash poveda? — Gdo je ovo nam ochituval? Kaj pishe sz. Janush: kuliko nyih je, koji szvedochantzvo davaju vu nèbu? Y kaj szú ovi tri zkupa? — Zakaj moramo mi véruvati, da trí Bosanzke pershone jeszu vu jednom bitju y naravi? — Gdo nasz je ztvoril? — Gdo nasz je odkupil? — Gdo nasz je poszvetil? Vu chem sze temelyiju anda vsza dobrochinzstva koja vérujemo? Szamo vu Otczu Bosanzkem? Je návuk od treh Bosanzkih pershon jeden temelyni návuk? Zakaj? —

Morali chlovek znati y véruvati, da trí Bosanzke pershone jeszu?

15.

Koj je cheterti temelyni návuk Vére kerztchanzko - katholichanzke? — Jeli nam to nash laztoвити razum poveda? — Gdo je ovo ochituval? — Kaj je rekel Kriztush Nikodemushu? — Kak je Bog szvéta lyubil? Y koji sze nebudu zkvarili? — Jeli je k-

Morali vszaki chlovek znati y véruvati, da druga pershona Bosanzka chlo-

vekom poztala je? zvelichenyu potrebno véruvati, da druga pershona Bosanzka chlovekom poztala je? Zakaj? — Vu kakvo szusanstvo dozpeli szû vszi lyudi po gréhu? Jeli je mogel chlovek chloveka odkupiti? Moreli szûsni szûsnoga odkupiti? Jeli nészu vszi lyudi bili szûsni dûha peklenzkoga? — Koga je anda Bog poszlal? Y gdo je szin Bosji poztal? Y akoszin Bosji nebi bil chlovek poztal, y nebi bil na krisu vmerl, bili mi bili odkupleni? Vu chem sze temelyi anda nashe odkuplenye? Vu chijem vtelovlenyu y szmerti? Je návuk od vtelovlenya y szmerti Szina Bosanzkoga jeden témelyni návuk? Zakaj? —

PITANYE 2.

Kaj vszaki kerztchenik katholik zvân gorirecheneh temelyileh kerztchânzko — katholichanzkeh Vére návukov josche znâti y véruvati mora?

Razláganye.

1. *Kerztchenik katholik mora takaj znati y véruvati pervich da dusha chlovechanzka nevmertelna je.* Vi do vezda chuli jezte, moja Detcza! koje iztine vszaki kerztchenik, poklamkam k-ysivanyu razuma dojde, potrebno znati y véruvati mora, da zvelichenye zadobi. Ali josche né zadozta, da kerztchenik szamo ove perve temelyne návuke Vére kerztchanzko-katholichanzke znâ, nego on zvun oveh takaj znati y véruvati mora: *pervich, da dusha chlovechanzku nevmertelna. je.*
2. *Chlovek dushu ima.* Chlovek szlosen je iz téla y iz dushe. Morebiti ztê vre videli mertvo telo; mertvo te-

lo takaj ima ochi, vuha, ruke, noge, y ozta-
le kotrige, ali ono nikaj nechuti, y ako ni-
kaj ne chùti, tak josche menye kaj miszliti
more; kada anda szamo telo nikaj chutiti y
miszliti nemre, tak mora josche nekaj dru-
goga vu telu biti, kaj chùti y miszli, y ovo
Bitje imenujemo mi *dushu*. Vszaki sivi chlo-
vek ima anda dushu.

Vendar dushu chloveka videti nemremo.
Zchem vekshe kakve dugovanye je, z-tem
lese ovo videti moremo, kajti ovo vishe ztra-
nih vu szebi ima. Vi lese vidite jednoga tur-
na, kak jednoga dimnyaka, kajti jeden tu-
ren vishe kamenya vu szebi ima, kak dim-
nyak. Telovne ztvari moremo razdeliti, po-
treti; one szlosene szû iz ztrankih, y zato
nye videti ali chutiti moremo. Kaj nikakve
ztranke nema, ono niti videti nemremo, y
kaj chizto nikak videti nemremo, ono niti ni-
kakve ztranke nema. Mi imenujemo takvo du-
govanye, jedno *jednoverztno* dugovanye. A-
koprem tuliki lyudi vre vmerli jeszu, tak ven-
dar pri nijednem dushu izhadyati videli ne-
szmo; mi dushu chloveka videti y chutiti ne-
mremo, ona nema ztranke, ona je jedno je-
dnoverztno bitje. Ona vendar ima pamet y vo-
lyu. Jedno jednoverztno bitje, koje pamet y
volyu ima, imenujemo mi *dùha*: dusha chlo-
veka je anda dùh.

3.
*Dusha chlo-
veka je je-
den dùh.*

Telo chloveka vumira, y gnije vu grobu.
Metemtoga ovo néje chùdo; ar telo sive zpo-
mochjum dushe, ono anda vumira, ako sze
dusha od tela razluchava. Telo ima meszo,
kerv, kozti y druge ztranke, tak ono anda
gniti y razszipati sze more. Vnogo drugach

4.
*Dusha chlo-
veka nera-
zpada sze,
kak telo v-
grobu, nego
onu sive.*

pripetcha sze pako z-dushum. Dusha néma nikakve ztranke, ona anda nemre gnyiti y razszipati sze. Dusha ne sive z- pomochjim téla, ona y prez téla siveti more.

5. *Dusha chloveka je nevmetelna..* Bog, iztina je, z-jakoztjum szvoje vszazmoguchnozti dushu chloveka zkonchati bi mogel, tak kak on nyu iz nistara ztvoril je, metemtoga nyegva mudrozt y dobrotivnozt ovo nedopuztcha; ar vszi lyudi seliju za naveke zvelicheni poztati, y k-ovi selyi nészu sze dogovorili: ova lesi vu naravi, Bog je ovu zaszadil. Kaj metemtoga hasznila bi ova selya, ako mi za naveke zvelicheni poztati nebi mogli. Jeli ne ovo vnogo bolye jedna muka za nasz, ako szî vsze zmirom kaj selimo, ter ono imati nemremo kaj selimo? — Mudri Bog ali nikaj ne vchini zapztuny, y dobrotivni Bog nedusnomu chloveku nezrokuje nikakvu muku, on selyu za vekivechnem zvelichenyem néje zapztuny, y za muku vu chloveka zaszadil. Dusha chloveka more anda vekoma zvelichiti sze. Ako Bog pako dushu chloveka zkonchati bi hotel, tak ona vekoma zvelichiti sze nebi mogla. Bog anda dushu chloveka nebude zkonchal, nego ovu nepretancze vu sivlenyu zdersal; dusha chloveka je anda nevmetelna.

6. *Bog szam takaj ochituval je nam nevmetelnost dushe.* Bog takaj nam je ochituval, da dusha chlovechanzke nevmetelna je; ar rekel je vuchenikom szvojem: *Nebojt e sze oneh, koji telo vmarjaju. dushu pako vmoriti nemreju.* (Matth. 10.) Kaj vmoriti sze nemre, ono je nevmetelno; kada anda Kriztush veli, da dusha chlovechanzka vmoriti sze nemre, tak vuchil je on, da ona nevmetelna je. Vszaki

kerztchenik katolik anda josche znati y véruvati mora, da dusha chlovechanska nevmertelna je.

Drugoch vszaki kerztchenik katolik takaj josche znati y véruvati mora, da miloſtcha Bosja na zvelichenye potrebna je, y da chlovek prez miloſtche Bosje nikaj najemnoga za zvelichenye vchiniti nemore.

Vi za ztanovito moja Detcza! vre viſhe puti rech ovu: *milostcha*, chuli jezte: kada vam gdo kaj ponudi, kaj vi radi imate, tak navadni ztê rechi: *to mi je jedna milostcha*. Ali izplachuvanye jednoga drusinčeta nebudete dersali za milostchu, ar ovo neizplachasz zaptuny, ono mora szvoju plachu zaszlusiti. Dár, kojega zaszlusimo, je jedna placha, ali dár, kojega nezaszlusimo, je jedna milostcha.

Mi imamo telo y dushu, chutenya y kotrige, y vsze nashe jakozti od Boga. Bog vsza je ztvoril. Mi ali pred ztvaryanym za ztanovito josche nikaj zaszlusili nészmo, vsza anda koja imamo, jeszu szamo milostcha Bosja. Kada pako od milostche na zvelichenye potrebne zpomenek je, tak nerazmevajusze ovi naravzki dári: nego jedna nuterna, zverhunaravzka pomoch, da nekaj dobroga za zvelichenye vchinimo. Mi ovakvu pomoch zaizto zaszlusili nészmo, pokedob greshniki bili jeszmo; ova zverhunaravzka pomoch je anda jedna milostcha Bosja.

Bog, kakti pochetnik narave, je zverhuczele narave, on je jedno zverhunaravzko Bitje, on je zviralsche vszega blasentva, vunyim temelyi sze vekivechnó sívlenye; veki-

Schloissnigg Ixtine Vère Del. I.

3

7.

Kerztchenik katolik takaj druſtch znati y veruvati mora, da milostcha Bosja za zvelichenye potrebna je.

8.

Milostcha vu obchinzkom je dár, kojega nezaszlusimo.

9.

Milostcha Bosja raztoinachuje sze.

10.

Milostcha Bosja je za zvelichenye potrebna.

vechno sivlenye je anda takaj jedno zverhunaravzko sivlenye. Vi dobro znate, moja det-
cza! da zaszlusba vszigdar plachi primerna
biti mora. Jedna velika placha potrebuje ve-
like, jedna mala placha male zaszlusbe. Ve-
kivechno sivlenye je jedna zverhunaravzka
placha, mi moramo anda takaj zverhunarav-
zke zaszlusbe za ovu imati. Ali mi nészmo zver-
hu narave, jakozti nashe nészu zverhunarav-
zke, mi iz nashe mochi nemremo zverhuna-
ravzki chiniti, miloztcha Bosja anda nam je
potrebna.

11.

*Miloztcha
ova ztem
bolje nam
je potrebna,
kajti dusha
nasha po
grehu po-
kvarjena je.*

Ako nam miloztcha Bosja pako! poleg
zdravih naravzkih jakoztih potrebna je, da
kaj dobroga za zvelichenye vchinimo, tak
ona nam poleg oszlablenu jakoztih ztem bo-
lje potrebna bude. Szlepecz zaizto nevidi bo-
lje, y szlabi k-delu ztem neprikladneshi bu-
de. Nut po grehu je nasha dusha szlepa y
szlaba poztala, nam anda potlam greha mi-
loztcha Bosja ztem potrebnisha je.

12.

*Mi moramo
véruvati, da
miloztcha
Bosja za
zvelichenye
potrebna je.*

Bog odperto je ochituval, da miloztcha
Bosja na zvelichenye potrebna je. *Prez men^e*
nikaj nemrete vchiniti, veli Kriztush. (Joann.
15.) Dobro pazite! on ne veli: *malo*, nego
nikaj, chizto nikaj po nami szamemi, poleg
izrechka Jesusha Kriztusha, za zvelichenye
vchiniti nemremo.

Vszaki kerztchenik katholik anda takaj
znati y véruvati mora, da miloztcha Bosja
na zvelichenye potrebna je, y da chlovek
prez miloztche Bosje nikaj najemnoga za zve-
lichenye vchiniti nemore.

R a s g o v o r i.

1.

Znashli anda vre temelyne nàvuke, ko. *Kaj vszaki kerztchenik* je vszaki kerztchenik katolik, kada k-vsiva- *kerztchenik katolik josche znati y veruvati mora?* nyu razuma dojde, znati y veruvati mora? *Koji szû ovi? — Jeli je ali zadozta da kerztchenik katolik szamo ova chetvera znà? — ra, per- vich?* Kaj mora vszaki kerztchenik katolik zvan gori recheneh temelyiteh kerztchanzko-katholichanzkeh Vére nàvukov josche znati y veruvati?

2.

Iz chesza je chlovek? szamo iz téla? Je- *Imali Chlovek dushu?* szi vre videl mertvecza? Imali ochi, vuha, kotrige? Chuti y miszli mertvi kaj? — Moreli szamo télo chutíti y miszliti? Zakaj ne? Kak sze zove ono Bitje, koje vu télu chuti y miszli? — Ima vszaki sívi chlovek dushu? Odkuda to szudish? Jeli on chuti y miszli?

3.

Moremoli dushu chlovechanzku videti? *Je dusha chlovechanzka jeden dush?* Kaj vidish ti lese jednoga turna ali jednoga dimnyaka? Zakaj jednoga turna? — Zakaj je jeden turen vekshi nego dimnyak? — Kaj ima vishe kamenya, turen ali dimnyak? — Moremoli telovne ztvári razdeliti ali potreti? Drevo razrezati? kamenye tretí? Sitek razmleti? Imajull telovne ztvári ztranke? — moremoli telovne ztvári videti ali chutiti? Zakaj? — Kaj pako nikakve ztranke néma, moremoli to videti? ali chutiti? Je vre gdo dushu iz chloveka izhadyajuchu videl? Moremoli dushu chloveka videti ali popipati? Je dusha chloveka jedno jednovérztno, (sim-

plex) Bitje? Zakaj? — Kakve jakozti ima pako dusha? — Kak sze zove jedno jedno-verztno Bitje, koje razum y volyu ima? — Telo? — Je dusha chloveka jeden düh? Zakaj?

4.

*Jeli sze du-
sha z-telom
zkoncha?*

Jeli chlovek naveke sive na zemlyi? Kam sze noszi mertvo telo? — Y kaj sze pripetcha z-telom vu grobu? — Zakaj more pako telo chloveka zegnyiti? Iz chesza je telo chlovechanzko? Jeli nema ono mesza, kerv y druge ztranke? — Po chem sive telo? Moreli anda telo prez dushe siveti? Zakaj ne? Ima dusha takaj ztranke? — Moreli dusha takaj zegnyiti y razpazti? Siveli dusha po telu? Kada telo vumre jeli onda y dusha siveti preztaje? Zakaj ne? —

5.

*Je dusha
chlovechan-
zka nevmer-
telna?*

Ali Bog more dushu chlovechanzku zkonchati? Jeli pako ovo nyegva mudrozt y do-brota dopuztcha? Kaj seliju szî vszi lyudi? Szamo za jedno vreme szrechni poztati? — Jeszu sze lyudi k-ovi selyi dogovorili? Gdo je vu chloveka selyu za vekivechnem blasenztvom zaszadil? Gdo je pochetnik narave? — Kaj haszni pako selya y hotenye, ako kakvo dugovanye nigdar imati, nemremo? — Jeszi ti zadovolyen, ako ti imati nemresh, kaj szî selish? — Jeli je Bog selyu za vekivechnem blasenztvom zapztuny vu chloveka zaszadil? Moreli dobri Bog nedusnomu chloveku kaj za muku nyemu vchiniti. — Moreli anda dusha chloveka vekoma zvelichiti sze? Zakaj? — Ako pako Bog dushu chloveka zkonchal bi, jeli bi mogla onda ona vekoma zve-

lichiti sze? — Kaj bude anda Bog vchinil? Je duša chloveka vmertelna? Zakaj nevmer-
telna?

6.

Jeli je Bog takaj ochituval, da duša *Moramoli takaj veru-*
chlovechanzka nevmertelna je? — Jeli je ono *vati, da du-*
nevmertelno, kaj vmoriti sze nemre? — *sha chlove-*
Kaj veli pako Kriztush, morejulilyudi dushu *chanzka ne-*
vmoriti? — Moramoli véruvati, da duša chlo- *vmertelna*
vechanzka nevmertelna je? Zakaj? — *je?*

7.

Kaj mora vszaki kerztcheník katholik jo- *Kaj mora*
sche *drugoch* znati y véruvati? Jeli szí ti rech *vazaki ker-*
ovu: *miloztcha* chúl? Kada tebi gdo kaj po- *ztchenik ka-*
nudi, kaj ti potrebuješ, kaj na to odgo- *tholik josche*
vorish? Dersish ti izplachúvanye drusincheta *drugoch*
takaj za miloztchu? Zakaj ne? — Jeli sze *znati y ve-*
drusinsche zapztuny zplacha? Kak sze zove on *ruvati?*
dár, kojega zaszlusimo. Miloztcha ali placha?
Kak sze zove dár, kojega ne zaszlusimo?

8.

Od koga imamo mi télo y dushu? Od *Kaj je mi-*
koga imamo chutenya y kotrige téla? — Od *loztcha Bos-*
koga imamo jakozti dushe? Gdo je vsza ztvo- *ja?*
ril? Jeszmo mi pred ztvarjanyem vre kaj
zaszlusili? Je vsze kaj imamo jedna miloztcha
Bosja? Zakaj? — Ako pako od miloztche na
zvelichenye govorenye je, jeli sze onda na-
ravzki dari razmevaju? — Kaj je miloztcha
na zvelichenye? Ako Bog dushi pomore,
moremoli za zvelichenye dobro vchiniti? Je
ova pomoch zvunzka y naravzka? — Jeli
zaszlushi greshnik od Boga pomoch? Ako té
gdo zbantuje jeli on zaszlushi tvoju pomoch?

Jeszmo mł pravichni ali greshnikì bili? Jeszmo od Boga pomoch na zvelichenye zaszlusili? Je nuterna zverhunaravzka pomoch k-zvelichenyu, jedna placha? Zakaj jedna miloxtcha? —

9.

*Jemiloxtcha
Bosja na
zvelichenye
potrebna?*

Gdo je zverhu czele narave? — Gdo je pochetnik narave? Je Bóg jedno naravzko Bitje? Zakaj jedno zverhunaravzko? — Gdo je zviralische vszega blasenzstva? — Vu chem temelyi sze anda vekivechno sivlenye? Vu vremeniteh Dobréh? Je vekivechno sivlenye jedno naravzko sivlenye? Zakaj jedno zverhunaravzko? — Jedna velika placha, kakve potrebuje zaszlusbe? — Kakve zaszlusbe potrebuje pako jedna mala placha? — Morali zaszlusba plachi primerna biti? Je vekivechno sivlenye jedna naravzka placha? Nego kakva? Moramoli takaj zverhunaravzke zaszlusbe imati? Zakaj? Jeszu pako nashe jakozti zverhunaravzke? Moremo mi iz nashih jakoztih zverhunaravzke chine poztaviti? — Je nam miloxtcha Bosja potrebna? — Zakaj?

10.

*Moramoli
takaj veru-
vati, da mi-
loxtcha Bos-
ja na Zveli-
chenye po-
trebna je?*

Jeli szlepecz bolye vidi? Jeli szlabi lese poszluje? Kakva je pako dusha nasha po gréhih poztala? Jeli je ona vida, ali, jakozt po nyih dobila? Kaj nam je anda potlam gréha ztem bolye potrebno? Moramoli takaj véruvati, da miloxtcha Bosja na zvelichenye potrebna je? Jeli veli Kriztush, prez menemorete malo vchiniti? Zakaj moramo véruvati, da miloxtcha Bosja na zvelichenye potrebna je?

PITANYE 3.

Kaj je vszakomu kerztcheniku katolikku zapovedano znati?

Razlåganye.

Zvàn gori zpomenuteh iztin josche nahadyaju sze vnoge druge, koje mi iz jedne ztrani véruvati y iz druge ztrani obvershavati moramo, da zvelichenye zadobimo. Mi moramo sze anda tersziti, da y ove znamo, drugach nye véruvati y obvershavati nebi mogli. Ove josche oztale iztine zadersavaju sze tak vu rechi piszane, kak y nepiszane. Kajti pako vszi kerztcheniki szveto pizmó, y oztale prèdane navuke Czirkve na pamet navchití sze nemreju, tak napravlyeni szû kratki izvodi iz oveh, koje vszaki lehko na pamet navchiti sze more, y ravno zato znati zapovedaju sze.

1.
Koja vszaki kerztcheniki katolik pod zapoved znati mora?

Ovi szû szledechi: 1. Veruvanye Apostolzko. 2. Molitva gozponova iliti Otecz nash. 3. Deszet zapovedi Bosje, y petere zapovedi Czirkvene. 4. Szedem szveti Shakramenti. 5. Kerztchanzka dùsnozt.

Koja kerztchenik katolik véruvati mora, ova oszebito vu véruvanyu Apostolzkó zadersavaju sze. Véruvanye Apostolzko je jeden izvod iliti zkupzpravlenye Vére navukov; y zove sze zato Apostolzko, kajti najztareshe, y od vremen Apostolov je, y ovo vszaki kerztchenik katolik na pamet znati mora.

2.
Veruvanye Apostolzko je izvod vere navukov.

Ovo szłoseno je iz đvanaizteh kotrigov iliti delih, koje vam vu szledechéh podvuchanyih vre odperteje raztolnachil būdem.

R a s g o v o r i.

1.

*Jeli sze na-
hadyaju jos-
che druge
iztine koje
kerztchenik
katholik
znati mora?*

Jeli je Bog zvuŋ gori rechenih iztin jōsche druge ochituval? Je Bog nye zapztuny ochituval? — Moramoli anda y druge iztine znati? Zakaj? — Vu koji rechi Bosji zadersavajū sze jōsche oztali navuki? Je szveto piszmo, jedna mala knīga? — Morejuli vszi kerztcheniki szveto piszmo na pamet znati? Zakaj ne? — Moreli sze pako vszaki kerztchenik kratke izvode lehko navchiti? — Morali anda vszaki kerztchenik ove kratke izvode Bosanzkih iztin znati? — Zakaj? Bili on nye drugach mogel veruvati, y ōbdersavati?

2.

*Koja szū o-
va vszakomu
kerztcheni-
ku katholiku
za znati po-
trebna?*

Gde sze zadersavaju vu izvodu nāvuki vere? Zakaj sze ovo zove veruvanye Apostol-zko? Od kojeh vremen je ovo? Gde sze zadersavaju vsza, za koja mi moliti moramo? Vu kakvi molitvi? — Gde sze zadersavaju vsza, koja obvershavati ali besati moramo? Vu kojeh zapovedih? — Koji szū nam od Jesusha prepisani zvelichenya nachini? — Jeli nēszu to szedem szveti Shakramenti? — Vu chem podvucha nasz kerztchanzka dusnozt? — Jeli mi nemoramo znati, kaj dobro ali zlo je? — Kaj je anda vszakomu kerztcheniku katholiku zapovedano znati?

I. Dokànehanye Nàvuka.

Tobiash podvucha szvôga Szina vu strahu Bosjem.

Poklamkam jednoch zlaracz Tobiash szebe vre szmeti blizu bi bil miszlił, tak dozval je szina, ter ponavlyal josche jedenput navuke, na koje vu mladozti nyega tulikoputi nagovarjal je. Szinko! rekel je on, poszluhni josche jedenput, kaj tî rekel budem, y zaszádi rechi moje gluboko vu szerdcze tvoje. Kada Bog dushu moju k-szebi vzeme, tak zakopaj telo moje. Postuj tvoju mater kak dugo ona sivela bude. — Boga vszevdily pred ochmi imaj, y chujaj sze, da nikakvo-mu grêhu neprivolish. — Budi miloszerden proti szíromaskem. — Zdersavaj sze od vszake hmanyoche. — Nedaj od oholnozti niti vu tvojem mishlenyu, niti vu govorenyu ladati sze, ar ona je zviralische vszega zkvarjenja. — Kaj nechesh, da sze tebi vchini, to y ti drugem naj vchiniti. Hvali vu vszem Boga, y proszi gâ, da on vsze tvoje chine ravna. (Tob. 6.)

Kak sze, Dragi! vam dopadaju ovi temelyiti navuki, koje jeden vmirajuchi Otecz szvojemu szinu vu szerdcze zaszaditi terszi sze? Jeli neszu ovi temely vsze Bogabojazlyivozti y pravichnozti? Y kaj bi moglo iz ovakvoga szina, koj ovakve lepe navuke iz vuzt szvojega Otcza chul je, drugo poztati, kak jedno zerczalo vsze pobosnozti y krepozti? — Otecz, najlyubleneshi Otecz, odgovoril je z-zdihavajuchem y derhtajuchem glaszom mladi Tobiash, Otecz, vsza budem vchinil, koja meni zapovedal jeszi. Kada ti vre vu grobu lesal budesh, kada kozti tvoje vre prah y pepel budû, tak ja zmishlavajuchi sze iz tvojuh rechih, nikaj od vszega onoga nezpunyeno prepuztil nebudem, kaj ti meni izruchil jeszi. Y nut, kaj szin Otczu szvomû tak szveto obechal je, to on y szveto izpunil je. — O! kak bla-

goszlavlyal je on Otcza vre na drugom szvétu postavlye-
noga! Vu kulikem postenyu dersal je on szvoju zlatu
Mater! kak miloszerden bil je on proti szíromakom!
Kak chizt y nedusen vu szvojem sívlenyu! Kak ponizen
proti vszakomu! Kak lyubezlyiv proti szvojemu blis-
nyemu, y kak povdan volyi Bosji takaj vu naj szupro-
tivneshih dogodyajih! — Z-rechjum, mladi Tobiasz
bil je sivi kip szvoga Otcza, najpravichneshi chlovek,
najverneshi szluga Bosji.

Nut, Dragi! kaj szveti návuki, y dobra temelyita
nakanenya moreju; jeli ova tak lepa pelda nebi morala
y vasz kerztchanzke rodítelye zbuditi, da y vi dragoj
detczi vashoj od vremena do vremena zpodobne návu-
ke podelyite; jeli nebi morali y vi od perve mladozti
nyu podvuchati, da sze Boga bojiju, blisnyega lyubi-
ju, y pravichno siveju; jeli nebi morali nyu konche-
mar k-tomu pridersati, da oni k-kerztchanzkomu návu-
ku, vu kojem iztine y dusnoztí vere nashe razlase-
mo, vszako vréme marlyivo dohadyaju. O kak obilno
bi vasz Bog po vashi laztoviti detczi naplachuval? Ova
zaizto na vashu batrivozt, veshelye, radozt, zadovol-
nozt, postenye y nevmetelnu diku bi odraszla, ter
szami mladi, pokorni, bogabojechi, y pravichni To-
biashi poztala. Amen.

II. Dokànychane Návuka.

Jesush poziva maluhne (Detczu) k-szebi.

Jednoch dopelyana bila szû k-Zvelichitelyu nashe-
mu Jesushu mala detcza, da on na nyu ruke poztavi,
y ovu blagoszlovi. Vucheniki, koji pri Jesushu bili je-
szu, dersali szû za nevredno, da sze mester nyihov
z-detczum bi zabavlyal, y zato odtirávali szû vsze one,
koji ovu depelyali jeszu. Ali kaj sze je pripetilo?

Poklamkam ovo Jesush bi bil zpazil, tak saloztilo je to nyega, da Vucheniki nyegvi tak nepriatelzki z-lyudmi vchinili jeszu; ter daje nyim szvoju pravichnu szerditozt zatem za zpoznati, kada nyim rekel je: Kaj chinite vi? vi odpravlyate malahne od mene, *puztite ove k-meni dojtj, y najte nyim prechiti, ar nyihovo je kralyeztvo Bosje.* (Marc. 10.) Oni szu najprikladneshi, da navuke mojega Evangeliuma primeju, y zkrovnoztj kralyeztva Bosanzkoga, koje vam tak teske za razmeti vidijusze, z-poniznoztjum veruju, y, moju zapoved z-podlosnoztjum izpuniju. Dapache ja vam velim, koj kralyeztvo Bosje, tojezt moju veru, mojega Evangeliuma kakti dete neprime, on nedojde vu ovo, on neje pravovernik, on neje kerztchenik. Na to objel je Jesush malahnu detczu, poztavil na nye ruke, y dal nyim szvoga blagoszlava.

Dragi! kakvi lepi navuki zadersavaju sze za nasz vu ovem pripetchenyu! Navuki za Roditelye! Navuki za vsze lyudi. Navuki za Roditelye? Ali jeli morebiti vi kerztchanzki Roditelyi poleg lyubezlyivoga zvanya vashega Odkupitelya, po kojem on malahnem k-szebi dojtj zapoveda, dusnozt nevidite, da y vi vashu detczu zaran k-Jesushu pelyati, hochu rechi, ovu k-marlyivomu y pazlyivomu dohadyanyu k-nashemu kerztchanzkomu navuku pridersati morate? Ar vezda vu prvi dobi szvoje mladoztj szu ona najprikladnesha, szeme Bosanzkih navukih vu pamet pobrati, zkrovnoztj Kralyeztva Bosjega navchiti sze, y z-dusnoztjami Vere zpoznati sze. *Puztite malahne k-meni dojtj, y ne prechite nyim, ar nyihovo je kralyeztvo Bosje.* Ali y vi, moji Poszlushitelyi! koji goder jezte, jeli nevidite vu iztem ovem zvanyu Malahneh y vashu dusnozt, da navuke vere ponizno primete? Premiszlite jedenput priproztochu szerdcz malahneh, oni vsze veruju, kaj sze nyim veli, oni nemudruju zverhu oveh, oni dersiju

vsza, koja chuju, za iztinita y nedvojna, oni podla-
seju vu vszem szvojega razuma prestimanyu onoga,
koj nye vu dugovanyih podvucha. akoprem pamet
nyihovu prekorachuju. Y ravno ovakva mora biti vé-
ra kerztchenika katholika. O dabi y vi vszigdar zkrov-
nozti kralyeztva Bosjega z-priproztotchum szerdca veru-
vali! o dabi y vi prez vszakoga mudrùvanya vszigdar
nàvuke Zvelichenya, y vére nashe poszlushali! o dabi
y vi vashega razuma vu vszeh vérì podlosili, koja zver-
hu vashe pameti jészu; — *ar ja vam velim, koj kra-
lyeztvo Bosje kakti dete neprime, on nedojde vu ovo.
Amen.*

III. Dokànychanye Nàvuka,

*Dùsnozt Roditelyih, da szvoju detczu za-
ran vu pervih temelyilih navukih vére
podvuchiju.*

Roditelyi, Dragi! vu perveshih vremenih bili szù
jedini navuchitelyi detcze szvoje, y nészu sze nahadya-
le druge skole, kak hise Roditelyih. Kulika bila je ra-
dozt, jednoga ztaroga Otcza, jednu pobosnu Mater
ztanovite vure vu szredini detcze szedeche videti, y
ove poszlushati, kak oni od vklananya Bogu, od do-
brochinztvih ovoga, od Jesusha razpetoga, od molitve,
od zapovedih Bosjeh, od szvéteh Shakramentov, ovu
podvuchali jészu! Ztoprav potlam pochele szù sze ob-
chinzke skole podigavati, y vu oveh navuchitelyi po-
ztavlyati sze, kojem podvuchanye mladozti izrucheno
bilo je. Metemtoga jeli vasz morebiti, o Roditelyi! od
ove dùsnozti, da detczu vashu vu pervih temelyih na-
vuka Kerztchanzkoga podvuchite, oszlobodyene imati
hoteli jészmo? Ne zaizto; po tom szamo opraviti sze

je hotelo to, da sze ov oszebujni poszel razdeli, y da sze morebiti ono nadomezti, kaj vi szami vchiniti nêz-te mogli. Vi jezte y oztanete josche vszigdar pervi navuchitelyi y Apostoli detcze vashe, kojeh dusnozt je, da vu hisah vasheh navuchate, kak Biskupi ali Plebanushi vu Czirkvi navuchati moraju. Zato vasz y opominya sz. Pavêl Apostol, kada vu liztu na Efeziancze ovak pishe: *Otczi! odhranite detczu vashu vu navuku y ztrahu Bosjem* (Ephes. 6.) Vuchite nyu vu pervi dobi mladozti Boga ztvoritelya poznati, y preporachajte nyoj, da sze iz nyega guzto puti naj zmiszliju. Vuchite nyu krisati sze, y z-pobosnoztjum ime trojjednoga Boga zgovarjati; povechte nyoj, da Jesush Kriztush druga Bosanzka pershona, iz lyubavi proti lyudem, chlovek poztal, y na krisu vumerl je. Pripovedajte nyoj ona velika veszelja, koja nyu vu nebu chakaju, ako pobosno y krepoztno sivela budû; y grozite sze nyoj z-vekivechnemi kastigami, z-kojemi Bog hmanye y razvuzdane lyudi kastiguje. Zaszadite nyoj na ov nachin ztraha Bosjega, lyubav k-krepozti, y merzenye na grehe vu vremenu vu szerdca, ter vuchite nyu zadnich ztanovite molitve, k-kojeh zvershavanyu nyu rano y vecher oshtro pridersite; *Otczi odhranite detczu vashu vu navuku y ztrahu gozponovem.*

Szudite vezda szami, Dragi! kaj od oneh Roditelyih dersati moramo, koji ôvu tak oszebujnu dusnozt zapuztchaju, ter szvoju detczu kakti nerazumne ztvari, prez navuka nahrzeti puztchaju? Ovakvi Roditelyi nêszû Otczi, oni szû vnogobolye vmoritelyi szvoje detcze, pokehdob oni zrok jeszu, da po prepuztchenyu pervih temelyih Vére, hmanyôche predi nego krepozti vu szerdczu detcze zbudijusze, y vu oveh razteju. O kak tesko bude jednoch ovakvem Roditelyom! ar Bog iz nyihoveh ruk potrebuval bude dushe nyihove. O! dopuztite anda, kerztchanzki Roditelyi! da vam opomen-

ka Apostola josche jedenput ponavlyam, odhranite det-
czu vashu od mladozti vu navuku y vu ztrahu Bosjem.
Ne budite ztem zadovolyni, da nyu szamo pred Czirk-
vu donezti, ovde nyu z-vodum kerzta poszvetiti, y vu
naruchaj Czirkve prijeti dali jezte, nego budite taki pri
pervom odpiranyu nyihovoga razuma nyihovi prvi
navuchitelyi, podvuchite nyu vu pervih temelyiteh iz-
tinah vere kerztchankke, budite velim nyihovi prvi
navuchitelyi, kak poleg narave nyihovi Otczi postali
jezte. *Otczi! odhranite vashu detczu vu navuku y vu
ztrahu Gozponovem. Amen.*

NÀVUK 3.

Od pervoga kotriga Vére. Od Boga.

PITANYE 1.

Kaj je Bog?

Rasláganye.

1.
*Bog je naj-
vekshi Go-
zpon, vreden
da nyega
poznati sze
navchimo.*

Pervi kotrig vére zgovarja sze ovak :
*Ja vérujem vu Boga Otcza vszamogùchega
ztvoritelya neba y zemlye. Vi vre znate,
Detcza moja! da jeden Pochetnik vszeh ztva-
rih nahadya sze, koga mi Boga ozívamo.
Tak je, dragi! Bog napravil je vsze ztvári
na nebu y na zemlyi, vsza vu nebu y na
zemlyi od nyega dohadyaju, on je najvek-
shi Gozpon. Nasha dusnozt je anda, da nye-
ga poznati sze navchimo. Ja josche danasz*

nyega poznati vasz vuchil budem, y vam povedal, kaj Bog je.

Ali vi hochete morebiti Boga z-vashemi telovnimi ochmi videti, kak kojega drugoga gozpona videti morete, onda zaizto vam ovoga pckazati ne bi mogel, ar nigdo josche néje Boga z-telovnimi ochmi videl, ali z-telovnimi chutenyi pochutil, kajti on tela néma. Ali akoprem Bog te a néma, tak on je vendar nekaj, ar drugach on szveta nebi bil mogel napraviti: y nut! kak mudro, kak lepo, kak naredno je on ovoga vredil, on mora anda jako velikoga, dopache najzversheneshega razuma ali takaj najzversheneshu volyu imati, kajti on nyega tak lépo, tak dobro vrediti je hotel. Vre pako Bitje, koje razum y volyu ima, téla pako néma, imenujemo *Dúha*. Kajti pako Bog najzversheneshega razuma y volyu ima, téla pako néma, tak je on chizti Dúh.

2.
Bog je chizti Dúh.

Prez dvojmbé budete vi takaj hoteli znati, od koga Bog je, pkehdb nijedna ztvar na szvétu ód szebe szama néje, nego jedna od druge dohadya. Ali chujte: Bog od nikakve ztvari nedohadya, kajti on vsze ztvari napravil je. Neli, Dragi! Malar nedohadya od kipa, y mester od rukotvora; pkehdb malar kipa, y mester rukotvora napravil je; ravno ovak nemre niti Bog od nijednoga ztvořenya izhadyati, kajti on vsza napravil je; on je anda szam od szebe.

3.
Bog je szam od szebe.

Ali kak dugo je vre Bog? Morebiti tak dugo kak czeli szvét, kak nebo y zemlya? Jeli ne Dervodelavec zsigdar predi tú, kak hisa? Bog ztvoril je szveta, on anda takaj

4.
Bog je bil vszako vreme.

pred szvetom moral je biti. Ter kak dugo je Bog pred szvetom bil? Nigda nyemu né dal pochetka, kajti od nikoga vchinyen néje, on takaj pripetcze naztati né mogel, ar ako szvét pripetcze naztati né mogel, tak zaizto y Bog, koj vnogo prestimaneshi je od czeloga szvéta, pripetcze naztati né mogel; ako pako Bog pripetcze naztal néje, ako on od drugoga vchinyen nije, y vendar pred szvetom vre bil je, tak moral je vszigdar biti.

5.
Bog takaj vszigdar bude.

Bog takaj buduch vszigdar bude, ar Bog sive za szê, y nepotrebuje za zdersavanye szvoje nikakve ztvári; ar on sível je predi, nego y kaj bilo je. Nyemu takaj nikaj naszkodeti nemre, ar on je Gozpon jakoztih. Kaj pako vszigdar bilo je, y vszigdar bude, to zovemo *vekivechno*, Bog je anda vekivechen.

6.
Bog je Bitje najzvershesneshe.

Vszako dugovanye med ztvorjenemi ztvármí ima oszebíta znamenya na szebi, po kojeh ovo poznamo, y od drugeh razluchavati moremo. Jedno je prestimaneshi, lepshe, zversheneshe kak drugo. Ovak vu peldi: drevo je zversheneshe od kamena, ar kamen né tak nápravlyen, da on szóka íz zemlye bi vlekel, ter tak raszel, kak drevo, trava. Zopet zvéri szu zversheneshe od trave, ar zvéri imaju jakozt genuti sze, hoditi, leteti, chutiti, trave ova né maju. Zopet lyudi szû zversheneshi kak zvéri, ar lyudi imaju pamet, razum, koja zverjam faliju. Nut! ovak razluchne jeszu ztvári szvéta; vszaka ima ztanovita znamenya y zvershenozti. Ali gdo je pako vszem ztváram szvéta ovakve zvershenozti podelyil? neli Bog?

Nemorali anda Bog vnogo lepshi y zversheneshi biti, kak vsze ztvári szvéta? Y kak

zvershen mora Bog biti, pokehdob on vsza ima, y nyemu nikaj pomenkatì ali pofaleti nemre, kajti on od nikoga, nego od szebe szamoga je, anda od szebe szamoga vsze takaj ima! — Bitje anda, koje vsze naredne y moguche zvershenozti ima, imenujemo *najzversheneshe*, Bog je anda Bitje najzversheneshe.

Bog vu vszeh szvojeh zvershenoztih néma megye ali graju. ^{7.} *Bog je prez koncza.* Mi, Dragi! jeszmo ztëshnyeni zpreseni, mi nemremo vsza videti, razmeti ali vchibiti. Nashe ochi nevidiju dalko, nashe ruke y noge frisko zatrudiju sže, nash razum nemre vsza preszechi y razmeti. Ali Bog nema vu szvojih zvershenoztih nikakve megye: pokehdob od nikoga, kakszam od szebe je. Ono Bitje pako, koje nikakve megye néma, imenujemo *prez koncza*; Bog je anda vu szvojih zvershenoztih prez koncza.

Bog nigdar premeniti sze nemre; on niti bolshi, niti gorshi poztati nemre. ^{8.} *Bog je nepremenlyiv.* Bog anda néje kak lyudi, koji danasz ovak, zutra pako vre drugach jeszu; on je szam od szebe najzversheneshe Bitje, koje prez koncza vu szvojih zvershenoztih je, iz nyega niti kaj bolshega, niti kaj gorshega poztati more; anda je nepremenlyiv.

Ravno iz ovoga zroka, kajti Bog najzversheneshe, y vu szvojih zvershenoztih jedno Bitje prez koncza je, tak szledi, da szamo ^{9.} *Szamo jeden je Bog.* jeden Bog je. Vuchenik, koj vishe szebi jednake ima, najbolshi ozvati sze nemre, y ako anda Bog jednoga szebi jednakoga bi imal, ako vishe kak jeden Bog bisze nahadyal, tak

nebi bil on najzversheneshe Bitje: ali Bog szebi jednakoga imati nemre, anda szamojednen Bog biti more.

R a z g o v o r i.

1.

*Gdo je naj-
veksi Go-
zpon vszeh
ztvarih?*

Kak sze zgovorja pervi kotrig Vére? Jeli je Bog? Morajuli ztvari ovoga szveta pochetnika imati? Zakaj velish anda, da jeden Bog je? — Ako Boga nebi hilo, bili ztvari szvéta hile? — Gdo je ztvari szveta napravil? Jeszuli anda ztvári szvétâ poszel Bosanzki? Zakaj? — Kaj miszlish ti, jeli poszel dohadya od mestra, ali mester od poszla? Bili bil poszel, ako mestra nebi bilo? Gdo je poszla napravil? — Zakaj anda poszel od mestra dohadya? — Od koga dohadya-ju anda vsze ztvari szveta? — Zakaj od Boga? Je dusnozt nasha Boga poznati?

2.

Je Bog Duk?

Moremoli mi Boga takaj tak videti, kak drugoga kojega Gozpona? — Gdo je Boga videl kada, ali ovoga sze teknu? — Moremoli Boga videti, ali ovoga sze teknuti? — Ima Bog télo? Zakaj ne? Je Bog zato Nikaj, kajti tela néma? Ako Bog nikaj nebi bil, bili on bil mogel szvéta napraviti? Y kak je Bog szveta napravil? Je on ovoga lepoga y narednoga nachinil? — Imali anda Bog razuma? kakvoga? Zakaj najvekshega, najzversheneshega? — Ako pako Bog ovoga szvéta tak lepoga y narednoga nebi bil hotel nachiniti, bili on bil onda tak lep y narenden? —

Jeli je anda Bog szveta ovoga tak lepoga y narednoga imati hotel? Imali anda Bog volyu? Kakvu? Zakaj najzversheneshu? Kak sze zove jedno Bitje, koje razuma y volyu ima, téla pako néma? — Je Bog anda jeden chizti Duh? Zakaj?

3.

Jeli vu szvétu dohadya koja ztvar *Je Bog szam od szebe?* szama od szebe? Jeli anda jedna od druge dohadya? — Od koga dohadyaju pako vsze ztvari? Jeli y Bog od koga dohadya? — Jeli ti mislish da malar od kipa dohadya? Zakaj ne? — Gdo je kipa napravil? — Moreli anda Bog od kakve ztvorjene ztvari dohadyati? Zakaj ne? Jeli né Bog vsze ztvari ztvoril? — Y ako Bog od nikakve ztvari nedohadya, od koga je anda on? Zakaj od szebe szamoga?

4.

Gdo pervlye na szvetu biti mora, jeli *Jeli je Bog vszigdar bil?* dervodelavecz, ali hisa? Zakaj dervodelavecz? Gdo hisu dela? — Gdo je szvéta napravil? Gdo je anda pred szvétom bil? Zakaj Bog? — Jeli je pred szvétom takaj drugi gdo vre bil zvun Boga? Je Bog od koga napravlyen? Zakaj ne? — Ali morebiti je Bog pripetcze naztal? Je szvét pripetcze naztal? — Gdo je prestimaneshi od szvéta? — Zakaj né Bog pripetcze naztal? Kak dugo je pako bil Bog pred szvétom? Zakaj vszigdar? Je Bog od koga vchinyen, ali je on pripetcze naztal?

5.

Jeli Bog naveke bude? Jeli Bog potre- *Jeli Bog naveke bude?* buje kakvu ztvar za szvoje zdersavanye? —

Jeli Bog né vre predi sivel, nego josche y kaj bilo je? Moreli Bogu kaj naskodeti? Gdo je Gozpon vszeh jakoztih? — Zakaj anda Bogu nikaj naskodeti nemre? Kaj pako vszigdar bilo je, y vszigdar bude, kak to imenujemo? — Je Bog pako vszigdar bil, y jeli on vszigdar bude? — Je anda Bog vekivechni? Zakaj? —

6.

Je Bog zvershen?

Moremoli mi ztvári szvéta jednu od druge razluchavati? — Znash ti kamena od trave, chloveka od neme sivine razluchavati? — Jeli ima vszaka ztvar szvoja znamenya? — Jeszu vsze ztvári jednako lepe, y zvershene? kaj je zversheneshe kamen, ali trava? — Zakaj trava? Jeli je pako trava tak zvershena kak nema ztvar? Zakaj né? Imajuli trave ali dreva chutenya, morejuli sze ova gibati od mezta do mezta? — Jeszuli pako neme ztvári tak zvershene kak chlovek? Kaj fali nemem ztvarjam? — Gdo je pako vszem ztvarjam ove zvershenozti podelil? — Gdo mora anda vnogo zversheneshi biti, kak vsze ztvári szvéta? Zakaj? — Kada je pako koja ztvar zvershena? V. p. Da bi ti szamo jedno oko, ali jednu ruku imal, bili ti bil zvershen? Kaj bi tebi falelo? — Moreli Bogu od zvershenoztih kaj pomenkati? — Od koga je Bog? Od koga ima anda Bog szvoje zvershenozti? — Kakvo Bitje je anda Bog? Zakaj?

7.

Je Bog prez koncza?

Vidishli ti preko brega? Ali jeli moresh ti vishe Czentov zdignuti? — Jeszi anda vu tvojih jakoztih ztishnyen y zpresen? Zakaj?

Od koga? Od tebe szamoga? Od koga je pako Bog? Moreli y Bog megye imati? Zakaj né? kak sze zove ono Bitje, koje megye ima? Dokonchano? (finitum) Imali Bog vu szvojih zvershenoztih megye? Je anda Bog vu szvojih zvershenoztih prez koncza? Zakaj?

8.

Je Bog premenlyiv? Zakaj ne? — Mo- *Je Bog ne-*
reli Bog bolshi ali gorshi poztati? Zakaj ne? *premenlyiv?*
Kaj je Bog? — Jeszu lyudi takaj najzvershe-
neshe Bitje? — Zakaj sze anda lyudi tuliko-
puti premenyaju? —

9.

Moreli Bog zpodobnoga szebi imati? — *Kuliko je*
Je vishe Bogov? Zakaj je szamo jeden Bog? *Bogov?*
Zakaj nemre pako Bog szebi zpodobnoga ima-
ti? Bili ti bil najbolshi vuchenik, ako ti zpo-
dobnoga szebi bi imal? — Bili Bog bil Bitje
najzversheneshe, ako on zpodobnoga szebi bi
imal? — Kaj je pako Bog? — Zakaj ne-
mre anda Bog zpodobnoga szebi imati?

PITANYE 3.

*Koje zvershenozti iliti lastovitozti Bosje imamo
oszebujno vpamet vzeli?*

Razláganye.

Vre ztê chuli, m. Dragi! da Bog neiz-
brojeno vnoge lastovitozti y zvershenozti ima
koje vsze iz nyegvoga Bitja izzviraju, y zmed
oveh szledeche oszebujno vpamet vzeti mo-
rate.

1.
*Bog je vsza-
moguchi.*

Bog né je szvéta z-telovnemí rukamí, ní-
ti z-orudeljem, níti z-pomochjum drugeh
ztvoril; ar Bog téla néma, y pred szvétom
né bilo orudelja níti pomochnika, Bog je an-
da szvéta po szvoji laztovíti volyi ztvoril. Der-
vodelavec, koj vre vnoge hise podigel je,
zaizto josche vishe podignuti hude mogel.
Bog vre vnoge ztvári je vchinil, on anda prez
dvojmbe josche neizbrojene vchiniti bi mo-
gel. Onoga, koj vsze z-laztovítum szvojum
volyum ztvorítí more imenujemo vszamogu-
chega: kada anda Bog vsze z-szvojum lazto-
vítum volyum ztvorítí more, tak je Bog je-
den vszamoguchi ztvoritel.

2.
*Bog je naj-
mudreshi.*

Bog je najmudreshi. Mi imenujemo mu-
droga onoga, koj dobroga czilya ima, y k-
tomu naj prikladneshe náchine zbira. Czily
je ono, kaj zadobítí selimo; náchin je ono,
po chem kaj zadobiti selimo. Betesnik seli
zdravje zadobiti, zdravje je anda nyegov
czily; da ovo zadobi, tak potrebuje on
vrachtvo; vrachtvo anda je nachin. Bog pri-
zvarjányu szvéta né imal drugoga czilya,
kak szvoje postenye, y nashe zvelichenye;
jeli ova nészu naj bolshi czilji? Premiszlímo,
moji Dragi! jedno malo ztvorjene ztvári, y
budemo zpoznali, da vsze kak naj bolye na
zvelichenye lyudih y na diku Bosju czilyaju.
Zemlya donasha száda, y da chlovek nigdar
nikakvo pomenkanye nepochuti, tak ovoga
vszako leto donasha. Szuncze je, da szvetlozt
y toplinu daje, y da od szuncza vsza ne zgo-
riju, tak je desdy, koj móchi y hladi. Neme
ztvári neszlusíju chloveyku szamo za hranu,
nego y za opravu y oztalu dvorbu, kak za

oranye, vosnyu, y. t. d. Zrak szlusi za od-
dihavanye; drévo, kamenye za delanye his
y za ogeny; Chutenya chloveku szlusi ju, da
z-nyimi videti, chuti, dihati, kushati y pi-
pati more; kotrigi pako szû za vszakoverzna
hasznovita gibanya. Vsze ztvorjene ztvari
nazveztchaju Boga, one szlusi ju za diku Bos-
ju. Bog anda je najmudreshi, kajti on najbol-
she Czilye ima, y k-ovem najbolshe nachine
potrebuje.

Bog je najbolshi. Mi imenujemo dobroga ^{3.}
onoga, koj nam kakvo dobro izkasuje. Lyu- *Bog je naj*
di iztina je, nam vnogo dobro chiniju, oni *bolshi.*
delaju nashe hise, nashe oprave, oni pri-
pravljaju nashe jeztvine, oni nam pomaseju,
y nasz podvuchaju. Metemtoga ako Bog zem-
lyu nebi bil ztvoril, gde bi za delanye his
potrebna vzeli? Ako Bog na zemlyi nikaj
razti nebi puztil, odkud bi jelo, y opravu
imali? Ako Bog pervoga chloveka nebi bil
podvuchil, gdo bi nasz podvuchal? Ako Bog
lyudem jakozti nebi bil dal, kaj bi mogli
oni vchiniti? Prez Boga nemreju lyudi ni-
kaj dobroga vchiniti, vsze dobro dohadya
anda od Boga. Bog szvoje szuncze nepuztcha
za jednoga chloveka, nego za vsze izhadyati;
on ne puztcha száda zemlye za jednoga, ne-
go za vsze razti; on nedaje jednomu, nego
vszem potrebne jakozti. Bog anda je najbol-
shi, kajti vszem lyudem vsze dobro podelyuje.

Bog vsza zdersava. Dugovanye zkoncha ^{4.}
sze, ako ovo ne zdersava sze. Metemtoga, *Bog vsza*
moja Detcza! vi vidite, da nebo y zemlya *zdersava.*
josche zkonchala sze nészu; dapache, zverhu
chesza zadozta chuditi sze nemremo, szuncze,

meszcz, zvezde, zemlya na nichem ne ztoji-ju, miti ne visziju na lanczih ali vusinczih, ter vendar neporushiju sze, vnogo holye ova vszigdar imaju szvojega narednoga techaja. Jeli ova morebiti szama szebe zdersavaju? Ona nészu szama szebe napравила, ona anda y szebe szama zdersavati nemreju. Jeden dervodelavecz more hisu vu dobrem ztalishu zdersavati, kajti on ovu sham napравил je. Bog vchinil je vsza na nebu y na zemlyi, on anda vsza zdersava.

5.
*Bog je vszi-
gde nazo-
chen.*

Bog je vszigde nazochen. Nijeden chlo-vek nikaj vchiniti nemre, ako on onde néje, gde kaj vchiniti ima. Kak bi mogel dervodelavecz krova pokrivati, ako on na krovu nebi bil? Ali kak bi sze vi vu skoli kaj navchiti mogli, ako vu skolu nebi hodili? Nut! Bog vszigde poszluje, kajti on vsze na nebu y na zemlyi, y najnuternesha szercz nashih zdersava; Bog je anda vszigde, takaj vu najnuterneshem szercz nashih, nazochen.

6.
*Bog je vsza-
znajuchi.*

Nigdo nebude dvojil, da mester koj vure dela, nebi znal, kuliko kotachev vu vuri nahadyaju sze. Nyemu nészu szamo vekshe, nego y najmenshe ztranke vure znane, kajti on vuru napравил je. Bog napравил je szvéta; on ne napравил szamo vekshe ztranke szvéta, kakti szuncze, meszcz, zvezde, lyudi, nego y najmenshe; najmenshe szemenzko zerno, naj menshega cherva je on napравил; on vsza zdersava, takaj najmenshe ztvari szvéta; tak mora on takaj za vsze ztvari znati. On je vszem ztvorenyam vu najnuternesheh nazochen, on zna anda vsza mishlenya y chinenya ztvorenyih. Lyudi némaju neizmerno-

ga razuma, ter vendar vnoga preszèchi moreju. Bog ima neizmernoga razuma, on vidi vsze okolicze y laztovitozti, czeloga zaveza ztvarih, on zna anda ne szamo, kaj pripetcha sze, ali vre vchinyeno je, nego takaj, koja pripetila sze budd, Bog more vsza vchiniti, kajti vszamoguchi je, tak mora anda takaj vsze ztvary znati. Nut jednoga, koj vsza zna, imenujemo vsza znajuchega; Bog zna vsza presheztna y buducha, on zna koja sze vu iztini pripetila, y koja sze josche pripetiti moreju, Bog je anda vszaznajuchi.

Bog je naj szveteshi. Mi imenujemo szvetoga onoga, koj pravo dobro lyubi, ter pravo zlo odurjava. Lyudi nészu vszigdar pobosni y szveti, kajti pravo dobro vszigdar nezpoznavaju, nelyubiju. Bog je vsza znajuchi, on zpoznavava pravo dobro y pravo zlo; Bog je neizmerno dober, on lyubi pravo dobro, y odurjava pravo zlo; anda Bog je naj szveteshi.

7.
Bog je naj
szveteshi.

Miloszerden y miloztiven je on, koj sze nevolji drugoga szmiluje. Najveksha neszrecha ali nevolja za nasz je gréh, kajti nasz ov nepriatelye Bosje, y krivcze vekivechne szmer-ti chini. Vi znate, kulika jeden dobri Otecz terpi, ako detcza nyegva vu potrebochi y nevolji poztavlyena jeszu; kuliko pomiluvanye on z-nyimi ima, y kak sze terszi, da sziomaskoj detczy szvojoj pomore. Y ako taki dete Otczu nepokorno bilo je, ter ovo z-saloztjum y z-szuzami k-otczu dohadya, tak opraztcha Otecz detetu szvomu, y veszeli sze, da sze ovo pobolshati hoche, ter ovo vu miloztchu szvoju nazad prime. Jeli Bog

8.
Bog je naj
miloszerd-
neshi.

proti detczy szvoji drugach sze zadersaval bude? Ne zaizto! ar David prorok odperto velli: *Kak sze Otecz detczy szvoji szmiluje, ovak szmiluje sze takaj Gozpon onem, koji sze nyega bojiju.* (Psal. 102.) Bog je anda naj miloszerdneshi.

9.
*Bog je naj
iztiniteshi.

Koj kakvo dugovanye drugach pripoveda nego ono vu szebi je, on néje iztinit. Szamo onoga moremo iztinitoga ozvati, koj dugovanye kakvo onak pripoveda, kak ono vu iztini je. Mi od narave imamo gibanye na iztinu; ar mi selimo vsza onak znati, kak ona vu iztini jeszu. Bludimo mi, ali zapelya nasz drugi vu bludnozt, tak poztajemo nezadovolyni. Lyudi nemreju vszigdar iztinu povedati, kajti vszigdar iztinu neznaju: oni necheju vszigdar iztinu povedati, kajti szvojjasznost lyubiju, y veszeliju sze, ako drugoga vkaniti y napelyati moreju; lyudi nészu anda vszigdar iztiniti. Pri Bogu druga zpasujemo. Bog more iztinu govoriti, ar on je vszaznajuchi. Bog lyubi iztinu, ar on zaszadil je vu nasz nagnenye k-iztini. On takaj ne ische szvoju haszen, ar on od nasz nikaj nepotrebuje. On ne veszelisze, ako mi vkanjujemo sze, ar on je zevszema dober proti nam, on hoche anda vszigdar iztinu govoriti. Kada anda Bog vszigdar iztinu govoriti more, y hoche, tak zaizto nebudete dvojili, detcza moja! da Bog najiztiniteshi je.

R a z g o v o r i.

1.

Je Bog
vszamogu-
chi?

Gdo je szvéta ztvoril? — Je Bog szvéta z-télovnemi rukami napravil? Zakaj ne-

Ima Bog télo? — Je Bog orudelje, ali pomochnike potrebuval, kada je szvéta napravil? — Zakaj ne? Jeli szû sze ova pred szvétom nahadyala? — Z-chem je anda Bog szvéta napravil? Zakaj z szvojum laztovitum volyum? — Moreli jeden dervodelavecz (Bimmermann) szamo jednu hisu napraviti? Jeli né Bog vre tulike ztvari napravil? Jeli bude anda on y josche vishe napraviti mogel? — Kak ozivamo onoga, koj vsza z-szvojum laztovitum volyum ztvoriti more? Kak moguchega? Po chem Bog vsza ztvori? Kak moguchen je anda Bog? Zakaj vszamoguchega? —

2.

Koga ozivamo mudroga? V. p. jeden hoche krazti, je ov muder? Zakaj ne? Ima on dobroga czilya? Ali v. p. jeden hoche zkomadom dreva piszati, je ov muder? Zakaj ne? Jeli szî ovakov zebira naj bolshega nachina k-piszanyu? Ako gdo dobroga czilya néma y dobroga nachina neizbira, je ovakov muder? Gdo anda? Kaj to znamenuje: *Czily* Kaj hoche betesnik zadobiti? Koj je anda czily betesnika? — Ako kaj zadobiti hochemo, kak to imenujemo? — Kaj to znamenuje: *nachin*? Kaj potrebuje betesnik, da ozdravi? Je vrachtvo nachin? Zakaj? Kada anda kaj chinimo, da czilya zadobimo, kak sze to zove? — Zakaj je Bog szvéta ztvoril? Na chije postenye y diku? Na chije zvelichenye? — Je imal Bog najbolshega czilya? Zakaj? — Jeli pako szlusiju ztvari szvéta na zvelichenye lyudih, y na diku Bosju? K-chemu je zemlya? kaj donasha ona

Kaj je mudroz, czily nachin?

lyudem? — Ako pako nikaj nebi priraszlo, kak dugo bi mi sivali? K-chemu je anda pri-razt? — K-chemu je szuncze? Kaj nam ovo daje? Nikakvu szetlozt y toplinu? Ako pako vszevdily szuncze bi szvetilo, kaj bi sze onda pripetilo? Bili sze zemlya razhladila, y rodovita poztala? — Po chem sze zemlya razhla-dyuje, y plodna poztaje? — K-chemu je desdy? — K-chemu je zrak? Moreszli ti dihati prez zraka? — K-chemu szû chute-nya? Móreshli prez chuteeny videti, chuti? K-chemu szû kotrigi? Moreszli sze prez oveh pregibati? — Vsze ztvorjene ztvary, koga nam davaju za zpoznati? K-chemu szû anda vsze ztvary? — Imali anda Bog szamo naj-bolshega czilya? Jeli on nezбира takaj naj-bolshe nachine k-ovomu? Gdo je anda naj mudreshi? Zakaj, Bog?

3.

*Je Bog naj
bolshi?*

Gdo je dober, jeli on, koj tebi kaj zlo-ga chini? Jeli nam lyudi dobro chiniju? Gdo dela hise? Gdo dela oprave? Gdo nasz pod-vùcha? Ako pako Bog zemlyu nebi bil ztvò-ril, jeli bi mogli onda lyudi hise delati? — Ako Bog na zemlyi nikaj razti nebi puztil, bili sze mi mogli hraniti, opravlyati? — Ako Bog pervoga chloveka nebi bil podvuchal, gdo bibil druge kaj navchil? — Od koga imaju lyudi szvoje jakozti? — Morejuli lyudi prez Boga kaj vzeti, ali napraviti? — Od koga dóhadya vsze dobro? Zakaj od Boga? — Je-li Bog szamo tebi dobra podelyuje? Komu josche? — Gdo je anda zevszema dober? Zakaj, Bog?

4.

Jeli jedno dugovanye dugo terpi, ako *Gdo vsza zdersava?*
ovo ne zdersavamo? — Jeszu sze nebo y
zemlya vre kada zkonchala? Jeli szuncze na
chem ztoji? ali jeli zemlya morebiti na vu-
sinczu viszi? — Jeli sze nebo y zemlya sza-
ma zdersavaju? — Zakaj ne? Jeszu sze sza-
ma napravila? — Gdo je vsza napravil? Gdo
vsza zdersava? Zakaj, Bog?

5.

Jeli more dervodelavec na krovu po- *Je Bog vszi-
gde nazo-
chen?*
szlupati, ako on gori nebi bil? — Ako gde
kaj delamo, jeli moramo tam nahadyati sze?
Gdo vsza zdersava na nebu y na zemlyi? —
Gde je, anda Bog nazochen? Zakaj vszigde?
Jeli Bog y najnuternesha szercz nashih zder-
sava? — Je Bog vu najnuterneshem szercz
nashih? Zakaj?

6.

Kaj miszlish, jeli zna mester koj vure *Je Bog vsza
znajuchi?*
dela, kuliko kotachev vu turi nahadyaju sze?
Jeli on szamo za vekshe kotache zna? — Za-
kaj zna on za vsza, koja vu turi nahadyaju
sze? Jeli moremo ono znati kaj szami napra-
vili jeszmo? Gdo Vure szlase? — Jeli je Bog
szamo vekshe ztravi szveta napravil? — Y
gdo zdersava takaj najmenshe ztvari szveta?
Gdo mora anda za vsze ztvari szveta znati? Za-
kaj Bog? — Gdo je vszem ztvarjam najnu-
terneshe nazochen? Gdo zna vsza mishlenya
y vsze chine lyudih? Zakaj Bog? — Imajuli
lyudi nepreszesnoga razuma? Morejuli oni
zato vnoga prevideti? Gdo ima nepreszesno-
ga razuma? Gdo previdi vsze okolicze y la-

ztovitozti ztvarih? Znali Bog takaj kaj buduch pripetilo sze bude? Zakaj? — Gdo more vsze moguche ztvary napraviti? Gdo je vszamoguchi? — Gdo mora vsze moguche ztvary znati? Zakaj Bog? — Kak imenujemo onoga, koj vsze zna? — Gdo zna vsze presheztne y buduiche ztvary? — Je Bog vszaznajuchi? Zakaj? —

7.

*Je Bog naj
szveteshi?*

Koga imenujemo szvetoga? Onoga, koj dobro odurjava, zlo pako lyubi? — Jeli lyudi vszigdar pravo dobro zpoznavaju? Jeli oni ovo y vszigdar lyubiju? — Jeszu lyudi vszigdar pobosni y szveti? Zakaj ne? — Gdo je pako vszaznajuchi? — Gdo zna pravo dobro? Zakaj Bog? — Gdo je zevszema dober? — Gdo lyubi anda pravo dobro? — Y gdo je anda najszveteshi? Zakaj Bog? Kaj on lyubi, kaj pako odurjava?

8.

*Je Bog naj
miloszerd-
neshi?*

Je Bog takaj najmiloszerdneshi? Koga dersimo za miloszerdnoga? Kada sze gdo vu nevolji poztavlyenomu neszmiluje, je ovakov miloszerden? — Koja je najveksha nevolya za nasz lyudih? — Kaj nasz chini nepriatelye Bosje, y krivcze vekivechne szmeriti? — Jeli dobri Otecz ima pomiluvanye zszvojum nevolynum detczum? Jeli je to nevolya za dete, ako ovo Otcza szvoga zbantuje? — Kaj chini pako otecz, kada dete falingu szvoju zpoznaje, y zaradi ove posaluje sze? Jeli Otecz ovakvomu detetu rad opraztcha? — Néli y Bog jeden dobri Otecz? Jeli ne on zevszema dober proti nam? Ako

mi zbog nashih vchinyenih grehov posalujemo sze, jeli on nam rad oprozti? — Je ánda Bog naj miloszerdneshi? Zakaj?

9.

Koj dugovanye kakvo drugach pripove- *Je Bog naj iztiniteshi?*
da, nego ono je, je ovakov iztinit? — Y
jeli mi vszigdar selimo duguvanye kakvo
onak znati, kak ono vu iztini je? — Imamo
mi od narave nagnenye k-iztini? Zakaj? —
Ako mi bludimo, ali ako nasz drugi vkanyu-
je, je nam to drago? Jeli lyudi vszigdar izti-
nu znaju? — Morejuli oni vszigdar iztinu
povedati? Zakaj ne? Jeli nelyubiju oni szvoj-
hasznozt? Jeli ne veszeliju sze, ako koga na-
pelyati moreju? — Hochejuli lyudi vszigdar
iztinu govoriti? Zakaj ne? — Moreli pako
Bog iztinu povedati? Zakaj? Né on vszazna-
juchi? — Jeli Bog od nasz kaj potrebuje?
Ali jeli sze Bog veszeli, ako sze vkanyuje-
mo? Zakaj ne? Kak dober je on nam? —
Hocheli ánda Bog vszigdar iztinu govoriti?
Zakaj? Jeli on iztche szvú haszen? Ali jeli
sze on veszeli, ako sze vkanimo? Kak iztinit
je anda Bog?

I. Dokànychanye Nàvuka.

Bog ochituje szebe Mojseshu.

Mojsesh, poklamkam od dvora Aegyptonzkoga od-
ishel, y vu dersavu Madian pobegel bibil, pazku imal
je zverhu chrede jednoga Aldovnika vu onom iztom
méztu, koj Jetro zval sze je, y kojega kcher on za se-
nu vzel je. Jednoch paszel je on chredu szvoju pod go-

rum Horeb, y na jedenput zpazil je ognya, ter nyemu videlo sze je, da germ jeden gori. On chudil sze je, kada zpazil je, da plamen germu nikaj ne skodi, y hotel je ravno blise priztupiti, da vidi kaj to bi bilo, kada on na jedenput iz germa glasz chul je, koj nyemu rekel je, da blise naj ne priztupi, pokenhdob me-zto ovo szveto bi bilo. — Oszupnen odztupil je on nazad, y chul je: da szam Bog Abrahama, Izaaka y Jakoba nyega opominya, da v-dvor Kralya Faraona josche jedenput naj sze poverne, od nyega oszlobodye-nye vu Aegyptonzkem szusanztvu tugujuche detcze Izraelzke naj potrebuje, y ovu iz Aegyptusha zopet vu obechanu zemlyu Kanaan odpelya, kak Bog nyihovem pohosnem otczem obechal je bil.

Mojsesh iz pochetka bil je oszupnyen, ar zpoznal je, kak neprikladen, kak mal bi bil, da ovak veliko odredyenyje izpuni, y zato proszil je Boga, da gâ od-toga odvese; ali zapztuyn. Mojsesh moral je iti. Szamo josche terszil sze je od Boga zeznati, kaj iztoj det-czi Izraela odgovoriti bi imal, ako ova nyega za ime onoga pitala budû, koj nyega poszlal je. Bog andarekel je nyemu: *Ja jeszem, koj jeszem, odgovori szamo detczy Izraela: koj je, on mē je k-vami poszlal.* (2 Moj. 3.) Ov izgovor naj hude tebi zadozta y nyim velichanztvo mojega imena ochituvati. *Ja jeszem, koj jeszem*, o velike y puno znamenujuche rechi! *Ja jeszem koj jeszem*, on vszamoguchi Bog, koga ztvarjauye szveta szamo jednu jedinu rech ztalo je. *Ja jeszem, koj jeszem*, on mudri Bog, kojega providnozt od jednoga do drugoga koncza szveta pretese sze. *Ja jeszem, koj jeszem*, on najbolshi Bog, koj nebo y zemlyu z-szvo-jum nepreszesnoztjum napunuje. *Ja jeszem, koj jeszem*, on naj szveteshi y naj pravichneshi Bog, koj krepozt lyubi y naplachuje, hmanyochu pako odurjava y kastiguje. *Ja jeszem, koj jeszem.*

O Detcza draga! da bi y mi iz ovoga kratkoga izrechka velikochu nashega Boga zpoznali! da bi zpoznali, da pred Bógom nikaj, kak szam prah y pepel jeszmo! da bi mi vu vszeh premembam podversenih dogodyajih ovoga sivlenya na Boga zmiszlili sze, prezkojega volye niti jeden lasz iz glav nashih neopada! O da bi vu nashih potrebochah vszigdar vu onoga zaufali sze, koj dobrota izta je; da bi pri vszakem zkushavanyu na onoga pomiszlili, koj vsza vidi, vsza chuje, y vszigde nazochen je! O dabi zadnich vu vszeh nashih chinih onomu dopazti sze terszili; kojega volya nashe zvelichenye je, y szuprotivno pred onem derhtali, koj moch ima telo y dushu vu pekel porinuti! Ovo, ovo bi bil szád zpoznanya onoga, koj szam od szebe veli: *Ja jeszem, koj jeszem. Amen.*

III. Dokànychye Nàvuka.

Pavel nazvestcha vu Atheni pravoga Boga.

Pavel, kada jednoch glaszoviti varash Athenu bi prehadyal, vusgal sze je vu serdczu, da on tulike Bolvane vu nyim zapazil je, zato zapochel je z-vszakoverztnemi ztanovniki navuka pune razgovore voditi. Nekoji zmed mudroznanczev pravdali szû sze z-nyim, y rekli: kaj hoche nam ov rechlyivecz povedati; drugi pako rekli szû, da ov lyudi ztranzke Boge moliti vuchi; kajti nyim Evangeliuma od Jesusha, y goreztajanya mertveh nazvestchal je, zato odpelyali szû nyega na Areopaga, jeden pijacz gde sze odperto govorilo, y szudi dersali jeszu, da ovde nyim od szvojega nàvuka rachuna da. Pavel dersal je ovde szledèche govorenje. Vi lyudi od Athene! ja po vashem varashu hodil jeszem, y videl szêm, da vi prevnoge Bolvane imatè, vszemu, szê vklanyate, szamo pravomu Bogu ne. Med

Schloßnigg Ixtine Vère Del. I.

oztalemi nashel szém jednoga Oltara, na kojem napisano ztalo je, *neznanomu Bogu*, (Actor. 17.) Onoga anda, kojemu sze vi vklányate, prez da nyega poznate, ja vam nazvezitcham. On je ztvoritely neba y zemlye, pochetnik vszeh ztvarih. On nemre sze vu Czirkvih z-chlovechanzkemi rukami napravlenih zapreti. On je nepreszesni, on takaj nepotrebuje aldove ruk chlovechanzkih, ar on szam je, koj vszem sivlenye, y vsza oztala podeluje. Iz jednoga chloveka izpelyal je on czelo chlovechanzko pokolenye, y napunil je vszu zemlyu. Ako taki onj nashem ochjam nevidlyiv je, tak vendar né on dalko od vszakoga zmed nasz; ar vu nyim imamo mi nashe sivlenye, nashe kretanye, y bitje. Odhitite anda vasha bludna mishlenya y nemiszlite, da Bosanztvo szrebru ali zlatu, ali lepo zrezanomu kamenu zpodobno je. Znajte vnogo bolye, da dan doshel bude, vu kojem on czeloga szvéta, ne kak vashi Bogi poleg nazloba ali nagnenya, nego poleg pravicze szudil bude.

Gdo ne vidi vu ovom govorenju sz. Pavla one lepe oszebitozi y zvershenozti Bosanzke, zmed kojeh vam nekoje danas raztolnachil jeszem? O zmishlyavajte sze iz ovoga najmiloszerdneshega Boga, koj dopuztil je, da vu naruchaju prave vére rodili sze jezte, y vasz tak lepo vu vszeh od Boga vputchuje! Ali pazite da ova znanozt, koju ona vam od laztovitoztih Boga daje, jedna prazna znanozt nebude; ova vnogo bolye naj vu vami postuvanye y lyubav proti Bogu zbudi, y povekshava. Zmiszlite sze visheputi, da Bog jeden vszamoguchi nepreszesni, zevszema mudri, dobri, szveti y pravichni Bog je, ter k-ovem mishlenyam naj vam vera, ufanye y lyubav szlusiju. Amen.

III. Dokànychye Nàvuka.

Boga poznati, je perva vszeh znanostih.

Boga poznati, Dragi! je najveksha znanost. Koj Boga nepozna, on nikaj nezna, ako taki od drugeh ztvarih josche tak vnogo zna. Ter jeli je tesko tebe, o Bose! poznati navchiti sze? Ti ztanujesh vu neizmer-noj szvetlozti, ali ova szamo onda bantuje ochi nashe, kada tebe kakti Boga premishlyavati, ne pako, kada tebe kakti ztvoritelya zpoznati hochemo. Kam goder pogledimo, kam goder sze podamo, tak nahadyamo najodpertesha znamenya od Boga: *Nebo*, veli David: *pripoveda nam nyegvu odichenost, y tverdyina nebezka nazveztscha nam chine ruk nyegovih.* (Psal. 18.) Po-dignimo ochi nashe, tak vidimo neizmernoga protora neba, koj poszel ruk nyegovih je; mi vidimo ona ve-lika tela szvetlozti, koja zverhu nasz tak naredno y zmosno giblyeju sze; mi vidimo neizbrojene zvezde, koje tverdyinu nebezku z-velikum szvetloztjum kinchi-ju. Oglejmo sze na zemlyi, tak vidimo potoke y mor-ja, koja ne szamo zemlyu mochiju, nego koja takaj z-vnosinum rib napunyena jeszu; mi vidimo jednu z-travami vugodno nakinchenu, z-czvetjem y z-drevjem odevenu, y z-vszevdilynum plodnoztjum nadeleu zemlyu; dopache mi vidimo jezero fel razluchneh ztv-arih y sivin; — gdo je vszem ovem bitje dal? gdo je on mudrotvorecz, kojega vszamoguchnost ovę ztvári izpalyala je? Jeli szû ova szama po szebi, pripetcze y iz nishtara izhadyati mogla? Ne zaizto! nego ona jeszu poszel jednoga zevszema mudroga y moguchega Bitja, koje mi *Bog* imenujemo.

Naj mùchi anda Boga nebojechi, y naj negovori vishe: *néje Boga*. On zapztuny szé trudi onoga tajiti, kojega nebo y zemlya, y vsza, koja jeszu, z-tak raz-zlosnem glaszom nazveztschaju; ako taki, ti o Bose! vu

tvojem ochituvanyu nam nebì bil povedal, da ti Go-
zpon jeszi, y da zvun tebe Boga néje, tak vre zadozta
je szvetlozt razuma nashega, da nash od hitja tvojega
vputi. Ti jeszi vsza tz nishtara napravil. Predi nego
gore ztvorjene, y zemlya pelduvana bila je, jeszi ti,
Bog od véka do véka. Ti jeszi izrekel, y vchinyeno
je. Nebo jeszi ti z-oblaki nakril, y zemlyi desdya pri-
pravil. Ti davash chloveku hranu, y karvanu zder-
savanje. Tvoja providnozt pretese sze na najmenshe-
ga cherva. Daj anda, da te zpoznamo, o dobri Bose!
ochituj sze Boga nebojechemu szvétu, da sze jedenput
oberne, y zpozna, da ti vszamoguchi, vekivechni,
chudnoviti y jaki Bog jeszi. Amen.

NÀVUK 4.

Od preszvètoga Trojstva.

PITANYE 1.

Jeli je vech Bosanzkèh Pershon?

Razláganye.

1.
Trijeszu bo-
sanzke Per-
shone.

Zadnyiput, moja Detcza! vam od Bo-
ga takva raztolnachil jeszem, koja takaj ra-
zum nash nam poveda; danasz pako vam ta-
kva napervo donashal budem, koja nam ra-
zum nash nigdar povedati nebi bil mogel, y
kaj nijeden chlovek chez chetiri jezera let
znal néje, doklam szam Jesush Kriztush ova
lyudem povedal néje. Nash razum nigdar nebi

bil mogel znati, da vishe bosanzkih osobih nahadya sze, ali Jesush Kriztush nam je povedal, da tri bosanzke oszobe jeszu *Kerztite* rekel je Jesush Apostolom, *vu ime Otcza, y Szina, y Duha szvetoga*. Tri szû anda bosanzke oszobe, perva je Otecz, druga Szin, trejta Dùh szveti.

Otecz je szam od szebe od véka, Szín je od Otcza rodyen od véka, Dùh szvéti izhadya od Otcza y Szina takaj od véka. Szin anda néje Otecz, Dùh szvéti néje Szin ali Otecz, nego ove tri bosanzke oszobe med szobum razluchne jeszu.

2.
Ove tri bosanzke oszobe med szobum razluchne jeszu.

Jé pako Szín y Duh szveti kak y Otecz pravi Bog, kajti nyim vu szvetom pizmu bosanzka narava, hitje y ime, bosanzke lazto- vitozti, bosanzki chini, y bosanzko postu- vanye daje sze, y lazto- vito je. Tak Szín, kak y Dùh szvéti vu szvetom pizmu *Bog* o- ziva sze. Szinu vszaznoguchnozt pridaje sze, kajti sz. Janush Evangelista veli: *Da vsza po nyim vchinyena jeszu*. (Joan. 1.) Dùhu szvetomu vszaznanozt pridaje sze, kajti sz. Pavel veli: *Dùh szveti vsza dugovanya pre- treszava*. (1 Cor. 2.) Zadnich tak Szinu kak Duhu szvetomu daje sze bosanzko postu- vanye, kajti Kriztush ne szamo vu ime Otcza, nego y szina y Duha szvetoga kerztiti zapo- veda. Vsza bosanzka Oszoba je anda pravi Bog, nijedna né ztaresha niti moguchnesha, nego vsze tri szû jednake. Y ako taki na ki- pih' Otecz kakti jeden ztari, Szín pako kakti mladi chlovek, Duh szveti vu zpodobi goluba napervoztavlyaju sze; tak vendar nepripetcha sze ovo zbog nejednakoche osobih, nego

3.
Vsza Oszoba je pravi Bog.

szamo, kajti vu oveh zpodobah izkazale sze jeszu.

4. *Tri bosanzke Oszobe imaju szamo jednu bosanzku naravu y bitje.* Tri chlovechanzke oszobe chiniju iztina je tri lyude, ali tri bosanzke oszobe ne chiniju tri Boge, nego szamo jednoga Boga. Vszaka oszoba je Bog, ali nijeden drugi, nego on izti Bog. Vu oszobah jeszu razluchne, ali vu bitju jeszu jednake y jedine; kajti ne vishe, nego szamo jeden Bog nahadyati sze more. Ovo, iztina je, preszèchi nemremo, ali vendar je iztina, kajti ovo Bog rekel je; y kajti Bog neizmeren je, tak on vishe zkrovnosztih vu szebi zadersavati more, nego mi preszèchi moremo. Tri oszobe bosanzke zkupvzete imenuju sze preszvèto Trojztvo.

R a s g o v o r i.

1.

Jeli je vech bosanzkèh Pershon?

Jeli je vech bosanzkèh oszobih? — Jeszu ovo lyudi pred dosheztkom Jesusha Kriztusha vre znali? — Gdo je najpervich ochituval, da szû tri bosanzke pershone? — Vu chijem imenu zapovedal je Kriztush kerztiti? Zakaj velish anda da szû tri bosanzke oszobe? — Kak sze imenuju ove tri bosanzke Oszobe?

2.

Jeszu ovetri bosanzke oszobe med szobum razluchne?

Je Otecz rodyen? — Ali jeli on od koga izhadya? Od koga je Otecz? — Od koga je Szin rodyen? — Je anda Szin druga pershona nego Otecz? Zakaj? — Od koga izhadya Duh szveti? Szamo od Otcza? — Je Duh szveti druga Pershona nego Otecz y Szin?

Zakaj? Kaj je anda i vu Bogu razluchnoga? Narava ali Pershona? — Jeli néje druga Pershona Otecz, druga Szin, druga Duh szveti?

3.

Jeli szamo Otczu bosanzko ime y bo-
sanzko postuvanye daje sze? Ali jeli szamo
Otczu bosanzke laztovitozti davaju sze? —
Jeli Szin y Duh szveti néje pravi Bog? Za-
kaj je pravi Bog? Kakvo ime, kakvo po-
stuvanye y laztovitozti sze nyim davaju? —
Je vszagoguchnozt jedna Bosanzka laztovi-
tozt? Kaj veli sz. Janush, po kem szû vsza
vchinyena? — Je vszaznanozt takaj jedna
bosanzka laztovitozt? Kaj veli sz. Pavel gdo
vsza pretreszava? — Jeli Kriztush zapoveda
szamo vu imenu Otcza kerztiti? Kakvo! po-
stuvanye anda ovde Szinu y Duhu szvetomu
daje sze? Zakaj jedno bosanzko?

*Jeli je Szin
y Duh szve-
ti takaj pra-
vi Bog?*

Koja bosanzka pershona je ztaresha ali
moguchnesha? — Jeli szin néje od Otcza ro-
dyen. Anda je Otecz ztareshi od Szina? Za-
kaj ne Otecz ztareshi od Szina? — Jeszi ti
kada kipa videl preszvetoga Trojztva? Vu
kakvi zpodobi malasze Otecz? Szin? — Duh
szveti? — Anda ove tri bosanzke Pershone
jeszu razluchne, nejednake? — Zakaj sze
ovak razluchno malaju? Vu? kakvi zpodobi
szû sze ove izkazale?

*Jeszu ove
tri bosanzke
pershone je-
dnake?*

4.

Tri ehlovechanzke Oszobe, kuliko' chi-
niju lyudih? Y tri bosanzke oszobe, kuliko
chiniju Bogov? Zakaj szamo jednoga? More-
li vishe kak jeden Bog biti? — Ali jeli néje
vszaka bosanzka pershona pravi Bog? Anda

*Jeszu zato
tri Bogi,
kajti tri
Pershone
jeszu?*

szû tri Bogi? Zakaj ne? — Imajuli ove tri bosanzke Pershone vishe naravih y [bítjih? Moremoli to z-razumom preszèchi? Anda to nehude iztina? Zakaj je vendar iztina? Gdo je to nam povedal? — Moreli Bog vishe zkrovnoztih vu szebi imati, nego mi preszèchi moremo? Zakaj? Jeli je Bog neizmeren? Kak sze imenuju ove tri bosanzke Pershone zkupvzeto?

PITANYE 2.

Kak y po chem valuje kerztchenik katholik preszeto Trojztvo?

Razlåganye.

1. Kerztchenik katholik valuje preszeto Trojztvo po znamenyu szvetoga Krisa. Vi vre znate, draga Detcza! kak sze kris naprav-
Kerztchenik katholik valuje po znamenyu sz. Krisa preszeto Trojztvo, y nashe odkuplenye. vi. Ov sze dela z-desznum rukum, kada z-nyum chelo, persza, y ramena od levoga na deszna znamenuje sze, govorech: *vu ime Otcza †, y Szina †, y Duha szvetoga †, Amen.* Kada anda kerztchenik katholik pri napravlanyu krisa vszaku zmed treh bosanzkih Pershon imenuje, tak valuje on preszeto Trojztvo. Poleg toga je Jesush Kriztush na krisu vumerl, y nasz z-szmertjum odkupil. *Kerztchenik katholik valuje anda po znamenyu szvetoga Krisa takaj, da Jesush Kriztush nasz z-szvojum szmertjum je odkupil, kada je na krisu vumerl.*

Nikaj né navadneshega pri kerztchenikih
katholkih, kak napravlanye szvetoga Krisa,
ali dobra mishlenya pri tom vnogiput po-
mènkaju. Nekoji nikaj nemiszlju, drugi ne-
znaju, kaj bi miszlili, nekoji pako napraviju
krisa pravo, y ovak selet bi, da vszaki bi
vchinil. Nut anda, kaj morate vu szerdczu
miszliti, kada z-rukum krisa napravlyate?
Néli, kris pelduje nashe odkuplenye y po-
mirenje z-Bogom? Da nebi bil Kriztush na
krisu vumerl, tak bi mi bili josche vszigdar
nepriatelyi Bosji, mi Boga nebi szmeli Otcza
nashega ozvati, mi nebi szmeli rechì: *vu ime*
Otcza: kada anda z-rukum kris napravlya-
mo, tak moramo vu szerdczu miszliti, da mi
po krisni szmertì Jesussha Kriztusha odkuple-
ni y vredni poztali jeszmo, Boga kakti na-
shega Otcza zazvati.

2.
Dobra mi-
shlenya pri
napravlanyu
Krisa.

Vu ime Otcza, znamenuje pervich tuli-
ko, kakti na zapoved Otcza. Néli, dobri Bog
je zapovedal, da mi zpimo, jémo, delamo,
molimo y zpodobne chine poztavlyamo? Y
Bog je Otecz, Szin y Duh szvétì. Koj anda
pri napravlanyu szvetoga krisa veli: *Vu ime*
Otcza, y *Szina*, y *Duha szvetoga*, on mo-
ra pri tom miszliti: kajti ti dobri Bose Otecz,
Szin, y Duh szvétì zapovedal jeszi, tak ho-
chu vezda moliti, jéztì, zpati, delati, y ovo
ali ono vchiniti. Ovde morete pako lehko
zpoziti, moji Dragi! da szamo pri dobréh
ztvaréh, koje Bog lyubi, krisa napravlyati
szmèmo, nigdar pako pri zlochezteh, koje
Bog ne dopuztcha.

3.
Pervo zna-
menuvanye
rechih: *Vu*
ime Otcza.

Vu ime Otcza, znamenuje drugoch tu-
liko, kak z-jakoztjum Otcza. Kada, vu pel-

4.
Drugo zna-
menuvanye

*reckih: vu
ime Otcza.*

di, koje smehko dervo zdignuti szami nemremoŝ, ali kojega teskoga poszla szami zver-shiti nészmo vu ztalishu, tak zovemo druge lyudi na pomoch, y to po nyihovem imenu, da ovi nam z-szvojum mochjum y jakoztjum pripomoreju. Ovak moremo takaj k-Bogu krichati, kada kaj dobroga vchiniti hochemo. Mi szami z-nashum laztovitum jakoztjum ni-kaj dobroga vchiniti nemremo, Bog nam more pomochi dobro zapocheti, y dovershiti. Y kajti Bog szlabomu chloveku rad pomase, y szvoju pomoch obechal je, tak velimo taki, vu ime Otcza, y Szina, y Duha szvetoga; tojezt: z-tvojum pomochjum o Bose Otecz, Szin, y Duh szveti hochu ja moliti, poszlu-vati, ovo ali ono vchiniti, ali terpeti.

*5.
Napra-
nye krisa je
jedna odi-
chena y
hasznovita
navada.*

Od ovud vidite, moja Detcza! kakva odichena y hasznovita navada napravlanye szvetoga krisa je. Mi valujemo po znamenyu szvetoga krisa zglavne otajnoztí vére nashe, najmre preszveto Trojztvo, y Jesusha Kri-ztusha nashega odkupitelya. Mi zvershavamo y valujemo po tom véru nashu. Mi krichimo pri napravlanyu szvetoga Krisa k-Bogu za nyegvu jakozt y miloztchu; mi pokasujemo anda po tom ufanye nashe. Mi pokasujemo po napravlanyu szvetoga Krisa, da na za-poved Bosju chiniti, y nyegve zapovedi ob-dersavati hochemo; mi ochitujemo anda na-shu lyubav.

R a z g o v o r i.

1.

*Kak y po-
chem valuje
kerztchenik*

Po chem valuje kerztchenik katholik preszveto Trojztvo? — Kak sze kris napra-

vlya? — Kaj zgovarjamo, kada krisa na-
pravlyamo? — Koje bosanzke pershone ime-
nujemo pri napravlanyu szvetoga krisa? —
Zakaj valuje kerztchenik *katholik* anda pre-
szveto Trojztvó po znamenyu szvetoga krisa? *preszveto*
Kaj valuje kerztchenik *katholik* josche vishe
po znamenyu szvetoga krisa? — Gdo je za
nasz na krisu vmerl? Po chem nasz je Jesush
Kriztush odkupil? — Kaj valuje anda kerzt-
chenik *katholik* josche vishe po znamenyu
szvetoga krisa? *Trojztvo?*

2.

Jeli vidish ti visheputi lyudi krisa na-
pravlyati? Jeli je pako zadozta szamo krisa *Kaj moramo*
napravlyati, y rechi k-tomu izgovarjati? — *miszliti, ka-*
Kaj moramo anda pri napravlanya krisa vu *da kris na-*
szerdczu imati? Jeli prez dobrih mishleny *pravlyamo?*
poszluvali budemo? — Kaj bi mi bili, ako
Jesush Kriztush nasz nebi bil odkupil? Jeli
bi mi szmeli onda rechi: vu ime Otcza? Za-
kaj ne? Po chem je nasz pako Kriztush od-
kupil? — Po chem je nasz Jesush z-Bogom
pomiril? — Kaj moramo anda miszliti, ka-
da krisa napravlyamo? Gdo je nasz z-szmert-
jum na krisu odkupil, y z-Bogom pomiril?

3.

Kaj to znamenuje: vu ime Otcza? Vu *Kaj moramo*
chijem imenu poszluje jeden kralyevzki po- *pervich mi-*
szlenik? Zakaj vu imenu kralyevzkom? — Y *szliti, kada*
kaj to znamenuje vu imenu Bosjem? — Je *velimo: cu*
Bog zapovedal moliti? Jeli hoche szamo Bog *ime Otcza?*
Otecz, da molimo? Jeli né Szin y Duh szve-
ti pravi Bog? — Kada anda pred molityum
velimo: *Vu ime Otcza*, kaj moramo pri tom

miszliti? — Moremoli takaj pri zléh chinih rechi: *Vu ime Otcza?* Zakaj né? Je Bog takaj zlochezte chine zapovedal?

4.

Kaj moramo drugoch miszliti, kada velimo: Vu ime Otcza? Ako ti kakvoga teskoga poszla szam zver-shiti nebi mogel, kaj bi ti vchinil? — Y ako koga zmed vnogeh na pomoch bi zval, bili nyega po imenu zazval? — Moremoli mi szami nam kaj dobroga vchiniti? Koga moramo za jakozt y miloztchu prosziti? — Kaj anda to znamenuje drugoch: *Vu ime Otcza?* Jeli da Boga za jakozt y miloztchu proszimo?

5.

Jeli je napravlyanye krisa jedna hasznovita navada? Jeli mi po napravlanyu szvetoga krisa valujemo y zvershavamo véru? Zakaj? Kaj valujemo mi po znamenyu szvetoga Krisa? Jeli zvershavamo takaj ufanye? Zakaj? Chiju pomoch zazavamo? — Y po chem ochituje-mo mi lyubav proti Bogu? Na chiju zapo-ved hochemo mi poszluvati, kada krisa napravlyamo? — Jeli zvershavamo anda lyu-bav po napravlanyu krisa? Zakaj? Jeli je anda napravlyanye szvetoga krisa jedna hasznovita navada? Zakaj? kaj po tom pokasu-jemo?

I. Dokànchanye Nàvuka.

Pogled brúnchene káche osslobadya od o-gnenih kách vgrisnyene Izraelcxe.

Akoprem dobrochinztvo veliko bilo je, koje Bog jednoch lyudztvu izraelzkomu po tom ízkazal je, da

nye na chudnoviti nachia iz szusanztva Aegyptonzkoga oszlobodil, y chez puztchina vu obechanu zemlyu. Kánaan szam zapelyati hotel je, tak vendar nezahvalna bila je veksha ztran zmed nyih; vezda tusili szû sze oni zverhu pomenkanya dobreh jezvin, vezda zverhu pomenkanya vode, vezda morgavali szû oni proti szvojemu vodyi Mojseshu y Aaronu, vezda proti manni, koju nyim Bog vszaki dan iz neba padati puztil je, y zdihavali szû za Aegyptonzkem meszom, koje oztavili bili jeszu. Dapache, oni oztavili szû pravu sziusbu Bosju, ter napravili szû szii iz zlata Bolvana, koj kakti téle izgledel je. Ovoga kipa podignuli szû oni odperto, ovomu alduvali szû kakti Bogu, obvershavali szvetechna veszelja, jéli y pili, pleszali okolo nyega y krichali: *Ovo jeszu Bogi tvoji; o Izrael! koji tebe iz Aegyptusha izpelyali jeszu.* (1 Mojs. 32.)

Bog; koj vszigdar muden na kastiguvanye, berz pako na oproztchenye je, zadnich ództupil je od szvoje terplivnoztii, y poszlal na nye ognene káche, od kojeh vgrisenenya vnogi vumerli jeszu. Kaj sze je pripetilo? Hitro derchali szû vnogi k-Mojseshu, y zpoznali posalujuchi szvoje gréhe, ter proszili gá, da pri Bogu za nye naj moli, da nye od oveh kách oszlobodi. Mojsesh proszil je za lyudztvo, y Bog ochituval je nyemu taki nachina, kak ranyeni od kách zvrachiti sze moreju. On moral je najmre zpodobnu káchu iz bruncza napraviti, y ovu na vizzoki ztup obesziti, tak, da sze iz vszeh shatorov videti je mogla. Koj anda od káche vgrisenyen bil je, y ovu brunchenu káchu pogledel je, on taki bil je zdrav.

Iz ovoga pripetchenya, Dragi! izpelajmo navuka za nash, kakvoga y zvelichitely nash hotel je, da szii za nash izpelyamo. *Kak goder Mojsesh*, rekel je on, *káchu vu puztchini podigel je; ovak mora y szin chlo-vechji podignyen biti; da ovak vszii, koji vu nyega vé-*

ruju, ne zkvariju sze, nego vekivechno sivlenye imaju. (Joan. 10.) Ovde anda szam Jesush szebe prizpoda-
blya onoj na viszokom ztupu od Mojsesha podignennoj
káchi, y daje nam po ovoj priliki jakozt Krisa zpozna-
ti, na kojem on zbog vszeh nasz, koji od chemera pe-
klenzke káche ranyeni bili jeszmo, za zvrachiti viszel
je. O da szamo y mi od jakozti ovoga krisa pravo
vputcheni bi bili! da y mi na zpodobu Izraelczem na
ovo znamenye Krisa z-velikum zaufanoztjum y z-pra-
vem duhom pokore bi pogledeli! Da y mi nasz szame
z-ovem jakozti punem krisom pri vszakdashnéh poszlih
oszebito pako pri pogibelnih zkushavanyih duha peklen-
zkoga, vszigdar bi zaznamenuvali! O kak chudnovito
bi y mi jakozt ovoga pochutili! Nebi sze zaizto naha-
dyala nijedna neszrecha, koju mi od nasz nebi preti-
rali, nijedno zkushavanye, koje nebi raztepli, nijedna
salozt, koju nam vugodnu, nijeden chin, kojega szvé-
toga nebi vchinili. Amen.

II. Dokànchanye Nàvuka.

*Pri kerštu Jesusha vu Jordanu ochiluju
sze tri bosanzke Ossobe.*

Ivan, predhodnik Kriztusha, takaj *kerztitely* ozi-
va sze, kajti on iz one ztrani Jordana potoka one,
koji za gréhe szvoje pokoru chinili jeszu, vu vodi ker-
ztil je. Zkoro vszi ztanovniki Jeruzalema, y czele der-
save sidovzke dali szû sze od nyega kerziti. Jednoch
doshel je y Jesush, y potrebuval je da gá kerzti. Kak
to, odgovoril je Ivan, ti dohadyash k-meni, ter po-
trebujesh od mene, da té kerztim, jeli nemoram ja
vnogo bolye k-tebi dojti, da sze od tebe kerztim? Od
tebe, koj zaizto agnecz Bosji jeszi, koj odjimlye gre-

he szveta! Metemtoga Jesush oztaje pri szvojem potrebuanyu, da vsu pravichnozt izpuni. Vre ztupluje on vu potok Jordan, vre kerzti nyega Ivan, kak y oztale Izraelcze kerztíl je, y vre izhadya Jesush zopet iz vode, nut, zmosno y odícheno pripetchenye! Nebo odpira sze, y iz viszine chuje sze razlosni glasz: *Ovo je Szín moj lyubléní, vu kojem szém sze jako vdobrovolyil.* (Matth. 3.) Y izkazal sze je takaj Dùh szvetívu zpodobi jednoga goluba, koj sze zverhu Jesusha zputíl je.

Zpoznajte, Dragi Kerztcheniki! vu ovem chudnovitem pripetchenyu jednu zkrovnozt, koju vam danas raztolnachil jeszem. Zpoznajte jednoga Boga vu treh osobih, Otcza, Szina y Dùha szvétoga. Otcza, koj iz neba krichal je: *Ovo je Szín moj lyubléní, vu kojem szém sze jako vdobrovolyil.* Szina, koj sze vu potoku Jordanu kerztiti dal je. Dùha szvétoga, koj vu zpodobi goluba zverhu glave Jesusha doshel je. Nikaj vash vu ztálnozti vére gledech na ovu zkrovnozt naj ne zbludi! -- Naj bude ovo taki zverhu vashoga razuma, naj dapache ovo chlovechanzkomu razumu' szuprotívno vidi sze, zadozta naj vam bude to, da Bog ovo ochituvál je; Jesush Kríztush je ovo odperto véruvati, y vu imenu Otcza, y Szina, y Dùha szvétoga kerztiti zapovedal, y Czírkvá dersi ovo vszigdar za temely vére nashe kerztchanzke, za ztup y podpor nashega ufánya, y za ochívezti pokaz lyubavi Bosanzke: ar vu ime Otcza, Szina y Dùha szvétoga jeszmo mi kerztcheniki poztali. Vu ime Otcza, y Szina, y Dùha szvétoga ufamo sze mi od szvéta ovoga oddrusiti sze, y vu imenu Otcza, y Szina, y Dùha szvétoga selimo mi Boga jednoch od licza do licza vekoma lyubiti. Amen.

III. Dokànychye Nàvuka.

*Napravlanye Krisa je jedna ztarinska, y
hasznovita navada.*

Tertulian, jeden chizto ztari piszecz drugoga zto-
letja nam obznanuje, da vre nyegvih vremen med kerzt-
chenikí jedna obchinzka navada bila je, pred vsakem
poszlom z-znamenym szvétoga krisa zaznamenuvati sze.
Kulikoputi, tak pishe on; kulikoputi sze krenemo,
domom dohadyamo, ali van odhadyamo, nasz oprava-
vlyamo ali szlachimo, peremo y k-ztolu szednemo,
szvetchu vusisemo, ali vu poztely lesemo, poszlujemo
ali pòchivamo, tak zaznamenujemo nasz z-znamenym
szvétoga krisa. (Libr. de corona milit.) Iz oveh re-
chih odperto je, da napravlenye krisa ne vu keszneshih
vremenih znajdyeno, nego jedna ztarinska navada vu
Czírkví je. Muchim od zrokov, koji Czírkvu genuli je-
szu, da ovu navadu vpelyala je, ar ove vre chuli je-
szmo. Szamo josche nekuliko rechih od jakozti y zroku-
vanyih krisa yam povedati hochu.

Chtejem, da vre szvétí Janush, poklamkam che-
mera piti pritruczan bil je, po znamenyu szvétoga kri-
sa vszu skodlyivozt ovomu prevzel je; da szveti Levita
Lovrencz po znamenyu szvétoga krisa szlepe videti vchi-
nil; da szveta Devicza y muchenicza Thekla po ovom
znamenju vu szredini goruche lomache nevrasenazder-
sala sze je, da szveti Benedikt jednu z-chemerom na-
punyenu poszudu po znamenju szvétoga krisa raztepel
je; muchim od drugéh odichenéh zrokovanyih, koja
znamenye krisa tak vu telovneh kak y vu duhovneh
prilikah donashalo je. Szamo to vasz josche zpomenuti
moram, da szamo oni, koji ne iz szame navade, nego
z-pravum vérum y zaufanoztjum ovo znamenye na-
pravlyaju, zverhu odichenéh szàdov veszeliti sze mogú.
Ar kaj more haszneti, pita szveti Rupert, ako gdo na

szvojem chelu z-krisem zaznamenuje sze, ter Razpetoga vu szerdczu ne noszi.

Selim anda, Dragi! da vi ne szamo peldi perveh kerztchenikov szledujete, y ovoga moguchega schita vu vszem vashem poszluvanyu y pochinku potrebujete, nego da vi takaj znamenye szvétoga krisa vszako vréme z-tverdnum vérum y zaufanoztjum napravlyate. Bose! kulikoga kincha miloxtchih, kulikoga blagoszlova pri vashem gozpodarztvu, kuliku jakozt vu zkushavanyih, kuliku batrivozt vu vashih szuprotivchinah, kuliko dobro dushe vu iztoj vashoj szmerti vam ova ztarinzka y hasznovita navada donashala bude! Amen.

NÁVUK 5.

O d Z t v à r j a n y a.

PITANYE 1.

Gdo je vsza stvoril?

Razláganye.

Vi do vezda. Dragi! navchili sze jezte Boga poznati poleg nyegvoga bitja, zvershenoztih y oszobih; vezda morate nyega takaj poleg nyegvih chinih poznati navchiti sze. Per-vi chin Boga je, ztvarjanye szvéta. Pod imenom *szvéta* razmevaju sze Nebo y zemlya, y vsza koja vu nyih zadersavaju sze. Ov szvét, kak vre znate, ima jednoga pochetnika, od koga napravlyen je; on anda néje vszigdar

1.
Szvét néje vszigdar bil, pred szvétom nikaj nè bilo.

Schloissnigg Iztine Vére Del. I.

bil, nego je vu vremenu vchinyen. Predi nego sze koje dugovanye zachme, ovo nahadyati sze nemre; vsze ztvary szvéta pako imaju pachetka, pred szvétom anda nikaj né bilo.

2.

Bog ztvoril je nebo y zemlyu, y vsza koja jeszu.

Pochetnik, koj szvéta napravil je, je Bog. Rech ova ztvoriti znamenuje kakvo dugovanye iz nishtara izpelyati. Lyudi takaj moreju vszakojachke ztvary, kakti hise, oprave, poszude y zpodobna napraviti; oni delaju, ali ovakve ztvary szamo iz drugéh dugovanyih, koja vre predi bila jeszu: hise iz kamenya ali dreva, pezka y vapna; oprave iz szukna ali platna ali szvile, y, t. d. Iz nishtara nijeden chlovek nikaj napraviti nemré. Bog ztvoril je nebo y zemlyu y vsza koja jeszu iz nishtara, kajti predi nikaj bilo néje, kak szam Bog. Bog anda ztvoril je Nebo y zemlyu, y vsza koja jeszu.

3.

Bog ztvoril je szvéta prez orudelja y prez pomochnika.

Lyudi, kada iz drugéh nenahadyajucheh ztvarih kaj delaju, potrebuju vszigdar orudelje y pomochnike. Ako dervodelavec najlepshe drevje za hisu ima, tak ov vendar *zrechjum* ztanye iz ovoga napravil nebude, on potrebuje orudelje, y pomochnike. Kada Bog szvéta ztvoril je, tak josche nichesza né bilo, nego Bog szam je bil. Bog anda ztvoril je szvéta prez orudelja, y prez pomochnikov. Szvéto pismo, iztina je, poveda, da Bog vsza po szinu szvomû ztvoril je, ali metemotoga vendar iztina oztaje, da Bog pri ztvaryanju szvéta nikakvoga pomochnika imal néje; ar szin néje drugi Bog nego Otecz. Kada anda Szin pri ztvaryanju szvéta pripomogel je, tak néje drugi Bog, niti nikakva druga moch pripomagala, anda je Bog josche vszi-

gdar szveta prez pomochnika chizto szam ztvoril.

Vi budete radi znati hoteli, kak ztvàr-janye [szvéta vchinyeno bilo je; ali néjeden chlovek pri ovem nahadyal sze néje, nijeden chlovek anda ovo znati nemre; metemtoga vendar dobri Bog, koj szvéta napravil je, je ovo ochituval, kak szveta nachinil je. Moj-sesh takaj po nadehnénnyu Bosjem pripoveda-nye od Ztvàrjanya szvéta razlosno zpisal je vu szvoji knigi od ztvàrjanya. Od ovud zna-mo mi pripovedanye od ztvàrjanya, y mo-ramo ovo véruvati.

4.
*Mi znamo y
vérujemo
pripoveda-
nye ztvàr-
janya iz bo-
sanzkoga
ochituvanya.*

Kak nam kniga od ztvàrjanya pripoveda, tak ztvoril je Bog vsza szvojum rechjum. On je rekel: naj bude, y ztvàri naztale jeszu. Bog hotel je, da ztvàri naj poztaju, y one szû poztale, kak Bog hotel je. Bog szvéta vu jednom oka megnenyu bi bil mogel ztvoriti, ali on hotel je ovoga vushezteh dnevih izpe-lyati, kaj szledechem nachinom pripetilo sze je.

5.
*Bog vsza po
szvojoj rechi
ztvoril je vu
shezteh dne-
vih.*

Na prichetku ztvoril je Bog nebo y zemlyu, y ovde bile szû josche vsze ztvàri zmeshane, oszebito zemlya bila je puzla y prazna, ter ód vod pokrita tak, da josche ni-kakvo ztvorenje na ovoj siveti ne moglo. Da-pache vsza bila szû z-tmiczum zakrivana na zemlyi, zato Bog pervi dan ztvoril je szvét-lozt, drugi dan ztvoril je tverdinu y zraka, trejti dan morja y száda na zemlyi, cheterti dan szuncze, meszcz y zvézde, peti dan ri-be morja, y pticze vu zraku, shezti dan si-vinu zemlye, y lyudi.

6.
*Chini shezt
dnevov.*

7.
*Pripoveda-
nje od
ztvârjanyâ
chloveka.*

Ztvârjanye chloveka pripetilo sze je na szledechi nachin. Bog iz ilovache zemlye napravil je tĕlo chloveka, y nadehnul dushu, y tak prvi chlovek je naztal. Bog dal je nyemu ime Adam, koja rech znamenuje zemelzkoga chloveka. Kada Adam bi bil zazpal, tak zpĕchemu zvadil je rebro, y napravil iz ovoga drugoga chloveka, y ov bil je sĕna, od Boga Eva nazvana. Od oveh dvĕh lyudĭh dohadyaju vszi drugi lyudi, y zato ozivaju sze oni prvi roditelyi nashi.

8.
*Pochivanye
na szedmi
dan, kak
sze razmeti
mora.*

Szedmi dan pochinul je Bog, poklamkam poszle szvoje bi bil dokonchal. Ovde nemoramo miszliti, kak da po ztvârjanyu bisze bil vtrudil; nego pochinul je, tojezt, preztal je ztvârjati nove ztvâri, ar Bog vszigdar poszluje, kada szvĕta zdersava, ravna, y dushe lyudih ztvârja.

9.
*Czily y ko-
necz ztvâr-
janya szvĕta*

Vszaki mester szvojega pervoga mudrotvora dela za szvoje postenye. Szvĕt je najodicheneshi mudrotvor Bosji, Bog anda ztvoril je szveta za szvoje postenye. Szvĕt takaj szlusi na diku y postenye Bosje, ar on zbudyava vu nami zpoznavye Boga y hvalu szûprot nyemu. Vsze kaj vu szvetu je, szlusi poleg toga za szrechu y vĕszelye lyudih. Bog anda ztvoril je szvĕta takaj za nashu szrechu. Ovde imate, draga detcza! czilya y koncza ztvârjanya. K-tomu szlusiju vsza vu szvetu; zato veli szveto pismo: *Bog videl je vsza, koja napravil je, y bila szû jako dobra.*

da Szina imal je za pomochnika? — Je szin drugi Bog nego Otecz? — Ali jeli ima szin drugu mōch kak Otecz? Vu chem razlucha-va sze Szin od Otcza? Vu Oszobi, ali vu Naravi? Vu chem je pako Szin z-Otczem jednak? — Zakaj anda Otecz né imal vu Szinu pomochnika?

4.

*Odkud zna-
mo mi pri-
povedanye
ztvárjanye?*

Jeli bi ti rad znati kak ztvárjanye vchi-nyeno je? Gdo je pri tom bil? Moremoli mi szami po nami pripovedanye od ztvárjanya zrati? Zakaj ne? Gdo nam je pako ovo ochituval? Moramoli ovo véruvati? Zakaj? Gdo je pripovedanye od ztvárjanya po na-dehnenyu Bosjem popisal?

5.

*Po chem je
Bog vsza
zтворil?*

Po chem je Bog vsza zтворil? — Kaj je Bog vszigdar rekel, kada kaj zтворil je? — Y kada Bog hotel je, da kaj biva, kak je to vchinyeno? Jeli Bog czeloga szvéta nebi bil mogel vu jednom oka megnenya zтворiti? Zakaj? Je on vszamoguchi? — Vu kulikih dnevih zтворil je pako Bog szvéta?

6.

*Kaj je Bog
zтворil vu
vszakem
zmed shezt
dnevov?*

Kaj je Bog zтворil na prichetku? — Jeli szû ovde vre vsze ztvári bile razdelene? — Y kak je zgledala zemlya? Jeli je ona vre z-travami y z-sivinum bila napunyena? — Z-chem je zemlya bila pokrita? — Jeli je bila szvétlost na zemlyi? Kaj je Bog zato prvi dan zтворil? — Kaj je zтворil Bog dru-gi dan? — Kaj trejti dan? Kûdasze vozimo z-velikemi ladjami? Kaj je napravil Bog che-

terti dan? Kaj szvéti na nebu? — Kaj je Bog ztvoril pèti dan? Kaj plava vu vodi? Kaj leti po zraku? — Kaj je napravil Bog shezti dan? Jeli sze nahadyaju szamo vu zraku, y vu vodi ztvàri? Kója ztvàr je z-razu-mom nadelena?

7.

Iz chesza je Bog télo chloveka napravil? *Kak je bi-
valo ztvár-
janye perveh
lyudih?* Kaj je Bog nadehnul vu télo? — Jeli je per-
vi chlovek bil musko ali senzko? — Kak je
zval Bog pervoga chloveka? — Jeli je drugi
chlovek takaj bil musko? Iz chesza je Bog
senu napravil? Kak sze zvala perva sena? —
Od koga izhadyaju vszi lyudi? Koji szú anda
nashi pervi roditelyi?

8.

Kaj je Bog szèdmi dar vchinil? Je sze *Kaj je Bog
szèdmi dan
vchinil?* Bog vu szvojem délu zatrudil? Jeli to vnogo
truda ztoji, kaj hoteti, ali rechi? Po chem
je Bog szvéta ztvoril? Je sze anda Bog zatsu-
dil? — Kaj hoche anda to rechi: Bog po-
chinul je szèdmi dan? Moremoli preztati de-
lati? Jeli to vre ne znamenuje pochinuti? —
Jeli Bog vezda vre nikaj vishe neposzlujе vu
szvétu? — Gdo zdersava y ravna szvéta?
Gdo ztvàrja dushe lyudih? Jeli ztvàrja Bog
takaj nove fele ztvorenyih? — Kak je anda
Bog poszluvati preztal?

9.

Jeli jeden mester szvojega pervoga mu- *Zakaj je Bog
szvéta ztvo-
ril?* drotvora dela za szvoju szramotu ali za szvo-
je postenye? Chiji mudrotvor je szvét? Za-
kaj je Bog szvéta ztvoril? — Jeli nasz szvét
zbudyava na zpoznanye y dichenye Boga?

Jeli szlusi anda szvét na diku y postenye Boga? Zakaj? K-chemu szlusiju josche vsza na szvétu? Jeli mi ovde némamo szrechu, y veszelje? — Jeli je Bog szvéta takaj za nashe zvelichenye ztvoril? Zakaj to velish? — Koj je czily y konecz ztvarjanya szvéta? Szamo diká Bosja? — Kada Bog vsza pogledal je, koja napravil je, kaj je rekel? Y zakaj je vsza za dobro dersal? K-chemu vsza szlusiju?

PITANYE 3.

Zakaj je Bog Angele ztvoril?

Razlåganye.

1. *Nahadyaju sze Angeli, y oni jeszu chizti Dùhi.* Naj prestimanesha ztvorénja Bosja jeszu angeli y lyudi. Kada Bog angele ztvoril je, znati nemremo; ar vu szvétom pizmú nikaj ztvoril je, to véruvatí moramo; kajti szvéto pizmó vszigde od nyih govori. Mi angele nemremo videti, niti ove z-rukami pipati, oni némaju anda téla, imaju vendar razuma y volyu; ar Davíd veli: *da oni Boga dichiju, y nyegve zapovedi zvershavaju.* (Psal. 102.) Angeli anda jeszu chizti Dùhi, koji razuma y volyu imaju, téla pako némaju. Oni jeszu zvershenesha ztvorénja nego lyudi, kajti Dùhi prez téla jeszu, tak kak Bog naj-zversheneshi Dùh takaj tela néma.

2. *Angeli jeszu ztvorjeni da* Da czilya y koncza zpoznate, zakaj Bog Angele ztvoril je, tak morate szamo na ona

paziti, koja angeli zvershavati dusni jeszu. *Boga postu-
ju.*
Pervich moraju Angeli Boga postuvati; lyu-
biti y nyemu sze vklanyati. Ovo nam poveda
szveto pismo visheputi, oszebito David ve-
li: *Díchite Boga, vi vszi Angeli nyegovi*
(Psal. 102.)

Drugoch moraju Angeli Bogu szlusiti.
Szveto pismo nam poveda, da Angeli ne-
preztancze okolo Tronusha Bosanzkoga jeszu.
(Daniel 10.) Jeli morebiti szlusbeniki je-
dnoga kralya zapztuyn pred nyegvem tronushu
ztojiju? Ali jeli morebiti neztojiju zato, da
nyegve zapovedi zvershavaju? Ravno ovak
okolo tronusha Bosjega vu nebu ztojiju takaj
Angeli, da oni zapovedi zpuniju. Kakgoder
szlusbeniki gozpona zprevadyaju, kada on
kam ide, ovak y Angeli zprevadyali y vkl-
nyali, szû sze Kriztushu Gozponu szvõmu,
kada vu szvét doshel je. (Hebr. 1.) Oni
zprevadyali budu nyega takaj, kada on kakti
szudecz doshel bude. (Matth. 16.) Y kak go-
der jeden Gozpon szlusbenike szvoje z-vsza-
koverztnemi poruchki razposhilya, ovak po-
shilya takaj Bog szvoje Angele. Gabriela po-
szlal je on k-Marii. (Luc. 1.) Angela Rafaela
k-Tobiashu. (Tob. 2.) y ovak poszlal je Bog
visheputi Angele szvoje k-lyudem.

3.
*Da Bogu
szlusiju.*

Trejtich moraju angeli lyudi chuvati.
Vszaki chlovek ima szvõga szvétoga Angela
chuvara, to zopet David veli govõrechi: *Bog*
izruchil je tebe szvojem angelom, da te na
vszeh tvojeh puteh chuvaju. (Psal. 90.) Ta-
kaj mala detcza imaju szvõjega angela chupa-
ra; ar Kriztush opominya szvoje Vuchenike,
da nijednoga zmed maláhneh naj nezametava-

4.
*Bog takaj
ztvõril je
Angele da
lyudi chupa-
ju.*

ju, kajti angeli nyihovi vu nebu vszigdar li-
cze Otcza vidiju. (Matth. 18.) Vezda anda
znate, zakaj Bog angele ztvoril je, najmre
da nyega postuju, lyubiju, nyemu sze vkla-
nyaju, y szlusiju, ter lyudi chuvaju.

5.
*Neszrechu
Angelov.*

Vezda vam josche neszrechu angelov,
koja z-nyimi pripetila sze je, pripovedati
hochu. Vszi Angeli ztvorjeni bili szû vu mi-
loztchi, y z-vnogemi zvershenoztjami. Me-
temtoga oni imali szû szlobodnu volyu, y
moralí szû szî vekivechno blasenzstvo po szvo-
ji pokornozti zaszlusiti. Od ovud vchinyeno
je, da vnogi zbg szvoje lepote gizdavi y
oholni poztali jeszu, da sze Bogu podlositi
hoteli nészu, nego da nyemu jednaki biti ho-
teli jeszu. Zbg ovoga gréha gizdozti porinul
je Bog nye taki vu pekel, kak to szvéti Pe-
ter pripoveda (2 Epist. 2.) Ovi vu pekel
hityeni Angeli zoveju sze vráji.

R a z g o v o r i.

1.

*Jeli sze na-
hadyaju An-
geli?*

Koja szû najprestimanésza ztvorenya
Bosja? — Jeli y szvétó pizmo govori od
Angelov? Jeli moramo véruvati, da Bog ta-
kaj angele ztvoril je? Zakaj? Y jeli né Bog
zemlyu z-vnogemi lépemi ztvorenyi napunil?
Jeli miszlish da Bog nebo prazno puztil je?

2.

*Kaj szû An-
geli?*

Jeszi ti vre kada Angela videl? — Mo-
remoli ove videti ali z-rukami pipati? —
Imaju Angeli téla? Zakaj ne? — Kaj veli

pako David? Jeli dichiju Angeli Boga? Jeli zvershavaju oni nyegve zapovedi? — Imaju Angeli razuma y volyu? — Zakaj miszlish ti to, da Angeli razuma y volyu imaju? — Kaj szû anda Angeli?

3.

Jeli miszlish ti, da Bog Angele zapztuyn *Jeszu Ange-* ztvoril je? — Jeli vu nebu nebudu nikakvi *li za postu-* Dùhi, koji Boga postuju y nyemu sze vkl- *vanye Boga* nyaju? — Na kaj opominya David Angele? *ztvorjeni?* Zakaj szû anda Angeli pervich ztvorjeni?

4.

Gdo je okolo Tronusha vu nebu? Jeli *Jeszu Ange-* szlusbeniki jednoga Kralya zapztuyn ztoje *li takaj szlu-* pred Tronushem? Nego zakaj? — Zakaj *sbeniki Bo-* szû anda Angeli okolo Tronusha Bosjega? *si?* Ako Kraly kam van ide, jeli on szam ide? Gdo je iz neba na zemlyu doshel, da nasz odkupi? Gdo je Kriztusha zprevadyal? — Gdo bude nyega zprevadyal, kada on kakti szudecz dojde? Kada koj Gozpon kakvoga poruchka komu poshilya, koga poshilya? — Koga je Bog k-Marii poszlal da nyu kakti mater Bosju pozdravi? Koga je k-Tobiashu poszlal, da nyega zvrachi? — Jeli Bog poshilya Angele k-lyudem? Jeszu Angeli szlugi Bosji? Zakaj?

5.

Koga je Bog lyudem za chuvare odlu- *Jeli Angeli* chil? Jeli ima vszaki chlovek szvojega angela *takaj lyudi* chuvara? Odkud to znash? Jeli neveli Da- *chuvaju?* vid; Bog je tebe szvojem Angelom izruchil? Ali malahna detcza némaju szvoga Angela chuvara? Kaj veli Kriztush od Angelov ma-

lahneh? Chi je lícze vidiyu? — Zakaj je anda Bog Angele ztvoril? —

6.

*Jeszuli ta-
kaj Angeli
vu milozt-
chi Bojsi
ztalni o-
ztali?*

Kak je Bog Angele ztvoril? Jeli je pako Bog hotel Angelom vekivechno blasenztvo prez zaszlusbe nyihove dati? — Jeszu vszi Angeli vekivechno blasenztvo zaszlusili? Kak szû sze oni zoholili? Komu hoteli szû oni jednaki poztati? — Po chem szû anda vnogi angeli miloztchu Bosju zgubili? — Jeli je Bog vchinyeno prekershenye nyim oproztil? Nego? Kak zovemo zahitchene angele?

PITANYE 3.

Zakaj je Bog lyudi stvoril?

Razláganye.

1.
*Chlovek je
najlepshe
ztvorenyie na
zemlyi.*

Naj prestimanesha ztvorenyia Bosja za Angeli jeszu lyudi. Oni szloseni szû iz jednoga téla, y iz jedne nevmertelne dúshe. Ali jezte, moja Detcza! vre visheputi premishlyavali, kak prestimano vashe télo y vasha dúsha vredeyna je? Kaj budete rekli od jednoga chloveka, koj najlepshe zlato y drago kamenye z-szobum noszi, koj metemtoga nigdar videti ali znati nebi hotel, kaj ima? Chlovek je najlepshe ztvorenyie na zemlyi, tak je y pravo, da szam szebe poznati navchi sze.

2.
*Chutenya té-
la chlove-
chanskoga*

Premiszlite jedenput vashe télo. Ovo ima kotrige y chutenya potrebna. Chutenya, kojeh petera jeszu, szlusiju k-tomu, da z-nyi-

mi videti, chuti, delati, kushati y pipati mo-^{jeszu dobro-}
remo; y kuliko veszelje mora to za nasz biti, ^{chinztra}
da mi lepe ztvári neba y zemlye videti, lepo ^{Bosanzka.}
pripovedanye poszluhnuti, chuti y duhu y
czvetje dishati moremo, szlatke jeztvine, y
pitvine nam tèk y smaha imaju, ter razhla-
dyenye y toplinu chutiti moremo. Kuliko do-
brochinzstvo jeszu anda chutenya téla za nasz
kada ova tuliko razveszelenye nam zrokuju!
Y kak hasznovito y primerno vredyeni szû
na hi kotrigi! Mi ne puzimo, kak druga si-
vina na chetiri nogah, z-k-zemlyi prignye-
num glavum, niti ne pobiramo jeztvine nashe
z-zubmi; nego mi ravno ztojimo na dveh
nogah, noszimo glavu proti nebu oszovlyenu,
ter prijemlyemo jeztvine z-rukami nashemi.
Ruke szlusiju nam za délo, noge za iti, jezik
za govoriti, vszi kotrigi za najhasznovitesha
gibanya. Kuliko dobrochinzstvo jeszu anda ko-
trigi tela nashega!

Vezda premiszlimo ztoprav dushu, ka-
kve oszebujne jakozti ima ona! Ona vu nami
miszli, premishlyava, rachuna, prizpoda-
blya, pretreszava, razszudyuje, ona ima an-
da razuma. Dusha more ono, kaj sze navchi-
la, ali razmela je, zapametiti, iz ovoga
vishe puti zmiszliti sze, ona ima anda pamet.
Ona more z-tolnachom kaj potrebuvali ali
zahitavati, ona ima anda volyu. Od ovud do-
hadyaju takaj vnogoverztna chutenya (affe-
ctus) vu dushi. Zverhu nazochnoga dobra
veszeli sze ona, jedno buduche ufa sze. Zver-
hu nazochnoga zla salozti sze ona, buduche-
ga sze pako boji. Veszelye, ufanye, salozt,
ztrah jeszu anda chutenya dushe.

3.
Jakozti y
chutenya
(affectus)
dushe.

4. *Dusha chlo-
vechanzka
je kip Bosji.* Iz ovoga izpisza lahko szuditi morete, zakaj chlovek vu szvètom piszmu kip Bosji oziva sze. Chlovek néje poleg téla kip Bosji, ar Bog téla néma, nego poleg dushe. Dusha je kip Bosji, ne, kak da ona Bogu chizto jednaka bi bila, nego kajti ona nyemu zpodobna je. Ar Bog je Dùh, koj razuma y volyu ima. Dusha takaj je Dùh, koj razuma y volyu ima, vu tom anda je ona Bogu zpodobna.

5. *Czily y ko-
necz chlo-
veka.* Ovak prestiman je anda chlovek. Kame-nye y trave nikaj néchutiju, jedini chlovek sive, chuti, razme, on anda je najprestimaneshе ztvorenyе na zemlyi. Ali k-chemu je Bog chloveku tulike zvershenozti podelyil? Jeli morebiti zato, da szvojega najvekshega dobrochinitelya zametava, proti ovomu sze podigne, y szam szebe neszrechnoga vchini? Ne zaizto, moja Détcza! vi vre znate, da Bog czeloga szvéta za szvoju diku y postenye, y za nashe zvelichenye ztvoril je. Chlovek jedini zmed vszèh ztvorenyih zemlye je prikladen Bogu vklanyati sze, nyemu szlusi-ti, y zvelichiti sze. *Bog anda ztvoril je lyu-di, da nyega zpoznaju, lyùbiju, nyemu sze vklanyaju, szlusiju, pokorni budu, y zveli-cheni poztanu.*

6. *Gréh perva-
ga chloveka.* Metemtoga vre pervi chlovek Adam zku-pa z-szvojum senum Evum bíl je Bogu nepo-koren. Bog dopuztil je nyim iz vszèh szado-vnéh drev vu Paradisushu jezti, szamo iz je-dnoga jedinoga prepovedal je nyim jezti. Ali jedna kacha, iliti vnogo bolye Dùh peklenzki vu zpodobni kache zapelyal je Evu, y ova za-pelyala je Adama, da od prepovedanoga szá-da jeli jeszu. Ov gréh neizmerno skodel je

pervem lyudem. Ov zrokuval je vremenitu y vekivechnu szmert, vnoze szuprotivchine y betege na télu, tmiczu y zla nagnenya na dushi. Mi moramo ravno tak, kak y oni vumreti, mi chutimo ravno tak tmiczu razuma, y zlochézta nagnenya vu nami, mi jeszmo anda greha pervih lyudih, y vekivechne szmer-ti krivczy poztali. Y ovo moramo véruvati, ar Bog nam je to po Pavlu Apostolu ochitu-val, kada na Rimlyane pishe: *Kakgoder po jednom jedinom chloveku doshel je na szvát gréh, y po gréhu szinert, tak je zverhuvszeh lyudih szmert doshla, vu kojem vszi zagreshili jeszu.* (Rom. 5)

Vendar nészu lyudi, kakti gizdavi Ange-li'za na véke od Boga odhitcheni. Bog obechal je za oszlobodyénje lyudih zaradi gréha od-hitcheneh odkupitélya poszlati, koj takaj Me-sziash imenuje sze, koj lyudi iztina je, ne od vremeniteh kastig, nego od gréha y od veki-vechne kastinge oszloboditi ima. Ovo obecha-nyé néje Bog jedenput nego visheputi pono-vil, doklam Jesush Kriztush doshel je bil, kak nam to knyige ztaroga zakoua, oszebito pro-roki, ochituju.

7.
Obechanye
jednoga Od-
kupitélya.

R a z g o v o r i.

1.

Koja szû za Angeli naj prestimanesha ztvorenja Bosja? — Iz chesza szû lyudi zkupzpravlyeni? — Jeszi ti tvoje télo, y tvoju dushu visheputi premishlyaval? — Ako gdo najleshe zlato vu sepu bi imal, ter nebi

Jeli mora
chlovek sze-
be szamoga
poznati na-
vchiti sze?

hotel znati, kaj ima, bili on bil zpameten? Gdo je najlepše ztvorenje na zemlji? — Jeli mora chlovek sžebe szamoga poznati navchiti sže? —

2.

Jeszuli chutenya jedno veliko dobrochinzstvo?

Koja dobrochinzstva imash ti na télu? — Nemash chutenya y kotrige? — Kuliko imash chutery? K-chemu szû ova? — Jeli sže ti veszelish, kada lepe ztvary videti moresh? Kada kaj lepoga poszluhnuti y chuti, kaj vugodnoga dishati — moresh? Kakvo veszelje zrokuju anda tebi chutenya? Jeszu chutenya jedno veliko dobrochinzstvo? — Zakaj? Jeszu kotrigi takaj jedno dobrochinzstvo? — Jeli puzish ti na chetvericzi kak y neme ztvary? • Nego kak? Je tvoja glava k-zemlji prignena? Ali jeli y ti pobirash hranu z-zubmi, kak y sivina? Kak je tvoje telo szloseno? K-chemu szu ruke? Noge? Jezik? Vszi kotrigi? Zakaj szû kotrigi jedno veliko dobrochinzstvo?

3.

Imali dusha chlovekara-zuma, pamet, szlobodnu volyu, y chutenya?

Je dusha prestimanisha od téla? Kaj chuti vu télu? Kaj giblye telo? Jeli ima dusha szamo jakozti chutenya y gibanya? — Kakva je razluka med kamenom y vunum? Vidishli vezda kamena y vunu? — Kak moresh od oveh govoriti? Moreshli szi kakvo dugovanye miszliti? Moreshli jedno dugovanye od drugoga razluchavati? — Ako te gdo pita, jeli platchu hochesh, budeshli *ne* rekel? Nego? — Ako te gdo pita jeli kastigu hochesh, budeshli takaj *je* rekel? — Znashli anda szuditi? Zakaj? Zakaj velish ti na pitanye od plache, *je*? Znashli ti od kakvoga

dugovanya zroka takaj povedati? — Kak sze ova jakozt dushe zove? Imali tvoja dusha razuma? Zakaj? Moreshli szi kaj miszliti? — Imali dusha takaj pamet? Jeszi sze vre *Otecz nash* navchil? Jeszi ovoga vre pozabil? — Moreshli szi kaj zapametiti, iz chesza sze zmiszliti? Ima tvoja dusha pamet? Zakaj? — Jeli szi ti kaj zloga selish? Nego? Kaj zame-tavash ti? Ima tvoja dusha volyu? Zakaj? Kada ti lén jeszi, jeli te gdo k-tomu primora? Zakaj szi anda lén? — Jeli szi kada kaj po-lég szvoje volye zbirash? Imash ti szlobodnu volyu? Kakve jakozti ima anda dusha chlove-chanzka? Koja szû zglavna chutenya dushe tvoje? Ako ti gdo kaj lepoga dà, kaj chutish anda? Ako ti pako gdo za zutra kaj lepoga obechuje, jeli y onda veszelje chutish? — Ako ti pako gdo obechano dugovanye ne da, jeli sze y onda veszelish? Nego? — Ako te pako kastiga chaka, jeszi ti y onda salozten? Koja szû anda zglavna chutenya dushe?

4.

Na chiji kip je chlovek ztvorjen? — Je ^{Poleg chije-}chlovek poleg téla ná kip Bosji ztvorjen? ^{ga kipa szû} Zakaj ne? Ima Bog télo? — Je pako Bog ^{lyudi ztvor-}jeden Dùh? — Ima Bog razuma y volyu? — Je dusha takaj jeden Dùh, koj razuma y vo-lyu ima? — Je dusha chloveka kip Bosji? Zakaj?

5.

Koja ztvàr je na szvétu tak prestimana ^{Zakaj je Bog} kak chlovek? — Jeli némaju neme ztvàri du- ^{lyudi ztvor-}shu, anda szû y néme ztvàri tak prestimane, ^{rit?} kak y lyudi? — Zakaj ne? Znali pesz zakaj batina bolye boli, nego szlama? Znajuli nè-

me ztvàri razluchavati? Kakvu dushu ìmaju nème ztvàri? — Zakaj nészu anda nème ztvàri tak prestimane, kak lyudi? — Jeli je pako Bog lyudem zato tulika dobra izkazal da oni Boga zametcheja? Ali morebiti zato, da szebe neszrechne vchiniju — Zakaj je Bog szvéta ztvoril? — Gdo je na zemlyi vu ztalishu Bogu vklanyeti sze, y zvelichiti sze? — K-chemu je anda Bog chloveka ztvoril?

6.

*Jeszuli lyudi
Bogu pokorni
ni oztali?*

Jeszuli lyudi Bogu pokorni oztali? — Kakvu zapoved je Bog dal pervem lyudem? Je Bog nyim dopuztil od vszeh drev. jéztì? Jeszu pervi lyudi ovu zapoved obdersavali? Gdo je Evu napelyal? Moreli kacha govori-ti? — Jeli ova kacha bila jedna navadna, naravzka kacha? Zakaj ne? Gdo je bil anda vu zpodobi kache? Jeli dobri duhi na zlo napelyivaju koga? — Je ov gréh pervomuchloveku skodel? — Kakvu szmert je ov nyemu zrokuval? — Kojà zla téla je ov nyemu doprineszel? — Jeli je ov gréh szamo pervomu chlovuku naskodil? — Jeli nevumiramo mi takaj? Je szmert jedna kashtiga, ali platcha? Jeli y malahna detcza kastigu terpiju? — Jeszu detcza szamo zagréshila? Zakaj anda kastigu terpiju? — Kak sze zato gréh Adamov oziva? — Jeli je Bog takaj ochituval, da mi gréha Adamoga delniki poztali jeszmo? — Kaj veli sz. Pavel, kaj je po jednom chloveku na szvét doshlo? —

7.

*Kaj je Bog
obechal za
oszlóbodye-
nye lyudih*

Jeszuli pako lyudi takaj kak y gizdavi Angeli od Boga za naveke odhitcheni? — Kaj je obechal Bog za oszlóbodyenye lyudih?

Jeli je odlüchen bil Mesziash da lyudi od ^{zaradi gre-} ^{ha odhitc e-} ^{neh?} vremenite kashtige oszlobodi? Nego od chesza? — Jeli je Bog ovo obechanye szamo jedenput vchinil? — Kak dugo obechal y nazveztchal je Bog Mesziasha?

I. Dokànychanye Nàvuka.

Dva Angeli osslobadyaju Lothu y nyegove iz Szodome.

Bog jednoch po Angelu ochituval je pobosnomu Abrahamu, da on dokonchal je hmanye ztanovnike Szodome y Gomorhe kastiguvati, y nyihove varashe porushiti. Jeden jedini pobosni chlovek sival je josche vu Szodomi, y ov zval sze je Loth, y bil je ztricz Abrahamov, koj nekuliko vrémena vu varashu zadersaval sze je. Loth jedini miszlit je na Boga, y szleduval je peldam y navukom, koje nyemu Abraham dal je, kada josche zkupa ztanuvali jeszu. Vszi drugi ztanovniki siveli szû, kakti nezpametni lyudi, y gorje kak sivi-na. Josh on izti vecher, kada Abraham od nakanenya Bosanzkoga podvuchen bil je po Angelu, doshli szû dva Angeli vu Szodomu. Loth szedel je ravno na vratesh varasha, kada ovi Angeli vu zpodobu putujucheh ztranzkêh k-nyemu priztupili jeszu; on ztal sze je, ishel nyim naproti, nye pozdravil, y ponudil nyim hisu szvoju za nochni ztán. Oni zahvalili szû nyemu, y rekli, da onî nyemu neprilichni biti necheju, nego da na vuliczi prenochiti hocheju. Metemtoga Loth proszil je nye josche jedenput, da k-nyemu sze naj naverneju, y da szî z-nyegvum hisum y ztolom naj poszlusijn. Zadnich privolyili szû oni y dali sze vu hisu zapelyati, y podvoriti. Czelu noch oztali szû oni pri Lothu, y

nyemu vu priatelzkom zpomenku ochitivali, gdo jeszu, y zakaj vu Szodomu doshli jeszu. Ov varashi, rekli szû oni, blizu je szvômu porushenyu. Ovakvi hmanyi y razvuzdani lyudi nészu vredni da jeden dan josche siveju. Zutra bude Jehova, tojezt Bog, nye vsze zkupa zkonchal; on nasz je poszlal, da tebi to povémo, y tebe taki z-nasztajuchem dnevom iz varasha izpelyamo.

Kak berse anda dan oszvenul je, tak vzeli szû Angeli nyega, senu, y kchere nyegove, y izpelyali ove iz varasha. Komaj bili szû izishli, tak vchinyeno je, kaj Angeli povedali jeszu. Zverhu Szodome y Gomorhe podignuli szû sze ztrahoviti Oblaki, y vnosina ztrel vusgale y posderle szû varashe, ter izta zemlya, na koji varashi ztali szû, gorela je plamnôm. Chez nekuliko hipov bili szû ovi varashi jeden kup shute y kamenya, y vszi ztanovniki nyihovi pod ovemi pokopani. Loth z-szvojemi dvemi kcherjami pobegel je vu jeden blisnyi varashinecz, koj potlam Szegor ozvan bil je, gde nyegva sena, kajti ona proti prepovedi Angelov zezvedlyivo ogleдела sze je, *na jeden ztup szoli obrnula sze je.* (Mojs. 19.)

Néli, moji Dragi! ovo je jedno lepo pripovedanye? Ali kaj sze iz ove vuchiti morate? Vi z-czelum katholichanzkum Czirkvum nemorate szamo véruvati, da Angeli nahadyzju sze, nego da ovi oszebito za chuvare lyudih poztavlyeni jeszu. Zpoznajte y dichite neizmernu mudrozt y dobrotu najvekshega Boga, koj ne zadovolyen, da nasz na kip szvoj ztvoril je, takaj angele ztvoril je, da vasz na vszeh putéh vashih chuvaju, y braniju. Vchinite ali takaj zajedno vasz ove odichene obrambe oveh vasheh chuvarov vredna, sivite pobosno, sivite pravichno kak Loth sível je, tak budu y ovi vsze téla y dushe pogibelyi od vasz odvrtchali, vasz cd vekivechnoga zkvarjenja hmanyeh oszlobodili, y

pri odhotku iz ovoga szvéta vasz vu najblaseneshi varash y ztan Bosji zprevodili. Amen.

II. Dokànychanye Nàvuka.

Lazar vu naruchajû Abrahama, y bogatush vu pekle, naj nass zbudyavaju, da Csilyu nàshega stvarjanyja primerno sivemo.

Poszluhníte, Dragi! dânesz na konczu nashega Navuka jednu navuka punu prizpodobu, koju jednoch Jesush Kriztush szvojem vuchenikom napervoztavil ije. Bil je jeden bogatush, koj sze zmosno opravlyal je, y koj szî vszaki dan vsza vchinil je, koja szamo nyegvo szerdce poselelo je. Jeden szîromaski chlovek imenom Lazar, koj na czelem têlu betesen bil je, y zbgog toga szvôga kruha z-dêlom zaszlusiti né mogel, lesal je pred vrati ovoga bogatoga chloveka, y zadovolyen bi bil z-najmenshem almushtvom, ter zahvalil bi bil Bogu y lyudém ako szamo drobtine kruha, koje iz ztola bogatusha padale jészu, nyemu za del bi bile poztale. Metemtoga bogatush pri vszoy nevolji ovoga szîromaka oztal je negenyen, on puztilgâ je prez pomochi pred vrati lesati y nije bil niti jedenput tak priatelzki z-nyim, kak czuczki, koji nyegve rane lizali jészu. Chez kratko vreme premenil sze je ztalish obodveh. Szîromaski Lazar vumerl je, y oszlobodyen bil je od vszake nevolje; ter kajti takaj vu poszebochi y nevolji pobosen y krepozten bil je, tak bil je prijet od Boga vu veszelja vekivechna vu Nebo. Bogatush takaj je vmerl, y {moral je szvoje peneze, szvoja goztchenya, czeloga szvojega imetka oztaviti, y bil je kakti jeden neokorni, nemiloszerni y zlochezti chlovek vu pekel porinyen, gde muku y traplenya terpeti je moral.

Kada anda jedenput bogatush ochi szvoje bi bil podigel, tak iz dalka zapazil je od szebe zamešavanoga Lazara vu naruchaju Abrahamovem, y vu vsivanyu neizgovorlyivoga blasenziva. Bogatush pogibal je od prekoredne selye, ter da sze nyemu muke nyegvezlehotiju, tak obernul sze je k-Abrahamu, y krichal: *Otecz Abraham, szmíluj sze meni, ter poshli mē Lazara, y puzti nyega da szamo perzta szvoga vu vodu zamochj, y jezika mogá razhladi, ar ja jako vu plamenu trapim sze.* (Luc. 16) Metemtoga iz pravichne kastige zbg nyegvoga vu vugodnoztí y v-obilnoztí zprevodyenoga sívlenya bila je nyemu proshnya zkratchena. Szinko, rekel je Abraham k-nyemu: *Zmiszli sze, ti szí sze dobra vsil vu sívlenyu tvojem, Lazar pako zlá, vezda nashel je on batrivozt, ti pako muku.* (Ibidem.) Bogatush josche jedenput proszil je Abrahama, y rekel k-nyemu: *O Otecz! tak proszim te konchemar, poshli Lazara vu hisu Otcza móga; ar imam josche pēt bratov siveh, da nye naj opomene, da sze pobolshaju, da ovak ovornu meztu muk, vu kojem ja nahadyam sze, sze vugneju.* Ali Abraham izkratil mŭ je y ovu proshnyu, y odgovoril mŭ: *Koja vezda od mene potrebujesh, ova za blasenzivo tvojeh bratov nészu potrebna; oni imaju Mojsesha y Proroke — ako oni Mojsesha y Proroke neposzluhneju, tak y ovomu véruivali nebudú, koj od mertvéh bi sze ztal.* (Ibidem.)

Dragi! ja nedvojim, da vi iz ove zkrovnoztí pune prizpodobe nashega Odkupitelya tak Czily vashega prebivanya na zemlyi, kak y z-ovem zjedinyenu platchu, ali kashtigu, koja nasz jednoch tam chaka, prevideli nebi. Mi nészmo vu ovom szvétu ztvorjeni, da bogati poztanemo, na chazti podignemo sze, y vu vuhkochi y v-obilnoztí dneve sívlenya nashega potepemo, nego da Bogu szlusimo, nyemu pokorni y podlosni jeszmo da nyegve szvéte zapovedi obdersavamo, y nyegvu vo-

Iyu tak vu szrechi kak y vu neszrechi véрно ízpunimo. O nasz szrechne! ako Czilyu ovomu odichenomu vszako vreme primerno sivemo! mi budemo, poklamkam ovde na zemlyi pobosnomu Lazaru na zpodobu Bogu szlusili jeszmo, takaj jednoch z-nyim vu naruchaju Abrahamu vekomu pochivali, gde metemtoga hmanyi z-bogatushem vu peklu neizpiszlyive muke terpeti budu morali. Amen.

III. Bokànychanye Nàvuka.

Zroki, iz kojeh Bogu véрно szlusiti moramo

Bog anda moji Dragi! nasz je ztvoril, da nyemu szlusimo, y jednoch zvelicheni poztanemo. Nut kulike zroke nahadyamo vre vu iztom Bogu, da ovomu Czilyu ztvaryanya primerno sivemo, ar ako mi Bogu szlusimo, tak szlusimo mi najvekshemu, najbolshemu Gozponu; On je Gozpon neba y zemlye, on je Kraly vszeh kralyev; on je ladavecz czeloga szvéta, pred kojega tronushem vszi dùhi nebezki na szvoja lícza padaju; pred kojega shibum vszi Kralyi zemlye derhtaju, pred kojega velikochum vszi velikashi szvéta prah y nikaj nészu. Szudite vezda iz ove velikoche ovoga Gozpona, kulika dusnozt nasha je, da nyemu szlusimo. Vre vu hipu, kada on nam nashe bitje dal je, zaszadil je vu dushu nashu one vnogo znamenujuche rechi: *Szamo Gozponu, Bogu tvojemu, uklanyal sze budesh, y nyemu szamomu szlusil.* (Matth. 4.)

On anda pochemshi od narodyenye nashega odluchil je nasz za szvoju diku, y za szvoju szlusbu. Ova dusnozt je anda tak ztara, kak y nashe bitje, nam tak laztozita, kak nashe sívlenye. K-tomu jeli né to bila na szvetem kerztu, gde na nyegvu szlusbu nasz zavezali jeszmo? Jeli neszmo obechali, da dusnozt y chazt

jednoga szluge Bosjega vszigdar zpunili budemo? Tak je, mi szmô to obechali, mi szmô nyegvi szlusbi nasz szame na zalog dali. On je nash najvekshi Gozpon, mi szmô nyegvi szlusbeniki.

Pridajmo josche to, da ov veliki Gozpon zkupa najbolshi, naj dobrotivneshi Gozpon je! Mi poszlujuchi za szvét aldujemo nashe jakozti, y potroshimo nashe sivlenye; ter kak nasz naplatcha szvét? Ah! k-vnogem, koji zverhu nyegve nevérnoztí sze saloztiju, z-Duhom szvetem rechi bi mogli: *Vi zté vnogo szejali, y malo sèli.* (Haggae 1.) Kuliki trudi vnogiput pri szlusbi szvéta prepoznaju sze? Kuliki chizto nigdar, ali szamo zlo naplachaju sze? — Ali pri szlusbi Boga nebiva ovak; od Boga vsza zpoznaju sze, od nyega vsza primeju sze, y obilno naplatchaju sze. Pred nyegve-mi ochmi nikaj ne oztana zkrito; nyegye dareslyive ruke nikaj nepuztiju prez platche, on ne naplatchuje szamo zmosne y velike chine szvojev muchenikov, nego on naplatchuje takaj najmenshe chine, koje vérni vu nyegvem imenu zvershavaju, z-vekivechnum plat-chum.

Kulika dika, kulika szrecha je anda to za nasz Dragi! da jednemu tak velikomu, tak dobromu Gozponu szlusiti moremo? Z-kulikum lyubavjum, z-kakvem szvétom veszeljem moramo nyemu szlusiti; z-kulikum marlyivoztjum moramo vsza nasha mishlenya y vsze nashe zkerbi, vsza giblenya nashega szerdcza, vsze hipe nashega sivlenya nyegvoj szlusbi alduvati! — O Bose! ja hochu anda od vezda tebì szlusiti, ja hochu tvoje zapovedi vszigdar verno izpuniti, ja hochu tvoju szvetu volyu z-veszeljem zvershavati; doztojaj szamo neztalnozt moje volye z-tvojum miloztchum objachiti, da tvojoj szlusbi z-nepremeryivum vernoztjum alduvati sze morem. Amen.

NÀVUK 6.

Od drugoga y trejtoga kotriga Vère.

*Od bosanstva, prijetja y narodjenje-
nya Jesusha.*

PITANYE 1.

Kak sze isgovarja drugi kotrig vére?

*Isgovarja sze ovák: Ja verujem vu Jesusha
Kriztusha szina nyegvoga jedinoga Gospona
nashega.*

Rasláganye.

Vre zadnyiput vam povedat jeszem, ^{1.}Da Meszia-
moja Detcza! da Bog za oszlobodyenye za-
verseneh lyudih jednoga Mesziasha iliti odku-
pitelya obechal y do dosheztki Jesusha Kri-
ztusha nepreztancze nazveztechati dal je. Ova
obechanya y prorochantzva chtejemo mi vu
szvètom pizmu ztaroga zakona. Vi budete vez-
da vre znati hoteli, jeli ov odkupitely doshel
je, y gdo on je? Ar nikaj szî bolye nemre-
mo selyeti kak odkupitelya. Miszlte szî, da
vi od divjih lyudih vu szusanztvo bi bili od-
pelyani, ali da y na iztu szmert van bi bili
poztavlyani, jeli vi nebudete selyeli jednoga
Odkupitelya, y nyega poznati terszili sze?
Nut odkupitely bil je odluchen, da nasz od

^{1.}Da Meszia-
sha pozna-
moje potreb-
no y vrednq.

szusantzva duha peklenzkoga, y od vekivech-
ne szmerti odkupi, on imal je nasz detczu
Bosju y odvetke sivlenya vekivechnoga vchi-
niti; kak drag y poznanya vreden mora anda
on nam biti! Tak je moja Detcza! vi nyega
dańasz poznati navchili sze budete.

2.
*Mesziash je
Bog.*

Kajti gréh jedno zbantuvanye Bosanzko,
y zato neizmerno veliko zlo je, tak nasz niti
Angel, niti chlovek od ovoga odkupiti né
mogel; ar niti Angeli, niti lyudi nemaju ne-
izmernu jakozt. Bog szam po Prorokih dal
nam je za razmeti, da szam doshel, y nasz
zvelichil bude. *Bog szam, veli Izaiash Pro-
rok: doshel bude, y vasz zvelichene vchinil.*
(Isaiae 35.)

3.
*Jesush Kri-
ztush je je-
dinorodnyi
szin Bosji.*

Y vu iztini pred jezero oszem zto tride-
szet y devetemi leti, poklamkam szvét vre
chetiri jezera let ztal je, rodil sze je chlovek,
koj Jesush Kriztush zval sze je. Mi znamo
pripovedanye nyegvo iz szvétoga pizma no-
voga zakona. Ov bil je jeden chizto oszebuj-
ni chlovek; ar pri nijednem chloveku nészu
sze josche tulika chûda dogodila, kak pri
nyém, kak vre chuli budete. On szam izdal
sze je za szina Bosjega; y potverdil szvoje re-
chi z-chudóchini. Mi iztina je, jeszmo takaj
Szini Bosji, ali szamo najeti po miloztchi;
da pako nemiszlino, da Jesush Kriztush ta-
kaj szamo jeden najeti szin, nego da on pravi
szin Bosji je, tak nyemu vu szvétom pizmu
bosanzke laztovitozti, bosanzki nakloni pri-
pishuju sze. Szveti Pavel pripishuje nyemu
vszamoguchnozt, ar on veli: *da vsze ztvári
po Jesushu Kriztushu vchinyéne jeszu.* (Co-
loss. 1.) On pripishuje nyemu bosanzkoga

naklona, kada veli: *da pred imenom Jesusha vsza kolena pregibati sze tmaju.* (Philipp. 2.) Jesush Kriztush anda vu iztini je jedino rodyeni Szin Bosji, kajti nyemu ne szamo Ime jedinorodyenoga szina Bosanzkoga, nego takaj Bosanzke laztovitozti y nakloni pripishuju sze.

Metemtoga Jesush Kriztush néje szamo jedinorodyeni szin Bosji, anda pravi Bog, nego on je y chlovek zkupa. On néje nikakvo izlichno télo, nego jedno pravo chlovechanzko télo na sze vzel. *Rech je télom poztala,* veli szveti Evangelista Janush, *y prebivalo je vu nami.* (Joann. 1.) On vzel je jednu pravu chlovechanzku dushu; ar Kriztush sham veli na gori olivetanzki: *moja dusha je turobna do szmerti.* (Matth. 26.) Kriztush anda je takaj pravi chlovek, y zato oziva on sham szebe vnogiput szina chlovechjega; kakti Bog je on od veka. Chlovek pako je on vu vremenu poztal.

4.
Jesush Kriztush je Bog y chlovek zkupa.

Okoprem pako vu Kriztushu dve narave jeszu, bosanzka y chlovechanzka, pokehdob on Bog y chlovek zkupa je, tak vendar je szamo jedna oszoba vu Kriztushu, kajti szamo jeden Kriztush je. Y to druga bosanzka oszoba, Szin, ne pako Otecz ali Duh szveti, je vu Kriztushu Chlovekom poztala; ar Jesush Kriztush szin Bosji oziva sze. Nadalye, vu Kriztushu je bosanzka narava z-chlovechanzkum zjedinyena, ali né zmeshana, kak morebiti voda z-vinom zmeshajushe, kak berse ova zjediniyu sze; nego kagoder zlato vszidgar chizto zlato oztaje, takaj vu jedni zemlyeni poszudi, ovak oztala je takaj bosanzka

5.
Szamo jedna je oszoba vu Jesushu, ali dve chizto nezmeshane narave.

narava chizta y nevrasena pri zjedinyenom chlovechanstva. Zadnich moramo rechi: *Szin Bosji je za nasz vumerl*; ali mi moramo po tom razmeti, da poleg chlovechanzke narave, ar bosanzka je nevmertelna. Mi moremo rechi: *Krizontush je vszamoguchi, vekivechni*. Ali mi moramo po tom razmeti poleg bosanzke narave; ar chlovechanzka je slaba y vmertelna.

6.
Jesush je obechani odkupitely. Y pravi Jesush Krizontush o-ziva sze.

Jesush Krizontush je obechani Mesziash, iliti nash zvelichitely y odkupitely; ar mi znamo Proroke y pripovedanya Jesusha Krizontusha naj chtejemo, tak zpoznali budemo, da vsa vu nyim zpunyaena jeszu, koja Proroki od Mesziasha nazveztili jeszu. Jesush znamenuje tuliko, kak zvelichitely. Po Jesushu je nam zvelichenye vchinyeno, kada on nasz od krivnye, od kashtige gréha, y od vekivechne szmerti oszlobodil je. Ovo pokasuje nam zvun vnogéh drugeh piszczev Angel, kada Josefu od Marie matere Jcsusha rekel je: *Ona porodila bude szina, y budesh ime nyegvo zval Jesush; ar on hoche lyudztvo oszloboditi od gréhov nyihoveh*. (Matth. 1.) Zato Jesush Zvelichitely imenuje sze. Jesush takaj Krizontush, tojezt namazani, imenuje sze; kajti szvéti Peter vu chinih Apostolzkih veli: *da Bog Jesusha nazarenzkoga z-Duhom szvetem, y z-krepozjtum namazal je*. (Actor. 10.)

7.
Jesush Krizontush je nash Gozpon, Zakupim, y navuchitely.

Jesush Krizontush je takaj nash Gozpon. Kada mi kakvo dugovanye napravimo, ali kupimo, tak szmô zverhu ovoga Gozpon, Ali nut Otecz nebezki je vsze ztvori po Jesushu Krizontushu ztvoril, Jesush Krizontush takaj z-czenum kervi szvoje nasz je prikupil,

mi szmò anda chizto nyegovi, y on je nash Gozpon. Gozpon more szlugom szvojem, anda more y Jesush Kriztush nam zapovedati. On nam y vu iztini dal je novoga zakona, iliti nové zapovedi vére, dersany, y Shakramente; zato je on takaj nash zapovednik, y navuchitely. Vezda anda znate, draga Detcza! gdo Jesush Kriztush je. *On je najmre jednorodnyi Szin Bosji, Bog, y chlovek zkupa, nash Gozpon, Zapovednik, y Navuchitely.*

Razgovori.

1.

Kak sze izgovarja drugi kotrig vére? — *Vu kojeh szknigah chtejemo mi prorochanstva od Mesziasha?* Kak dugo je Bog dal od Mesziasha prorokuvati? — Do chijega doshezika? — Vu kojeh bosanzkih knîgah chtejemo mi prorochanstva od jednoga Mesziasha? — Kak sze zove szvétó pizmó pred dosheztom Jesusha Kriztusha popisano? — Ako ti od divjih lyudih bisze vlovil, kaj bi ti selyel? Ali ako ti na szmert bi bil obszudyen, kaj bi szí ti selyel? Od chesza imal je nasz Mesziash odkupiti? od kakvoga szusanstva? — Od kakve szmertí? — Je dosheztek Mesziasha za selyeti bil? Zakaj? Kaj szí ti tvojemu odkupitelyu dusen? Jeli morebiti on tebi zahvaliti sze ima? — Morashli ti tvojea odkupitelya poznati navchiti sze? Zakaj?

2.

Jeli bi mogel nasz Angel ali chlovek od *Je Mesziash Bog?* gréha odkupiti? — Koga zbantujemo mi po

gréhu? Je Bog neizmeren? Kak velik je anda gréh? Jeli gréh potrebuje od nasz jednu neizmernu zadovolyschinu? Zakaj? — Imali Angel ali chlovek neizmernu jakozt? — Zakaj nebi nasz mogel niti Angel niti chlovek od gréha odkupiti? — Gdo ima neizmernu jakozt? Y kaj veli Izaiash, gdo bude doshel nasz zvelichene vchiniti? — Jeli je Mesziash Angel, ali szam chlovek? — Zakaj Bog? —

3.

*Je Jesush
Kriztush je-
dinorodnyi
Szin Bosji?*

Pred kulikemi letmi je Jesush Kriztush rodil sze? Koje leto vezda pishemo? — Kak dugo je szvet vre ztal, kada Jesush rodil sze je? — Iz kojeh knig znamo mi pripovedanye od Jesusha Kriztusha? — Kak sze zove szveto pismo koje po dosheztku Jesusha popiszano je? — Jeszu sze pri kém tulika chûda pripe-tila, kak pri Jesushu Kriztushu? — Za chijega szina izdal sze je Jesush Kriztush? — Po chem podtverdil je on szvoju rech? — Nészmoli y mi szini Bosji? — Tak szmô anda Jesushu K. jednaki? — Jeszmo mi naravzki ali po miloztchi vchinyeni szini Bosji? Je Jesush Kriztush takaj najeti szin Bosji? Nego kakov? — Zakaj nészmo anda Jesushu Kriztushu jednaki? — Zakaj oziva sze Jesush Kriztush vu szvétom pizmu jedinorodnyi szin Bosji? — Jeli sze Jesush Kriztush szamo szin Bosji oziva? — Kakve laztovitozt, kakvi nakloni sze nyemu pripishuju? — Je vszamoguchnozt jedna bosanzka laztovitozt? — Y kaj veli Pavel: po chem szû vsza ztvorjena? Kakva bosanzka laztovitozt pripishuje sze ovde Jesushu? Zakaj vszamoguchnozt? — Y kaj veli nadalye Pavel; pred chijem ime-

nom imajusze vsza kolena prignuŭi? — Kakov naklon sze anda nyemu pripishuje? — Zakaj bosanzki? —

4.

Jeli je Jesush Kriztush szamo Bog? Ne- *Je Jesush Kriztush pravi chlo-vek zkupa?*
go gdo josche? — Iz chesza je szlosen chlo-
vek? Je imal Kriztush pravo t lo chlovechan-
zko? Y jednu pravu dushu? Kaj veli sz. Ja-
nush Evang. kaj je rech Bosja poztala? —
Zakaj je imal anda Kriztush jedno pravo t lo?
Kaj je rekel Kriztush na gori olivetanzki od
szvoje dushe? — Je imal Kriztush takaj jed-
nu pravu chlovechanzku dushu? Zakaj? —
Zakaj je Kriztush Chlovek zkupa?

5.

Kuliko je vu Kriztushu naravih? Je on *Kuliko je vu Kriztushu naravih, y kuliko oszobih?*
szamo Bog? Gdo josche? — Jeszu takaj dve
oszobe vu Kriztushu? Zakaj je szamo jedna
oszoba vu Kriztushu? Jeli sz  dva Kriztushi?
Jeli je perva, ali trejta bosanzka oszoba chlo-
vekom poztala? — Kak sze imenuje druga
bosanzka oszoba? — Chiji szin imenuje sze
Kriztush vu szvetom pizmu? — Koja oszoba
je anda Kriztush? — Je bosanzka y chlove-
chanzka narava vu Kriztushu zjedinyena? —
Jeszu ove takaj zmeshane? Zakaj ne? Moreli
bosanzka narava gorsha poztati? Jeli nebi ona
mensha y gorsha poztala, ako ona z-chlove-
chanzkum zmeshana bi bila? — Jeli zlat  ne-
oztaje chizto zlat  takaj vu zemlyeni poszudi?
Jeli oztaje bosanztvo nevraseno takaj pri zje-
dinyenom chlovechanztvu? — Jeli skodi vte-
lovljenje bosanztvu? Zakaj ne? — Moremo-
li rechi, szin Bosji je vumerl? — Moreli bo-

sanzka narava vumreti? — Kak moremo anda rechi: Szin Bosji je na krisu vumerl? — Jeli szin Bosji né takaj naravu chlovechanzku na sze vzel? — Moremoli takaj rechi: Kriztush je vszamoguchen? — Jeli né Kriztush chlovek? Kak moremo anda rechi: Kriztush je vszamoguchen? Ima Kriztush szamo jednu chlovechanzku naravu?

6.

*Je Jesush
Kriztush o-
bechani Me-
sziasz? Za-
kaj sze on
Jesush, y
Kriztush
imenuje?*

Vu kem szû sze nazveztchenya prorokov izpunila? — Gdo je obechani Mesziash? Zakaj Kriztush? — Kak znamo pako, da pro-rochanztva vu Kriztushu zpunyena jeszu? Ako jedino pripovedanya od Jesusha Kriztusha chtejemo? — Kaj znamenuje Jesush? — Zakaj Jesush imenuje sze Zvelichitely? — Kak sze Jesush josche imenuje? Zakaj sze Jesush takaj Kriztush tojezt namazani imenuje? Kaj veli sz. Peter, z-chem je nyega Bog namazal?

7.

*Je Jesush
Kriztush
nash Gozpon
zapovednik
y navuchi-
tely?*

Kada ti kakvo dugovanye kupish, jeszi ti Gozpon onoga dugovanya? — Z-chem nash je Jesush Kriztush odkupil? — Je Jesush Kriztush nash Gozpon? Zakaj? — Moreli nam nash Gozpon zapovedati? — Je nam Jesush Kriztush novi zakon-dal? — Je Kriztush nash zapovednik y navuchitely? Zakaj? — Gdo je anda Jesush Kriztush? —

PITANYE 2.

Kaj zadersava vu szebi trejti kotrig vere?

Razláganye.

Trejti kotrig vére izgovarja sze ovak: *Jesush Kri-
zush izha-
dya iz szé-
mena Abra-
hamoroga, iz
pokolenya
Jude, y iz
plemena
Davidovoga.*
1.
koj je prijet od Dúha szvétoga, rodyen od
Marie Devicze. Odvetki Adamovi vchinili szú
tulike gréhe, da Bog po ztrashni povodnyi
vsze lyudi zvun Noema, y nyegovih potopil
je. Ali takaj poszlednyi Noema opali szú vu
veliki gréh bolvanztva. Ovde zebrał szî je Bog
jednoga pobosnoga chloveka Abrahama za
szvoju szlusbu, ovoga je szegurnoga vchinil,
da iz nyegvoga plemena obechani Mesziash iz-
hadyal bude. Abraham rodil je Izaaka, y
Izaak Jakoba. Ov Jakob dobil je od Boga ime
Izrael. On imal je dvanaizt szinov, iz oveh
jeszu Izraelczy, iliti dvanaizt pokolenya izrae-
la izishla. Jakob prorokuval je, da od nye-
gvoga szina Juda jedno pokolenye, y iz ovo-
ga pokolenya Mesziash izhadyal bude. Ravno
ovo izto obechanye vchinil je potlam Bog Da-
vidu, velikomu Kralyu iz pokolenya Jude, iz
chijega plemena potlam Maria mati Jesusha
bila je. Od ovud odperto videti je, da Jesush
Kriztush iz szémene Abrahamovoga, iz po-
kolenya Jude, y iz kralyevzkoga plemena
Davidovoga izhadya.

K-Marii vu varash Nazareth poszlal je
Bog Angela Gabriela z-glaszom, da ona Je-
susha od Dúha szvétoga prijela bude; y ona
zanoszila je od Dúha szvétoga. Szin Bosji je
anda po krepozti Dúha szvétoga vu telu Ma-
2.
*Maria prijela je Jesusha
od Dúha
szvétoga.
Od orud, iz-*

Schloissnigg Iztine Vére Del. I.

*hadajuche
szlèdi.*

rie chlovekom pòztal; zato veli drugi kotrig vere: *koj prijet je od Dùha szvétoga.* Kaj pako od ovud szledi, detcza draga? Od ovud szledi, da Maria pred porodom, vu porodu, y po porodu divojka oztala je; kajti ona od Dùha szvétoga obzerta bila je. Od ovud szledi, da Jesush kakti Bog otcza nebezkgoga, kakti chlovek pako nikakvoga Otcza imal néje. Od ovud szledi, da Josef zarucknik iliti mùs Marie szamo odhranitelj Jesusha Kriztusha bil je; zato veli szvèto pismo: *Jesush za szina Josefo voga dersan je bil.* (Luc. 3.) Od ovud szledi, da Jesush kakti Bog né imal mater, kakti chlovek pako imal je mater szvoju prechiztu Deviczu Mariu. Od ovud szledi zadnich, da Maria pravo Mati Bosja imeuvati sze more. Ne, kak da Jesush szvoju bosanzku oszobu y ime od Marie bi imal, nego kajti ona nyega, koj Bog y chlovek zkupa je, poleg chlovechanzke narave porodila je.

3.
*Narodye-
nye, obre-
zavanye,
y alduvanye
Jesusha.*

Jesush, iztina je, prijet je vu Nazarethu, ali porodyen je vu jedni staliczi vu Bethlehemu; ar Maria y Josef, koji ravno onda na popiszu vu Bethlehem putuvati jeszu morali, zbog vnosine lyudztva ztana vu hisi dobili nészu. Komaj bil sze je Jesush narodil, tak Bog dal je narodyenye nyegvo po Angelu paztirom, y po zvezdi trem mudrem od izhoda nazveztiti. Paztiri, y takaj mudri, koje szvète tri Kralye ozivamo, dòshli szû, vklanyali sze detetu, y tri mudri alduvali szû zlato, temjan y mirhu, tojezt plemenitu mázt. Oszmi dan po narodyenyu bilo je dete obrezano, y nyemu ime dano Jesush. Za cheterde-

szetemi dnevi pako bil je Jesush vu Czirkvi Jeruzalemzki alduvan, y Maria ochiztchena.

Poklamkam Herodesh Kraly bibil zachul, da Jesush kakti novi Kraly sidovzki rodil sje je, tak izkal je nyega vmoriti: ar on nika-kvoga novoga kralya sidovzkoga terpeti né hotel. Ali na zapoved Bosju vzel je Josef dé-te y mater nyegovu, y pobegel vu Aegyp-tush. Metemtoga dal je vendar Herodesh vszu drobnu detczu zkonchati. Za nekulikemi léti doshel je Jesush iz Aegyptusha vu Galilaeu vu varash Nazareth, gde on szvojem ztareshem podlosen bil, y vu mudrozti, miloztchi y do-bi pri Bogu y pri lyudeh raszel je. Vu dva-naiztem letu dobe szvoje ishel je on z-szvoje-mi ztareshi vu Jeruzalem, y ovde nyim zgi-nul je, gde za tremi dnevi zopet nyega na-vuchajuchega vu Czirkvi nashli jeszu.

4.

Detinztvo, y mladost Je-susha.

Trideszet let sivel je Jesush zkrito pri szvojeh ztareshih. Metemtoga pochel je vre Ivan kerztitely kakti napervo poszlan od Boga nazveztchati pokoru, y szerdcza lyudih pri-pravlyati k-návuku Jesusha Kriztusha. Jesush Kriztush szam dal sje je od Ivana kerztiti, pri kojega kerztu Dùh szvéti vu zpodobi go-luba izkazal sje je, y glasz Otcza iz oblakov chul sje je: *Ovo je szin moj predragi, vu-kojem szém sje jako vdobrovolylil.* (Matth. 3.) Zatóm poztil je Jesush cheterdeszet dnevoj y cheterdeszet nochih, y pochel je vu tridesze-tem letu navuehati. Tri leta prodekuval y na-vuchal je Jesush, y podtverdil szvoje navuke z-chudochini, nájel vuchenikov, y zebrał szízmed oveh dvanaizt Apostolov, ter poka-

5.

Ochitno si-olenye Jesu-sha.

ral hmanyochu y bludnozti, vu oztalem izkazaral sze je vzigde dobrochinechega.

R a s y o v o r t.

1.

Iz kojega pokolenya, y iz kojega plemena izhadya Jesush?

Kak sze izgovarja trejti kotrig vére? — Kaj je Bog obechal Ahrahamu? Gdo iz nyegvoga széméná izhadyati ima? — Chiji szin je bil Izaak? y chiji szin je bil Jakob? — Kuliko szinov je imal Jakob? — Odkud izhadyaju anda dvanaizt pokolenya Izraela? — Kaj je prorokuval Jakob, iz kojega pokolenya izhadyal bude Mesziash? — Iz kojega pokolenya bil je David kraly? — Gdo iz nyegvoga plemena izhadyati ima? — Jeli je Maria mati Jesusha takaj bila iz pokolenya Jude? Y iz plemena Davidovoga? — Iz kojega pokolenya, y iz chijega plemena bil je anda Jesush? — Zakaj sze Jesush tulikoputi szin Abrahamov y Davidov imenuje? Jeli on iz plemena oveh izhadya?

2.

Od koga je Maria Jesusha prijela, y kaj szledi od ovud?

Gdo je Marii nazveztil, da ona mati Bosja poztati ima? — Kaj je rekel Angel, od koga ima Maria Jesusha prijeti? Od koga je anda Maria Jesusha prijela? — Jeli je imal Jesush kakti chlovek Otcza? — Jeli né bil Josef zaruchnik Marie, Otecz Jesusha Kriztusha? — Jeli veli szvéto pizmó: *Jesush bil je szin Josefov*, ali Jesush bil je za szina Josefovoga stiman? — Zakaj je anda szveti Josef szamo odhranitelj Jesusha Kriztusha? — Je Jesush pako kakti Bog imal Otcza? Je

Jesush kakti Bog imal takaj mater? — Koga je imal Jesush kakti chlovek za szvoju mater? — Je Kriztush od Marie imal szvoje Bosanztvo? Nego zakaj sze vendar Maria mati Bosja imenuje?

3.

Gde je Maria Jesusha porodila? — Gde je nazveztil narodyenye Jesusha Kriztusha pazzirom? — Po chem nazveztil je Bog narodyenye Jesusha trem mudrem od izhoda? — Jeszu sze ovakva chuda pri narodyenu drugeh lyudih takaj dogodila? — Kaj pokasuju anda chuda pri narodyenyu Jesusha vchinyena? Da on Mesziash, da on Bog neje? — Jeszu oni tri mudri od izhoda doshli? — Kaj szu oni Jesushu alduvali? — Kada je Jesush obrezavan? Kada alduvan vu Cziruvi? —

Kaj sze je pri porodu Marie dogodilo?

4.

Jeli je y Herodesh Jesushu vklanyati szehotel? Nego? — Zakaj je Herodesh Jesusha na szmert izkal? — Jeszuli oni tri mudri od izhoda Jesusha kakti kralya sidovzkoga izkri-chali? Jeli je Herodesh novoga kralya sidovzkoga terpeti hotel? — Kam je Josef odishel z-detetom? Kaj je pako Herodesh vchinil? — Jeli je Josef namirom vu Aegyptushu oztal? Kam je Josef z-detetom iz Aegyptusha odishel? — Na chiju zapoved ishel je Josef iz Aegyptusha? — Kak sze je Jesush zadersal protisvojemi ztareshem vu szvojem detintztvu? Vu chem je on napreduval pri Bogu y pri lyudeh? — Kaj je on vchinil znanya vrednoga vu szvojem dvanaiztem letu? — Gde szu nyega ztareshi nyegvi nashli?

Kak sze je Herodesh zadersaval, y kaj je Jesush kervolochnoxti Herodesha vugnut sze?

5.

*Kak sze je
Kriztush
pripravil k
szvojem
navucha-
nyu?*

Kak sze je zval predhodnik, Jesusha Kriztusha? — K-chemu je pripravil Ivan szerd-
cza lyudih? K-chijem navukom? — Zakaj
sze anda Ivan kerztitely *predhodnik Jesusha
Kriztusha* imenuje? — Jeli sze dal Jesush ta-
kaj od Ivana kerztiti? — Gdo sze je ovde
izkazal vu zpodobi goluba? — Chiji glasz
chulsze je iz neba? Y kaj je rekel glasz Ot-
cza? — Kak dugo je Jesush poztil vu puzt-
chini?

6.

*Kak sze je
Jesush za-
dersaval vu
szvojem na-
vuchanyu?*

Vu kojem letu dobe szvoje pochel je Je-
sush navuchati? — Kak dugo prodekuval y
navuchal je Jesush? — Po chem podtverdil
je Jesush szvoje navuke? — Jeli je Jesush
takaj vuchenike najel? — Kuliko je zebrał
Apostolov? — Kaj je Jesush pokaral? Izti-
nitozt y krépozť? — Kak sze je vu oztalem
izkazal proti lyudem?

I. Dokànchanye Nàvuka.

*Moj sesh oszlobadya lyudztvo Izraelzko iz
szusanstva.*

Ja szém vam vre pripovedal, kak chudnovito Bog
Mojsesha zebrał je, da detczu Izraela iz faraonzkoga
szusanstva oszlobodi. Mojsesh zaizto odishel je, ztupil
vu dvor kralya Faraona, y rekel nyemu: *Ovak veli
Gozpon, Bog Izraela, odpuzti moje lyudztvo, da ovo
meni vu Puztchini alduje.* (2. Lib. Mojs. 5.) Metem-

toga kaj je odgovoril Kralj: *Gdo je ov Gozpon*,¹ rekel je on: *kojega zapovedjam ja podlositi sze, y lyudztvo Izraelzko odpuztiti moram: ja nikaj neznam od takvoga Gozpona, ja lyudztva izraelzko neodpuztoham.* (Ibidem.) Mojsesh, koj vezda nove zapovedi od Boga zadobil je, odishel je drugoch k-Faraonu nyemu povedati, da on lyudztvo izraelzko iz szvojega sznsanztva naj odpuzti. Y poklankam y ovo potrebuvanje poszlunnyeno bilo néje, tak vchinil je on, po Bogu nyemu podelyenem daru, naj zmosnesha chuda. On obernul je na jeden put shibu szvoju na kachu, y ovu zopet na shibu; on obernul je z-ove izte shibe vudarczem vsze vode y potoke ove dersave na kerv, tak da od oveh niti lyudi niti marha piti né mogla, y ribe vu oveh zkvarile sze jeszu.

Drugi put napunil je vsze z-jednum neizmernum vnosinum sab, pusev, y drugeh neszmag, dapachezpogibelnemi betegi, koji lyude y sivinu vmarjali jeszu; z-ztrahovitum tuchum, z-tmiczum trafil je Mojsesh Aegyptusha, szamo da Faraona gene, da lyudztvo odpuzti. Vkrotyen od oveh kastig Gozponovoh odpustil je najzadnich Izraelcze iz svoje dersave, y Mojsesh po jednem prediduchem vidlyivem oblaku, y ognynem ztupu po puztchini zapelyal je nye vu obechanu zemlyu Kanaan.

Dragi! Gdo nevidi vu Mojseshu lepoga kipa nashega bosanzkoga Odkupitelya; zmiszlite sze szamo, chiji szusni vi po grehu perveh lyudih poztali jezte? Ah, vi dozpeli zte bili vu szusanztvo duha peklenzkoga, koj vasz na zpodobu jednoga tverdokornoga y ogrutnoga Faraona zvezane dersal je. Bog najzadnich szmiluval sze je vam, y poszlal je iztoga szvojega jedinorodyenoga Szina vu szvet, da vasz iz ovoga szusanztva odkupi. Ov doshel je, y kajti szvet nyegvomu poshilanyu veruvati y zaufati sze ne hotel. vchinil je on prevelika chuda, da

najzadnich szveta vputi, da on veliki prorok je kojega Bog za odkupiti szvoje lyudztvo poszlal je. Veszelte sze anda, y radujte sze da Jesush vu iztini vash odkupitely y zvelichitely je. Amen.

II. Dokàñchanye Nàvuka.

Chùda, koja pri narodyenyu Jesusha tohtnyena jessu, szvedochiju, da Novorodyeni pravi Messziash bili mora.

Kak velika y oszupnénya vredna jessu chùda, koja pri narodyenyu Jesusha dogodila sze jessu. Vréme bilo je doshlo, da Maria techaja devet meszcz, vukojeh ona Jesusha noszila, izpunila je; ona porodila je nyega takaj vu szredini nochi, y to vu jedni staliczi, kajti ona zkupa z-szvojem musom Josefom vu Varashu Bethlehem nikakvoga ztana vishe né dobila. Poklamkam nyega bi bila porodila, tak pleniczami obvitoga polosila gâ je vu jaszla. Kak mirno y prez stropota ovo narodyenye dogodilo sze je, tak vendar kakti najveksha novina taki obznanyeno bilo je.

Sziromaski y priproztipaztiri, koji na polyu z-szvojum chredum bili szâ, jessu pervi bili, kojem Bog narodyenye Szina szvojega po Angelu nazveztal je. Nut, rekel je on od jedne velike szvetlozti obztert, koja y nye obzterla je, *nut veliko veszelve nazveztcham vam, koje vszemiu szvetu pripetilo sze je, araze denesz narodil Zvelichitely, koj je Kriztush Gozpon, vu varashu Davidovom. Y ovo vam bude za znamenye: hochete najti. Dete z-pleniczami obvito, y vu jaszlih poloseno.* (Luc. 2.) Vu iztom hipu, kak je to Angel zgovoril, poztala je velika vnosina nebezkih sheregov hvalechek Boga, y gvorechek: *Dika Bagu naviszinë, y mir lyudem na zemlyi, koji szu dobre volye.* (Ibidem.) Paztiri, koji zverhu

pripetchenya ovoga kruto jako preztrashili szû sze bili, govorili szû med szobum: *hódmo vu Bethlehem*. Shetuváli szû anda hitro, y nashli szû Mariu y Josefa, y Dete poloseno vu jaszlih, y zpoznali szû, da vsze tak iztinio pripetilo sze je, kak je nyim od Angela nazveztcheno. Povernuli szû sze zatem paztiri k-chredi szvojoj, ter hvalili y diholi szû Boga za vsza, koja szû chuli, y videli.

Ali narodyenye Jesusha néje bilo szamo po Angelu paztirom vu meztu, nego takaj po zvezdi, koja na nebu izishla je, pogaminom nazveztcheno. Ovu zvezdu med oztalemi videli szû tri lyudi vu izhodu, koje mudre ozivamo. Oni videli szû ovu zvezdu, y Bog razszvetil je nye, ter dal nyim za zpoznati, da ona narodyenye Jesusha Kriztusha novoga Kralya sidovzkoga pelduje. Zato hitreli szû izkati ovoga, kojega zvezda je nazveztla. Doshli szû oni po pelanyu chudnovite zvezde pred nyimi iduche, y nyim puta kazuche vu Jeruzalem; ovde neztało je pred nyimi zvezde, ne pripetcze, nego po naredhi Bosjoj, koj po zkrivenoj zvezdi hotel je, da Mudri ovi vu Jeruzalemu za mezto narodyenya Kralya sidovzkoga naj zezvedaju, da ovak Herodeshu y Piszmoznanczem ochituvano bude, da sze je zaizto Mesziash narodil; y tak pripetilo sze je: Mudri od izhoda zpitavali szû povszud, gde bi sze kraly sidovzki narodil bil. Herodesh kraly preztrashil sze je zverhu ovoga pitanya, zebrał zkupa taki vsze Aldovnike y Piszmoznancze, ter zezvedal od nyih, gde bi sze Kriztush bil narodil. Poklamkam ovi nyemu bi bili povedali, da vu Bethlehemu dersavi sidovzki, tak puztil je Mudre oditi. Komaj bili szû iz Jeruzalema odishli, tak zopet ishla je zvezda pred nyimi do Bethlehemu, gde ona zverhu stalicze, vu kojoj sze Jesush narodil je bil, mirno ztala je. *Oni vleznułi szû v-nuter, y nashli szû dete z-Marium Materjum nyegovum, opali szû na kolena szvoja, y uklanyali sze nyemu. (Luc. 2.)*

Dragi! kaj hocheju chûda ova, koja pri narodnyu Jesusha vchinyena jeszu, drugo rechi, nego da Jesush, koj ovde iz Marie devicze vu jedni staliczi vu Bethlehemu rodil sje je, pravi Mesziash biti mora. O kulika detcza od kralyev y Czeszarov jeszu sje vre rodila, ter vendar nêsze nikakov Angel, nikakva zvezda na Nebu pokazala, niti nikakvi Mudri od izhoda doshli. — Verujte anda tverdno, da Jesush on od Boga obechani Mesziash, tojezt Odkupitely y Zvelichitely je; terszite sje ali takaj xashu véru po jednem kerztchankem sivlenyu siva vchiniti, da ovak vasz odkuplenya nyegvoga vredne vchinite. Amen.

III. Dekànchanye Nàvuka.

*Velikocha lyubavi Bosanzke va zkro-
vnoztì vtélovlenya.*

Kak velika nêje lyubav, koju nam Szin Bosji pokrovnoztì szvoga vtélovlenya izkazal je! Vîznate, Dragi! y vasz to véra vuchi, da prvi chlovek, pôklamkam zagreshil je, ne szamo szebe, nego y nash vu najvékshu neszrechu porinul je. Od onoga vrémèna bilo nam je Nebo zaperto, y mi bili szmô na szmert, na vremenitu y na vekivechnu szmert obszudyeni. Zaizto jeden salozni y turobni ztalisz lyudih. Ali hvala, neizmèrna hvala najbude dôbroti nashèga Boga, kojèga miloztcha ravno onde, gde prekershenye preveliko bilo je, takaj nepreszesna bila je. On pomiluvanye imal je z-nashum nevolyum, y ôd ovoga pomiluvanya genyen, poszlal je on Szina szvôga, da on od jedne sene rodyen, aldov pomirenja za nash poztane. Z-nashemi grêhi obtershen; y vu zpodobi szluge, povdal sje je praviczì Otcza szvôga.

Ti nêszì, veli on vre pri dohotku szvojem vu szvet: ti nêszì nikakve aldove imati hotel, koje tebi lyudi po-

nudili jeszu, *nego ti szi meni jedno telo dal*, da za nye aldov pomirenja poztanem, *nut ovde szém.* (Psal. 39) Ja szem vre pripraven, one vudarcze szerditozti, koje lyudi zaszlusili jeszu, podnezti, ja mene na meztu nyih poztavlyam, fanti sze nad mienum, ali opróztí nyim; *nut ovde szém.*

Dragi! Jeli nam Szin Bosji szvoju neizmernulyubav bolye bi bil mogel ochituvati, kak po szvojem vtelovlenyu vchinil je? Iz lyubavi proti nam oztavil je on naruchaja Otcza szvoga nebezkgoga, y ztupil vu naruchaj Marie, da nash Odkupitely, nash pomiritely, nash Zvelichitely poztane. Ah! jeli sze moremo iz toga zmiszlití, prez da oszupnyeni nyemu zahvalimo, y nyega lyubimo? Kakva ztrashila bi mi bila, ako to nebi vchinití. Dichimo anda Gozpona koj sham szebe za pomirenje za nashe grehe dal je. Zahvalimo Jesushu Kriztushu, koj za nasz odkupiti chlovekom poztal je.

Lyubimo onoga, koj nasz takaj, kada nyegvi nepriatelyi bili jeszmo, tak jako, y do koncza szvoga sivlenya, do zadnye kaple kervi, koju on za nasz prelejal je, lyubil je. Amen.

NÀVUK 7.

Od chetertoga; petoga y sheztoga kotriga Vère.

Od szmerti, dolyizstuplenya na pekle, goriztajanya, y zastuplenya Kri-ztusha.

PITANYE 1.

Kaj zadertava vù szebi cheterti kotrig-Vère?

Razláganye.

1. *Odurjanye farizeu-shev proti Jesushu.* Cheterti kotrig Vère izgovarja sze ovak: *Terpel je pod Poncziushem Pilatushem, razpet, vumerl y pokopan.* Vezda, draga Det-cza, dohadynamo mi k-izpiszu muke nashega Odkupitelya, koj pri nami pomiluvanye y szùze, ali takaj odurjavanye y posaluvanye za gréhe zbuditi mora. Jesush hil je najvek-shi dobrochinitely, kojega lyudztvo tak jako lyubilo je, da ovo pri dosheztku nyegvem vu Jeruzalem oprave y szversje iz drevja prezti-ralo je. Szamo veliki Aldovniki, piszczi y fa-rizeushi odurjavali szù nyega iz nenavidnoztì, y zbg nyegvoga nàvuka. Oni metemtoga né-szu sze podufali nyega vu odpertom vloviti zbg lyudztva.

Zadnich nyim je vendar to poszlusilo. Judash Iskariot, jeden Vuchenik Jesusha Kri-
ztusha izdal je szvojega mestra z-jednem
kushczem, y predal nyega za trideszet szre-
bernyake vu ruke nepriatelyov. Jesush bil
je vlovlyen, od jednoga szûda do drugoga
pelyan, na podpûntanye velikih aldovnikov
od lyudztva na szmert potrebuvan, y od
Poncziusha Pilatusha Rimzkoga poglavara na
szmert obszudyen. Vsza ova vchinyena szû
vu jedni nochi y vu jednom dnevu.

2.
Jesush vlovi
sze, y na
szmert ob-
szudi sze.

Vi lahko morete szî misliti, moja Det-
cza! kulika Jesush terpel je. On znal je za
szvoju muku, ar on szam vuru napervo je
povedal, y zato terpel je tuliku ztizku na du-
shi, da on kervjum potil sze je, y takvu tu-
robnost, da on izkriknul je: *moja dusha je*
turobna do szmerti. (Matth. 26.) Na szvojem
têlu terpel je Kriztush vnoge neprilike, szu-
protivchine, vûdarcze y rane. On je bil bi-
chuvan, z-zternym korunyen, y zadnich
razpet. Vszu ovu bol chutil je Kriztush ra-
vno tak, kak y mi ovu bi bili chutili; ar on
imal je, kak y mi jedno chutiivo têlo, y
nyegvo Bosanztvo nyemu bol chizto nikaj
néje preprechilo. Zato zdihaval je on na krisu:
moj Bog, moj Bog! zakaj szî mé oztavil?
(Matth. 27.)

3.
Jesush vno-
ga terpel je
na dashi, y
na têlu.

Jesush terpel je vnogo zateptavanye y
oszmehavanye. Kak jako zametaval je nyega
Herodesh kraľy, kada nyega vu belu opravu
oblekel, y od vszeh oszmehavati dal je! Kak
oszmehavali szû nyega vojniki vu vuzi, kada
nyemu ochi zavezali, nyega plyuzkali jeszu,
ter spotlyivo zpitavali: *zgodi gdo te je vudril?*

4.
Jesush ter-
pel je vnogo
zateptava-
nye, oszme-
havanye,
blaznozti,
obshanozti,
y druge
krivicze.

Jesush terpel je vnoge blaznoztì; ar neszamo vnogi, koji mimo krisa ishli jeszu, nego y oni dva lyudomorczy, koji z-nyim razpeti bili jeszu, y iz deszna y iz leva viszeli jeszu, blaznuli szû, govorechi: *Ako szin Bosji jeszi, tak ztupi dolye iz krisa.* (Matth. 27.) Jesush terpel je vnoge obshanozti; ar on obtusen je bil, da lyudztvo punta, da Czeszaru dachu dati prepoveda, y szebe laslyivo za szina Bosjega izdaje, kada vendar vuchil je: *dajte Czeszaru, koja szû Czeszarava*, y iztinitozt szvoga Bosanztva po tulikih chudochinìh podtverdìl je.

5.
Jesush terpel je nedusen, szamo za grèhenaske y nam na peldu.

Jesush nedusen je terpel, ar Pilatush kakti szudecz szam je valuval, da on nikakvu krivnyu vu nyim ne nahadya; y kajti Jesush Bog bil je, tak on nikakvoga grèha na szebi imati né mogel; on terpel je anda szamo za nashe grèhe. Iztinito je, da Jesushu tulika terpeti nebi bilo potrebno, pòkehdoz vre jedèn jedini chin Jesusha neizmernu czènu ima. Ali Kriztush zato tulika z-muchanyem y velikum terplivnoztjum preterpel je, da nam pèldu da, da y mi nashe laztozite pregreske terplyivno naj podnashamo.

6.
Chùda pri iztoj szmertì Jesusha vi-dyena.

Pri szmertì Jesusha vchinyena szû velika chùda. Szuncze y meszcz zgbili szû szvetlozt szvoju, zemlya treszla sze je, zazor vu Czìrkvi razdrapil sze je, pechiue popuczale szû; grobi szû sze odpirali, y mertvi jeszu van izhadyali, ter pohadyali znancze szyoje vu Jeruzalemu. Jeli sze je to y kada pri kojem vmirajuchem pripetilo? Jeli ovo pokasuje, da Jesush szamo chlovek, ali Bog y chlovek zkupa bil je? Poklamkam Jesush tri vure

na krisu bi bil viszel, tak zpuztil je dushu vu ruke otcza szvoga. Jeden Vojnik odperl je z-kopjem ztran nyegvu, iz koje kerv y voda czurela je, y ako Jesush taki od drugeh ran vumerl nebi bil, tak vre od ove vumreti bi bil moral.

Mertvo telo Jesusha iz krisa bilo je szneto, y vu jeden novi grob poztavlyeno. Ovde zmiszlili sze jeszu nyegvi nepriatelyi, da on sivuchì rekel je, da trejti dan zopet ztal sze bude; zato bojechi sze, da nyegvi Vucheniki télo nyegvo vkrazti bi mogli, y rechi, da sze je od mertveh goreztal, pokrili szû groba z-jednem velikem kamenom, ovoga zapechatili, y poztavili vojnike k-grobu.

7.
Pokop Je-
susha.

R a z g o v o r i.

1.

Kak sze izgovarja cheterti kotrig vére? Jeli nebil Kriztush najvekshi dobrochinitely? Jeli je lyudztvo nyega lyubilo? — Po chem je lyudztvo szvoju lyubav Jesushu pokasuvalo? Kaj szû lyudi iduchemu vu Jeruzalem preztirali? — Jeszuli y veliki Aldovniki y pizmoznanczi Jesusha lyubili? — Zakaj szû gâ odurjavali? — Jeli je nye Jesush visheputi pokaral? — Y gdo je bil pri lyudztvu vu vekshem prestimanyu Jesush, ali oni? — Jeszu sze pako podufali veliki Aldovniki Jesusha odperto vloviti? Zakaj ne? Koga szû sze bojali? —

Zakaj szû
veliki Aldov-
niki y pi-
szmoznanczi
odurjavali
Jesusha?

2.

*Kak je bil
Jesush vlo-
vlyen, y na
szmert ob-
szudyen?*

Kak sze je vendar prîpetilo, da je Jesush vlo-vlyen? Po chem je nyega Judash izdal? — Za kulike penêze je nyega prodal? — Kam szû vlo-vlyenoga Jesusha odpelyali? Szamo k-jednomu szudczu? — Gdo je lyudztvo proti Jesushu popuntal? — Gdo je odurjaval Jesusha? Zakaj je lyudztvo potrebuvalo Jesusha na szmert? — Gdo je nyega na szmert obszudil? Pod kem je Jesush terpel muku? Jeli y Ponczyush Pilatush bil sidov?

3

*Kaj je ter-
pel Jesush
na szvojoj
dushi, y na
szvojem té-
lu?*

Kaj je terpel Jesush na szvojoj dushi? — Kaj je terpel Jesush na szvojem télu? — Ali morebiti ne Kriztush nikakvu bol chutil? Zakaj? Jeli néje chlovek chutlyiv? Jeli je Kriztush szamo pravi Bog bil? Zakaj je anda Kriztush bol chutil? — Ali morebiti je Bosanztvo Kriztusha nyemu chutlyivozt prechilo? Zakaj ne? Kak je zdihaval Kriztush na Krisu k-Bogu?

4 & 5.

*Kakvo o-
szmehava-
nye, blaz-
nozti y ob-
shanozti
terpel je Je-
sush?*

Je Pilatush Jesusha za krivcza zpoznal? — Kaj je valyuval y zpoznal Pilatush? Da on vu nyim krivnyu nahadya? — Je Kriztush kakti krivecz terpel? Zakaj nedusen? — Je mogel Kriztush gréha na szebi imati? — Zakaj ne? Gdo je bil Jesush? — Za kakve gréhe je anda Jesush muku terpel? — Zakaj za nashe? Jeli je bilo potrebno, da Kriztush tulika terpel je? Zakaj ne? Jeli jeden jedini chin Jesusha néje vre neizmerne czene? — Zakaj je anda Kriztush tuliko terpel? — Da komu peldu dà?

6.

Koja chùda szù sze pri szmerti Jesusha pripetila? — Kaj na szunczu, na meszeczcu? Kaj na zemlyi? Na zaztoru Czirkve? Na grobih? — Jeszu sze kada pri vmirajuchem ovakva chùda pripetila? — Kaj szvedochiju ova chùda? Da on szamo chlovek bil je? — Kak dugo je sivel Jesush na krisu? — Jeszuli szamo ruke y noge prebodyene bile? Kaj josche? Kaj szù nyemu z-kopjem odperli? — Je anda Kriztush zaizto na krisu vmerl? Od-kud to miszlish y szudish?

Kakva chùda szù sze pri szmerti Jesusha pripetila?

7.

Kaj je z-mertvem télom Jesusha vchi-nyeno? Kam je ovo bilo poloseno? — Y kaj szù veliki Aldovniki vchinili pri grobu? Zchem szù ovoga pokrili? Koga szù poztavili k-nyemu? — Zakaj szù dali groba zapechatiti, y chuvatì? Da morebiti gdo mertvo telo nevkradne?

Kaj je z-mertvem télom Jesusha vchinjeno?

PITANYE 2.

Kaj zadersava vu szebi peti kotrig Vére?

Razláganye.

Peti kotrig vére izgovarja sze ovak: ztu-pil je na pekle, trejti dan goreztal je od mertveh. Po imenu pekloy razmevaju sze ona otajna mezta, vu kojeh zadersavaju sze dùshe, koje nebezko blasenzto zadobile nészu. Je vech takveh otajneh mézt, koje mi pekles imenujemo. Ovak imenujemo pervich mezto

1. Je vech takveh otajneh mézt, koje mi Pekles imenujemo.

ono, vu kojem prokleti naveke trapiju sze. *Drugock* mezto ono, vu kojem dushe vremenite kastige, koje za gréhe na ovom szvetu zpunile nészu, terpiju; mezto ovo zove sze *Purgatorium*, iliti mezto *ochiztchavanya*. *Trejtich* mezto ono; vu kojem dushe pravichneh mertveh zadersavale sze jeszu, y vu blasenom ufanyu szvoje oszlobodyenye mironovo prez vszake salozti chakale szú, doklam Jesush k-nyim je doshel, y zove sze *Limbush*.

2.
Szama du-
sha Jesusha
Kriztusha
je ztupila na
Pekte.

Dusha Jesusha Kriztusha je sze vu szmerti od téla oddrusila; ar szmert je raztavlenye Dushe od téla. Kajti pako Jesush Kriztush kakti Bog vumerl néje, tak sze Bosanztvo né niti od téla, niti od dushe oddrusilo. Télo Jesusha Kriztusha po szmerti je bilo vu grob poloseno, kak vre chuli jezte; vre pako kam je dusha Jesusha Kriztusha po szmerti dozpe-la? Morebiti taki vu nebo? Ne. Kriztush zto-prav cheterdeszeti dan po szvojem goreztajanyu zasztupil je vu nebo. Ali morebiti vu pekel prokleteh? Takaj ne; ar Kriztush iz pekla prokleteh nikoga ne imal za odkupiti. Dusha Jesusha Kriztusha doshla je anda tam, gde dushe vszeh pravichneh mertveh pred zasztuplenyem Jesusha Kriztusha zadersavale sze jeszu; ona najmre ztupila je vu Limbush: ar pred zasztuplenyem Jesusha Kriztusha nebo bilo je zaperto, dushe anda pravichneh mertveh morale szú sze vu jednom meztu zadersavati, koje Limbush imenujemo. Vi morete szí lehko miszliti ono veliko veszelje, koje ovi ztari Otci chutili jeszu, kada Jesush nyihov Zvelichitely po szrechno dovershenem poszlu odkuplenya k-nyim doleztupil je.

Do trejtóga dana oztalo je télo Jesusha
 vu grobu, na trejti dan zjedinila sze je zopet
 dusha z-télom, y Jesush siv vztal sze je iz
 groba. Pri goreztajanyu vchinyen je veliki
 potresz. Jeden Angel doshel je iz Neba vu
 szvetlozti, y odvalil kamena od groba, zver-
 hu chesza chuvajuchi groba jako preztrashili
 sze jeszu. Mì nad iztinitoztjum goreztajanya
 Jesusha Kriztusha dvojiti nemremo; ar iz
 jedne ztrani bil je grob odpert y prazen, koj
 vendar od nijednoga chloveka odpreti sze, y
 zpraznuti né mogel, ar bil je zapechatchen,
 y od vojnìkov chuvajucheh obkolen. Iz dru-
 ge ztrani Vucheniki Jesusha Kriztusha y dru-
 ge pobosne sene szvedochiju, da sze je ztal,
 kajti goreztajuchega Zvelichitelya ne szamo
 visheputi videli, nego nyega sze dotikavali,
 y z-nyim jeli jeszu. Ovi szvedoki nészu la-
 slyivi szvedoki, ar oni szû za ovu iztinu vmer-
 li, y ovu z-chudochini podtverdili.

3.
 Pripoveda-
 nye, y izti-
 nitozt gore-
 ztajanya Je-
 susha Kri-
 ztusha.

Hochete zadnich, moja Detcza! zroke zna-
 ti, zakaj Kriztush goreztal je, tak jeszu szle-
 dechi: *pervich* je Kriztush zato goreztal od
 mertveh, da zpuni szvéto Piszmo, y izta szvo-
 ja prorochantzva; ar on vu sivlenyu szvojem
 rekel je; *porushite Czirkvu ovu, y ja nyu za
 tremi dnevi zopet podigel budem.* (Joann. 2.)
Drugoch, da szvétu ochivezto pokase iztinost
 szvojega navúka, y poszlanya szvojega od Bo-
 ga. Ar goreztajanye je najvekshi chudochin,
 y ovo bilo je naj tese za véruvatì; kada an-
 da ovo podpunoma vchinyeno je, tak vishe
 dvojiti nemremo, da vszi navuki Jesusha Kri-
 ztusha iztiniti nebi bili, y da vszi zpunili sze ne-
 budu. *Trejtich* je Kriztush goreztal, da ob-

4.
 Zroke gore-
 ztajanya.

9*

jachi nashe ufanye, y nedvojeno vchini nashe buduče goreztajanye, ar kak goder szvoje goreztajanye napervo povedal je ovak takaj y nashe napervo povedal je, nyegvo goreztajanye zaizto je vchinyeno, anda po tom y od nashega szegurni biti moramo.

R a z g o v o r i.

1.

*Jeli je vech
takveh otaj-
neh mèzt,
koja mi pe-
kle imenu-
jemo?*

Kak sze izgovarja peti kotrig vére? — Kaj sze razmeva po imenu Peklov? — Jeli je vech takveh otajneh mèzt, koja mi [pekle imenujemo? Koje meztò imenujemo vlaztito Pekel? Koje Purgatorium? Koje Limbush? —

2.

*Jeli je Je-
sush Kri-
ztush z-tè-
lom, ali z-
dushum na
Pekle ztu-
pil?*

Kaj je szmert? — Kakvo razdrusenye? — Kaj sze je anda vu szmertì Jesusha od tèla oddrusilo? — Je Jesush kakti Bog vumerl? — Jeli sze je Bosanztvo od nyegvoga tèla, ali od nyegve dushe vu szmertì oddrusilo? Zakaj ne? — Kam je tèlo Jesusha po szmertì poloseno? — Jeli je dusha takaj vu grob polosena? Jeli je ona jòsche vu tèlu bila? — Jeli je dusha Jesusha po szmertì taki vu Nebo zztupila? Zakaj ne? Jeli nè Jesush ztoprav cheterdesze-
ti dan vu Nebo zztupil? — Ali jeli je dusha Jesusha vu pekel prokleteh zztupila? Zakaj ne? Jeli je Jesush proklete za odkupiti imal? — Kam szû dushe pravichneh lyudih pred zztuplenyem Jesusha dozpele? — Kam je anda dusha Jesusha taki po szmertì zztupila?

3.

Kak dugo oztalo je telo Jesusha vu grobu? Gdo je ovo trejti dan odneszel? — Zakaj né nigdo telo Jesusha odnezti mogel? — Kam je anda telo trejti dan dozpelo? — Jeli je ovo josche mertvo oztalo? — Gdo je szvedok toga? Komu sze je Jesush po szvojem goreztajanyu izkazal? — Jeszuli Vucheniki goreztajuchega Jesusha szamo videli? — Ali morebiti szu Vucheniki Jesusha laslyivi szvedoki? Zakaj ne? Jeli nészu oni iztinu ovu z-szvojum kervjum, y z-vnogemi drugemi chudochimi podtverdili? — Je anda Jesush zaizto goreztal? Zakaj to velish?

*Jeli sze je
Jesush za-
izto od
mertveh go-
reztal?*

4.

Je Jesush szvoje goreztajanye josche vu sivlenyu napervo povedal? — Kaj je rekel Jesush od Czirkve szvoga tela? — Moreli koj chlovek z-laztovitum mochlum ztatisze od szmerti? Nego gdo more? Je goreztajanye Jesusha jeden pokaz nyegvoga Bosanztva? Zakaj? — Y kaj je bilo tese veruvati, jeli navuka od goreztajanya, ali druge navuke? — Jelisze je pako navuk od goreztajanya zpunil? — Moramoli anda nad iztinitoztjum Navuka Jesusha Kriztusha dvojiti? Zakaj ne? — Jeli je Jesush szamo szvoje, ali takaj y nashe goreztajanye napervo povedal? — Jeli sze je goreztajanye Jesusha dogodilo? — Kaj anda od nashega goreztajanya nadjati sze moremo? Da ovo dogodilo sze nebude? Zakaj bude sze dogodilo? — Zakaj je Jesush anda od mertveh goreztal? Da, kaj izpuni? Kaj, da ochivezto pokase? — Kaj, da objachi?

*Zakaj je Je-
sush od mer-
tveh gore-
ztal?*

PITANYE 3.

Kaj xadersava vu szebi shezti kotrig Vère?

Razlåganye.

1.
*Prtpoveda-
nye, y zro-
ki Zasztu-
plenya.*

Shezti kotrig vère izgovarja sze ovak: Zasztupil je na Nebésza, szèdi na deszniczi Otcza Boga vszamoguchega. Po goreztajanyu ishel je Jesush josche cheterdeszet dni z-szvojem i vucheniki okolo, dal nyim josche nove zapovedi, y obechal nyim dùha szvétoga za vredyenye szvoje Czirkve. Cheterdeszeti dan zpravil je zkupa vsze szvoje vuchenike na gori olivetanzki, povedal nyim vszakojachka dugovanya, blagoszlovil nye, y zasztupil vu nyihovi nazochnozti vu nèbo. On zasztupil je, iz jedne ztrani, da platchu zaszlushih za szvoje chlovechanstvo zadobi, iz druge ztrani, da Dùha szvetoga poshle, da zagovoritely nash pri Bogu bude, da nam nebo odpre, y nam tam mezto pripravì.

2.
*Na desznici
Otcza Boga
sze-deti, zna-
menuje naj-
visheshu ob-
laxt y la-
danye imati.*

Szada szedijon na deszniczi szvoga vszamoguchega Otcza Bosanzkoga. Vi nemorate miszliti, moja Detcza! da Bog Otecz télovnu deszniczu ima, ali da on télovnem nachinom na jednom tronushu szedi; ar on je chizti Dùh. Kada Bog na tronushu napervoztavlya sze, tak sze po tom razmeva nyegvu najvekshe ladanye, y kada velimo, da Bog ruke ima, tak razmevamo nyegvu vszamoguchnozt, nyegvu oblaxt; ar tronush znamenuje: ladanye, ruke pako; oblaxt, Bog Otecz pako dal je Je-

sushu Kriztushu vszu oblazt y vsze Gozpodztvo, ovo veli szam Kriztush: *Meni dana je vsza oblazt na nebu y na zemlye.* (Math. 2.) Kada anda velimo: *Kriztush szedi na desznici Otcza Boga vszamoguchega*, tak ovo tuliko znamenuje: *da Jesush je vu ztalmom ladanyu najvisheshe oblazti, y Gozpodztva zverhu vszega na nebu, y na zemlyi.*

R a z g o v o r i.

1.

Kak sze izgovarja shezti kotrig vére? Kak dugo je Jesush josché po szvojem goreztajanyu z-vucheniki hodil po szvetu? Zakaj? — Kaj je obechal nyim poszlati? — Kada je Jesush vu nebo zasztupil? — Gde je zasztupil? Gdo je bil onde zpravlyen? — Koga je on blagoszlovil? — Z-chijum mochjum zasztupil je Kriztush vu Nebo? — Zakaj je Kriztush vu Nebo zasztupil? — Nè Kriztush nikakvu platchu za szvoje dobre chine zaszlusil? — Gde je prava platcha zaszlusbih? Na zemlyi? — Zakaj je anda Kriztush zasztupil vu nebo, *pervich*? — Jeli bi bil Dúh szvéti doshel, ako Kriztush vu nebu nebi bil zasztupil? — Koga obechal je Kriztush poszlati? — Zakaj je anda Kriztush vu Nebo zasztupil. *Drugoch*? — Gdo je nash najmogucheshi Zagovoritely pri Bogu? — Zakaj je anda Kriztush zasztupil vu nebo, *trejtich*? Y jeli bi bilo nam nebo odperto, ako Kriztush vu Nebo nebi bil zasztupil? — Gdo je nam vu Nebu mezto pripravit? — Zakaj je anda Kriztush vu Nebo zasztupil, *chetertich*? —

Kada y kak je Jesush vu Nebo zasztupil?

2.

*Kaj to zna-
menuje: Je-
sush szedi na
deszniczi
Otcza Boga
vszamogu-
chega?*

Gde szedi vezda Jesush vu Nebu? — Je-
li Bog ima ruke? — Zakaj nẽma Bog Otecz
ruke? Jeli ima on tẽlo? Ali morebiti je on
chizti Duh? — Kaj sze razmeva po rukah
Bosanzkeh? — Kada od kojega chloveka ve-
limo: on szedi na tronushu, kaj sze po tom
razmeva? Jeli ne veli szam Kriztush, da nye-
mu vsza moeh y oblazt dana je? — Kaj an-
da to znamenuje: Jesush szedi na deszniczi
Otcza Boga vszamoguchega?

I. Dokànchanye Nàvuka.

*Izaak pokoren je Otczu svómu Abrahamu
do smerti.*

Abraham, on glaszoviti Patriarka, od kojega vam,
draga Detcza! vre jedenput povedal jeszem, da on
szvoju véru po najglaszoviteshẽh chineh pokazal je, i-
mal je jednoga jedinoga szina, kojega nyemu Szara po-
rodila je, kada on ravno zto, ona pako devetdeszet let
ztara bila je. Ov sze je zval Izaak, po ovem obechal
je Bog bogabojechemu Ztarczu, da Odvetke nyegve
kak zvezde na nebu, kak pezka vu morju povnosal bu-
de, y zato bil je szin ov Abrahamu najdragshi zmed
vszega, kaj imal je.

Jednoch pako dobil je Abraham na jedenput zapo-
ved: *vzemi tvojega jedinoga Szina, tvojega lyubleno-
ga Izaaka, hodi z-nyim vu dersavu Moria, y na go-
ru, koju ja tebi pokazal budem, ter aldujmi Szina tvo-
gá.* (1 Mojs. 22.) Kak jako morebiti koj drugi Otecz
nad ovum Zapovedjum bi sze bil preztrashil, ali more-
biti ovoj szuprotztavil, ovak verno y hitro izpunil je ovu

Abraham; on ztaje sze kruto rano, dozove szvoga szina Izaaka y dva szluge, vzimlye oszla, y vsza, koja za lomachu potrebna jeszu, ter putuje vu mezto, koje nyemu Bog odluchil je. Kada on trejti dan vre dalko vishe od gore bil néje, tak zapovedal je szvojem szlugo-
gom z-oszlom oztati, y na nyega chakati, doklam iz gore nazad k-nyim doshel bude. Vezda vzel je on derva, koja za lomachu odluchena bila jeszu, poztavil ova na ramena Izaaku, y on szam noszil je ognya za podsiganye lomache pripravlyenoga, y mecha. Kada ovak zkúpa bi bili ishli v-breg, tak rekel je Izaak: *Otecz moj! nut ovde jeszu derva, y ogeny, gde je pako al-
dov? Szinko-moj*, odgovori Abraham: *Bog bude sze vre zkerbel za aldov*, nezkerbí sze; kada na verh gore bi bili doshli, tak otecz nachinil je oltara; Izaak [vishe nikaj ne zpitaval, nego mirno otcza poszlujuchega gledal. Abraham vzel je iz nyega derva, y razredil ova na oltaru. Vezda ochituval je nyemu ztoprav Otecz, da on szam zaklati sze, y alduvati sze mora. Dobrovolyno podal je Izaak ruke szvoje Otczu, dal sze zvezati, y na lomachu poztaviti. Abraham vezda ztegnul je ruku, vzel mecha, y vre pelyal vudaracza, da szina szvôga Bogu alduje, kada na jedenput Angel krichal je: *Abraham, Abraham! Ovde szém*, odgovoril je Abraham. *Nepo-
ztavi ruku tvoju na decharecza*, odgovori Angel: *ni-
kaj mû nevchini; vezda znam, da sze ti Boga bo-
jish, y da ti zbog mene luztovitomu Szinu tvojemu jedinomu neoprztchash. — Vezda ztoprav tebe bla-
goszlovil budem, vu tvojem imenu budu vszi narodi zemlye blagoszlavljeni, kajti ti mojoj zapovedi podlo-
sil szé jeszi.*

Ja szudim, Dragi! da vi szami previdite, da Izaak pelda nashega hosanzkoga Odkupitelya bil je, koj szvoje drevo do mezta szmertí noszil, y za nasz sze alduval je. Kaj vasz na konczu josche zpomenuti moram,

je to, da visheputi na Izaaka novoga zakona pogledite, y posalujuchi sze zpomenete, da on zbog vashih gréhov na krisu vumreti je hotel. Tak je o najlyublenshi Odkupitely! moji gréhi jeszu zrok tvoje szmerti, moje hmanyoche jèszu tebis potlyivoga Krisa napravile, moja zlochinztva jeszu tebe nechlovechno ranila. Ah! oprozti hmanyochi môga szercza, oprozti mî moje tulikoputi vchinyene pregréske! nigdar nechu vishe gréshiti, nigdar vishe ovu szmert ponoviti, rajhshi vumreti, kak josche jedenkrat greshiti. Amen.

II. Dokànchanye Nàvuka.

Jesush pokasuje po svoji szmerti, y gostajanyu, da on pravi Szin Bosji je

Doshla je zadnich vura, da Jesush po dovershenoj mùki iz ovoga szvéta k-Otczu nazad povernuti sze moral je. Blizu shezt vur viszel je vu najvekshi bolyi na Krisu, szuncze sze je zatmichilo, y k-poldnevu bila je czéla zemlya z-ztrashnum tmiczum obzterta. Malovredni, koji sze pri szmerti nyegvi nahadyali jeszu, po tom postavlyeni szû bili vu ztrah y ztizku, nyihovo hmanyo dushno zpoznanye nye nemirne je vchinilo. Okolo devete vure zadnich vumerl je med dvemi lyudomorczi viszechi nedusni Odkupitely, y taki za tém bil je ztrah malovredneh josche vekshi, josche obchinzkeshi. Zemlya sze je ztreszla, y to tak jako, da izte pechine zpuczale jeszu. Vu Czirkvi Jeruzalemzki raztergel sze je zator na dvoje. Odpirali szû sze vu pechinah zrezani grobi, y mertvi, koji vu ovéh pochivali jeszu, osiveli szû, izishli vun, ter izkazali sze vnogem. Ali koji razpinanyu Jesusha nazochni bili jeszu, ter ztrashna ova pripetchenya z-ochmi gledali jeszu, tukli szû sze vu persza, y povratchali sze preztra-

sheni puni ztizke nazad vu varash. *Zaizto*, rekli szû oni: *ovo bil je szin Bosji*. (Matth. 27.) on bil je nedusen, kajti pri nijednoga hudodelnika ali vmertelnoga szmerti ovakva velika y zverhunaravzka chûda, kak ravno pri szmerti Jesusha nazarenskoga, pripetila sze nêszu. *Ov bil je szin Bosji*.

Kaj ztoprav rekel budem od chûdih, koja sze pri goreztajanyu nyegvem pripetila jeszu? Trejti dan po nyegvem pokopu ztupil je jeden Angel iz neba na zemlyu; ovde ztreshla sze je zemlya, Angel odvalyil je kamena od groba, y szel szu na nyega. Licze Angela obdano bilo je od szvetlozti, y halya nyegva bila je bela kakti sznêg. Vojniki, koji pri grobu zkoznuvali jeszu, tak szû sze preztrashili, da kakti mertvi na zemlyu popadali jeszu. Y nut Jesush izishel je sív y odicheno iz groba, y zkazal sze vezda pobosnem senam, koje telo nyegvo z-dragum maztjum namazati jeszu hotele, vezda vuchenikom, koji nebativni zbog nyegve szmerti okolo bludili jeszu; on govoril, jel y putuval je z-nyimi dal szî dapache od Thomasha ruku poztaviti vu rane, y pokazal je, da zaizto ztal sze je.

Nepotrebuje, Dragi! vishe pokazih, da Jesush pravi Bog je; budite zadovolyni z-ovemi. Jesush vumerl je, y czela narava sze je zbludila. Jesush je na trejti dan zopet sze goreztal, y szvedochanstvo nyegvih nepriatelyov y priatelyov nam vzimlye vszu dvojnozt. Ali vendar né zadozta, da vi ove zkrovnozti vérujete; naszledujte takaj ove; hochu rechi: kagoder Jesush Kriztush jedenput za nashe grêhe vumerl, y od mertveh na novo sívlenye zopet ztal sze je, ovak y mi vchinimo, da jedenkrat grêhu vumremo, y z-Kriztushem na novo sívlenye prebudimo sze. Amen.

III. Dokànychye Nàvuka.

Put tràplenyih je najszegurneshi put vu nebo.

Ztanovito je, Dragi! da mi jednoch vu Nebo vleznuli nebudemo, zvun ako ovo, kak y bosanzki Odkupitely nash Jesush Kritzush, po vnogeh tràplenyih zaszlusimo. *Ja pripravlyam vam, tak veli szam Jesush: ja pripravlyam vam Kralyeztvo, kak ovo meni moj Otec pripravit je.* (Luc. 22.) Vre pako, kak je Otec szvojemu najlyubleneshemu jedinorodyenom szinu kralyeztvo pripravit? Kojega puta je on nyemu zazname-
nuval? Iz neba, gde szin Bosji vu naruchajuszvoga Otca pochival je, ztupil je on dolye vu naruchaj jedne sziomaske vu Izraelu nepoznane Devicze; vu najvekshi zimi vu staliczi med nemum sivinum rodyen, bil je na oszmi dan obrezavan, y taki potlam, da sze szerditozti Herodesha vugne, preneshen je vu Aegyptush, gde do szmerti ovoga kervoloka sivel je. Od szvojega povratchka jel je Jesush na zpodobu druge detcze Adamove kruha szvojega vu potu obraza szvojega. Zadnya tri leta, kulika on néje terpel od Piszmoznanecz y Farizeushev, od velikih poglavarov y Aldovnikov, od sidovov y od poganinov? *On moral je, veli szveto pismo: med zlotvorcze brojiti sze, zateptavati sze, bichuvati sze, y razpinyati sze, da tak vu szvoju diku ztupiti more.* (Luc. 24.)

Vidite anda od ovud, Dragi! da put muke najszegurneshi put vu nebo je, y da szamo on ufati sze more jednoch tam dozpeti, koj ovde z-Jesushem Kritzushem terpel je. Zato veli takaj sz. Pavel: Kakgoder Jesush Kritzush terpel je, ovak y mi terpeti moramo, da zmosnozti nyegvoga goreztajanya, y nyegvoga odichenoga vu nebo zasztuplenya delniki poztanemo. Ako

mi z-nyim terpeli budemo, tak y z-nyim gozpoduvali budemo; ar nebezko kralyeztvo je szamo mezto preobladanya, mezto veszelja, koje gyegyerno harczechem y terpechem dusham za platchu poztaje.

O kak szrechni jeszu anda oni, koji sziromaski, obtersheni, vu tugi y nevolji poztavlyeni jeszu, koji anda terpiju! Nebo, ovo Kralyeztvo zmosnozt, jednoch nyihova platcha bude, ako szamo ztalno z-Kriztushem szuprotivchine ovoga sivlenya podnashali budu. Jesush, koj gore na desniczi szvoga Otcza szedi, nyihov verni naplatchnik bude; on nye, kakti naszlednike szvoje, z-korunum blasene nevmertelnozt nakinchil, y kratke szuprotivchine ovoga sivlenya, z-neizgovorlyivemi y odichenemi veszelji vu szvoji vekivechnozi naplatchal bude. O terszite sze anda y nadalye z-Jesushem szuprotivchine ovoga szveta terplivno podnashati! terszite sze vsze krise y nevolje koje vam ovde dogadyaju sze, z-kerztchankum ztalnoztjum podnashati! terszite sze y nadalye z-Jesushem terpeti, da ovak y z-nyim jednoch na vsze veke gozpoduvati budete mogli. Amen.

NÀVUK 8.

Od szedmoga y oszmoga kotriga Vére.

Od szùda Jesushevoga; y od Dùha szvétoga.

PITANYE 1.

Kaj sadereava vu szebi szedmi kotrig Vére?

Razláganye.

1. *Vszi lyudi moraju vu-
mreti, y Bog nye po ovom
sivlenyu szudil bude.*

Szedmi kotrig vére izgovarja sze ovak: *Od onud hoche dojti szùditi sive y mertve. Vi znate, moja Detcza! da vszi lyudi vumreti moraju, ar vszi, koji pred nami síveli jeszu, jeszu takaj vmerli; y to dohadya od gréha Adamovoga, kak sz. Pavel veli: kakgoder gráh po jednem chloveku vu szvét doshel je, ovak szmert vsze lyudi je preshla, kajti vszi vu nyim zagreshili jeszu. (Rom. 5.) Vi ali takaj znate, da Bog zevszema pravichen je, da anda vsze lyudi szuditi, y nyim platchu ali kastigu odluchiti mora. Bog neszùdi vu ovom sívlenyu, kajti ovde hmanyi visheputi szrechni, pobosni pako neszrechni jeszu; Bog anda vu drugem sivlenyu szùdil bude.*

Czeloga szùda preneszel je OtecZ Bosanzki na szina szvôga: Jesush Kriztush je anda od Boga za szudcza siveh y mertveh odluchen. Szùd Bosanzki je dvojverztni, najmre oszebni y obchinzki. Oszebni szùd je on, gde dusha vszakoga chloveka poszeb szùdyena bude. Obchinzki szùd je on, gde vszi lyudizkupa, z-télom y z-dashum szùdyeni budu. Oszebni szùd taki po szmertì vszakoga chloveka dersal sze bude; ar sz. Pavel veli: *Do konchano je vszem lyùdem jednoch vumreti, za tém pako szùd.* (Hebr. 11.) Na szùdnyi dan pako bude jeden obchinzki szùd, ar Kriztush veli: *mertvi iz grobov sze ztajali, y pred nazochnoztjum nyegvum vszi narodi zpravili sze budu.* (Matth. 25.) Ov obchinzki szùd zato dersan bude, da zaszlusha lyudih, y pravichnozt Bosanzka vszem ochituje sze.

Od ovud videti je, da Jesush Kriztush josche jedenput vu szvét doshel bude; metemtoga razluchnem nachinom. Perviput je doshel, da nasz odkupi, drugiput bude doshel, da nasz szùdi. Perviput doshel je on chizto krotek y szíromaski, drugiput bude doshel z-oblaztjum velikum y zmosnoztjum. Perviput doshel je on chizto szam, drugiput doshel bude z-vszeri szvojemi Angeli y szvétci.

Jesush Kriztush bude sive y mertve, to-jezt: pravichne y greshnike szùdil. Vsza bu-
de dobil, kak vu sívlenyu szvojem dobro ali zlo vchinil je. Ovde Bosanzkoga szudcza vkaniti nebudemo mogli, kajti on vszaznaju-
chi je, mi nyega vtishiti nebudemo mogli, kajti on zevszema pravichen je. On pravichne naplatchal bude z-vekivechnem sívlenyem

2.
*Jesush je
Szudecz.
Szùd bude
oszebni y ob-
chinzki.*

3.
*Razluka
meù pervem
y drugem
dosheztom
Jesusha
Kriztusha.*

4.
*Jesush Kri-
ztush bude
sive y mer-
tve poleg
nyihovéh za-
szlusbih szu-
dil.*

vu nebu, y greshnike kastiguval na veke vu pekiu; ar ovo veli szam Kriztush: *Onda hmanyi vojdu vu mŭke, pravichni pako vu sŭvlenye vekivechno.* (Matth. 25.)

Razgovori.

1.

Morajuli vszi lyudi vumreti?

Kak sze izgovarja szedmi kotrig vére? — Morajuli vszi lyudi vumreti? — Odkud to szudish? — Odkud je to, da vszi lyudi vumreti moraju? — Gdo to veli, da szmert od gréha dohadya? Kaj veli sz. Pavel? Kaj je po jednom chloveku vu szvét doshlo? Y kaj po gréhu? — Je Bog zevszema pravichen? — Budeli Bog vsze lyudi szudil? — Zakaj? — Jeszu pobosni ovde namirom szrechni? Jeli Bog vszigdar vu ovem sívlenyu naplatcha? Odkud to szudish? — Ali jeszuli hmanyi ovde vszigdar nieszrechni? Jeli Bog vszigdar vu ovem sívlenyu kastiguje? — Kada bude anda Bog naplatchal y kastiguval? Kada bude anda Bog lyudi szùdil?

2.

Koga je Bog za szùdcza odluchil? Kulikoverzten je szùd?

Komu je Otecz Bosanzki czeloga szùda prepuztil? — Gdo je anda od Boga za szùdcza siveh y mertveh odluchen? — Kulikoverzten je szùd bosanzki? — Kaj je szùd oszebni? Jeli ovde vszi lyudi, ali dusha vszakoga poszeb szudyena bude? — Kaj je pako szùd obchini? Jeli y ovde dusha vszakoga poszeb szudyena bude? — Budeli oszebni szùd? — Kada bude oszebni szùd? Odkud to

znash, da taki po szmertí oszebni szùd bude? — Kaj veli sz. Pavel? Kaj je odlucheno chlojeku? Y onda? — Budeli takaj obchin-zki szùd? — Odkud to znash? — Kaj veli Kriztush? Gdo sze bude iz grobih ztal? Y pred kem budu sze vszi narodi zpravlyali? —

3.

Jeli bude Jesush drugoch takaj tak doshel vu szvét kak perviput? — Zakaj je Kriztush perviput doshel na szvét? — Zakaj bude on pako drugiput doshel? — Takaj odkupiti? — Kak je Kriztush perviput doshel? Kakti bogatush y oholen? — Kak bude pako Kriztush drugoch doshel? — Je Kriztush perviput z-kem doshel? — Z-kem bude pako drugoch doshel?

*Kak dojde
Jesush dru-
giput na
szvét?*

4.

Jeli bude Kriztush szamo mertve szùdil? Ne takaj sive? — Ali jeli budu pri zadnyem szùdu josche nekoji lyudi sivi? — Jeli nemoraju vszi lyudi vumreti? — Gdo sze anda razmeva po imenu siveh? — Imaju pravichni sívlenye miloztche? — Gdo sze pako razmeva po mertveh? Imaju gréshniki takaj sívlenye miloztche? — Poleg chesza bude Kriztush lyudi szùdil? — Budeli sze Jesush vkiniti mogel? — Je on vszaznajuchi? — Ali jeli budemo Jesusha vtishiti mogli? Zakaj ne? Jeli bude ovde vreme miloszerdnosti, ali praviche? — Z-chem bude Jesush pravichne naplachuval? — Z-chem bude Jesush gréshnike kastiguval? Gdo nam to veli? Kaj veli Kriztush? Kam budu onda hmanyi, kam pako pravichni ishli?

*Koga bude
Jesush Kri-
ztush szù-
dil?*

PITANYE 2.

Kaj zadersava vu szebi oszmi kotrig Vére?

Razláganye.

1. Oszmi kotrig Vére izgovarja sze ovak :
Dùh szvéti vérujem vu Dùha szvétoga. Da Dùh szvéti je trejta Bosanzka oszoba, y pravi Bog je, da on od Otcza y od Szina jednako izhadya, kajti nyega tak Otecz kak y Szin poszlał je, to vre znate, Detcza moja! iz chetertoga navuka od treh Bosanzkih pershon. Ja anda vezda szamo od onoga china govoril budem, koj Dùhu szvétomu laztoviti je, najmre od poszvetchenya.

2. *Miloztcha Bosja je k-szvetozti potrebna.* Mi szmò szvéti onda, kada zlo odurjavamo, y dobro lyubimo. Bog je zevszema szvét, on odurjava zlo, y lyubi dobro na najzversheneshi nachin. Mi szmò detcza, y kip Bosanzki, mi anda nyegvu szvétoszt naszleduvati moramo. Ovo takaj on od nasz potrebuje; ar on zapovedal je Izraelczem: *Budite szvétì, kak y ja szvét jeszem.* (Levit. II.) Ali vi vre znate, (II. Navuk 2 pit.) y ja vam josche jedenput povem: prez miloztche Bosje nemremo nikaj za vekivechno sivlenye dobroga vchiniti, anda nemremo takaj szvétì biti.

3. *Jesush Kriztush nam je miloztchu zaszlusil.* *Miloztcha Bosja, veli sz. miloztchu Pavel: je po Jesushu Kriztushu Gozponu naszem.* (Rom: 7.) Kaj pako Jesush Kriztush zaszlusil je, to podelyuje nam Dùh szvétì. Iz

ovoga czilya zpunił je Jesush Kriztush szvoje o-
 bechanye, y deszėti dan po szvojem zastu-
 plenyu, najmre na Trojake, poszlal Dùha
 szvétoga vu szvét, da on pri nami na vsze
 veke oztane, tojezt nam milożtchu szvoju
 podelyi.

Kaj Dùh szvéti vu dushi zrokuje, to o-
 szebito vu Apostolih vidi sze. Pred doshezt-
 kom Dùha szvétoga bil je razum nyihov chi-
 zto szlab, oni vekivechne iztine nészu razme-
 li. Potlam dosheztka Dùha szvétoga pako bil
 je razum nyihov razszvétchen, oni pocheli
 szû prodekuvati, y navuchati. Pred doshezt-
 kom Dùha szvétoga bila je volya nyihova
 szlaba y plashlyiva; po dosheztku pako po-
 ztali szû ztalni y jaki; oni nészu sze bojali
 pregonov, y nikakve teskoche. Pred dosheztku
 Dùha szvétoga Apostoli josche nészu imali
 punożt lyubavi Bosje vu szebi, po dosheztku
 pako Dùha szvétoga bila je lyubav Bosja vu
 Apostole chizto vlejana; *Lyubav Bosja je vu
 szerdcza nasha vlejana po Dùhu szvétom;*
 veli sz. Pavel. (Rom. 5.)

Nut anda, detcza moja! ova izta zroku-
 je Dùh szvéti vu dushi nashi. Dusha nasha
 je po gréhu szlepa y tmichna poztala; Dùh
 szvéti daje szvétlozt, y razszvétchuje nyén
 razum, da Dobro zpoznati more. Nasha du-
 sha je po gréhu betesna, y k-zlu nagnyena po-
 ztala; Dùh szvéti daje nyoj jakozt, y giblye
 nyu, da poleg volye Bosje poszluje y chini.
 Dusha nasha je po gréhu od Boga odvernje-
 na, y nepriately Bosji poztala; Dùh szvéti
 vleje lyubav Bosju vu szerdcza nasha, y vchi-
 ni nasz priatelye Bosje.

4.
*Zrokavanya
 Dùha szvé-
 toga pri A-
 postolih.*

5.
*Zrokuwanya
 Dùha szvé-
 toga vu na-
 shi dushi.*

6.
Kaj poszlujucha milo-
loztcha Bosanzka je.

Od ovud moremo razmeti, da nuternya milo-
loztchà, koja nasz Bogu vugodne vclini, dvojverztna je, poszlujucha y poszvetchujucha. Poszlujucha je ona, koja nam k-vsza-
komu dobromu chinu podava sze, zato zove
sze takaj poszlujucha; ali ona z-vsza-
kem dobrem chinom preztaje. K-dobromu chinu mo-
ra pamet razszvétiti sze, y volya genuti sze;
milo-
loztcha poszlujucha ztoji anda vu razszvét-
chuvanyu razuma, y vu gibanyu volye. Me-
temtoga milo-
loztcha poszlujucha nechini nasz
chizto szvète, kajti vu nami neoztaje. Takaj
gréshnikom vu ztalishu gréha milo-
loztcha po-
szlujucha podelyiva sze, kajti oni prez ove na
pokoru genuti sze nebi mogli.

7.
Kaj poszvetchujucha milo-
loztcha Bosanzk: je.

Onu milo-
loztchu, koja vu nami oztaje, y nasz priatelye Bosje chini, imenujemo mi
milo-
loztchu poszvetchujuchu. Bog neche, da
mi szamo kad kad szvéti jeszmo; on hoche,
da mi vsze zmirom szvéti, y nyegvi priatelyi
jeszmo; tak nahadya sze takaj jedna milo-
loztcha poszvetchujucha, koja vu nami oztaje.
Od toga szegurne nasz chini szvéti Pavel, ka-
da veli: *Lyubav Bosja je vu szerdcza nasha
vlejana po Dùhu szvétom.* (Rom. 5.) Kaj
vu nasz zlejano je; to oztaje vu nami, lyu-
bav Bosja po Dùhu szvétom vu nasha szerdcza
vleva sze, lyubav Bosja anda vu nami oztaje,
y vu tom poztavlyena je milo-
loztcha poszvetchujucha. Metemtoga mi nezbudyavamo vszi-
gdar chin lyubavi Bosanzke, ov chin neoztaje
vszigdar vu nami; ali pripravnozt lyubavi
Bosanzke more vszigdar vu nami oztati. Neli,
moja detcza! vi imate vre kakvu pripravnozt
vu ovom ali onom rukotvorztvu; vi vezda ni-

kaj nedelate, ali pripravnozt ovoga ali onoga rukotvorztva oztaje vendar vu vami; ravno ovak oztaje takaj pripravnozt Boga lyubiti vszevdily vu nami; miloztcha poszvetchujucha ztoji anda vu zverhunaravzki pripravnozt Boga lyubiti.

Vezda vre lahko razmeti morete, kak nasz Dùh szvéti poszvetchuje. On nasz poszvetchuje najmre: kada vlevajuch vu nasz miloztchu poszvetchujuchu nasz szine Bosje chini, ali miloztchu poszvetchujuchu vu nami povekshava. Ovo pripecha sze na szvétom kerztu, vu shakramentu pokore, y kulikoputi druge szvéte Shakramente vredno prijemlyemo; kak vre odperteje vu navuku od szvéteh Shakramentov pokazal budem.

8.
Gde, y kak
nasz Dùh
szvéti po-
szvétchuje.

Bog takaj vszakomu chloveku podaje potrebnú miloztchu: ar *on hoche, da sze vszi lyudi zvelichiju.* (1 Timoth. 2.) Ako pako chlovek pri odpertoj szvetlozti ochi zapira, y pri dobrih jakoztih nikaj ne chini, tak je krivnya pri nyim, ne pako vu miloztchi.

9.
Bog vszako-
mu chloveku
podaje po-
trebnú mi-
loztchu.

Razgovori.

1.

Kak sze izgovarja oszmi kotrig vére? — *Koja Bosanzka osoba je Dùh szvétog?* Szam Otecz? ali szam Szin? Zakaj izhadya anda Dùh szvéti tak od Otcza, kak y od szina? — Koji chini szù oszebity Dùhu sz. laztoviti? Ztvarjanye, ali odkuplenye?

Koja Bosan-
zka osoba
je Dùh szvé-
ti.

2

*Je miloztcha
Bosja k-
szvétozti
potrebna?*

Kada szmò mi szvétì? Kada lasemo, vka-
nyujemo? Kaj moramo odurjavati, ako szvétì
biti hochemo? Kaj pako lyubiti? — Gdo je
zevszema szvét? — Chija detcza, y chiji kip
szmò mi? Koga moramo mi vu szvétozti na-
szleduvati? Zakaj Boga? — Y kaj je rekel
Bog Izraelczem, kak szvétì imaju oni biti? —
Jeli Bog hoche, da sze mi poszvétimo? Od-
kud to znash? — Jeli moremo mi pako. prez
miloztche Bosje k-sívlenyu vekivechnomu kaj
dobroga vchiniti? Moremo mi prez miloztche
Bosje szvétì biti? Zakaj ne?

3.

*Od koga je
miloztcha
Bosja?*

Gdo nam je miloztchu Bosju zaszlusil? —
Gdo nasz je odkupil? — Gdo nam pako po-
delyuje miloztchu Bosju? — Kada je Kri-
ztush Dùha szvétoga poszlal? Na Vuzem? —
Y kak dugo ima Dùh szvétì z-Czirkvum o-
ztati? Szamo jedno kratko vréme? —

4.

*Kaj je vchi-
nil Dùh szvé-
ti z-szoo-
jum milozt-
chum vu A-
postolih?*

Jeli je bil razum Apostolov pred do-
sheztkum Dùha szvétoga razszvetchen? —
Kada szû Apostoli pocheli navuchati; y pro-
dekuvati? — Kada je bil anda razum Apo-
stolov razszvetchen? Jeli je volya Apostolov
pred dosheztkom Dùha szvétoga jaka bila? —
Kada sze nészu Apostoli nikakve pogibelyi,
nikakvih pregonov bojali? Kada je anda vo-
lya Apostolov jaka poztala, y ztalna? — Je-
szu Apostoli pred dosheztkom Dùha szvétoga
vre punozt lyubavi Bosje imali? — Kada je
bila punozt lyubavi Bosje vu nye vlevana?
Gdo to veli, da Dùh szvétì lyubav vu nye
vlejal je? —

5.

Jeli Duh szvétì neoztane chesz vszu vekivechnozt z-szvojum Czirkvum? — Jeli on y vezda poszlujе za zvelichenye pravoverneh kerztchenikov? — Po chem je nash razum otmichen bil? — Gdo razszvétchuje pako nashega razuma? Po chem je nasha volya k-zlû uagnena poztala? — Gdo pako nyu giblye da ona poleg volye Bosje chini? — Po chem szmô sze mi od Boga odvernuli, y nyegvi nepriatelyi poztali? — Gdo vleva pako lyubav Bosju vu nasz, y chini nasz detczu Bosanzku? — Kaj chini anda Duh szvétì vu nami z-szvojum miloztchum? —

*Kaj chini
Duh szvétì
z-szvojum
miloztchum
vu nami?*

6.

Kulikoverztно je nuternya miloztcha Bosja? Kak sze zove ona miloztcha, koja nam k-vszakomu dobromu chinu podaje sze? — Kaj je anda miloztcha poszlujucha? Y zakaj zove sze ona poszlujucha? Jeli oztaje miloztcha poszlujucha z-nami, kada dobri chin vre poztavlyen je? Kaj sze mora vu chloveku razszvétiti, da on dobroga china kkvoga poztavi? — Kaj sze mora pri nyim gibati, da on kaj dobroga vchini? Vu chem ztoji anda miloztcha poszlujucha? — Jeli szama miloztcha poszlujucha nasz szvète chini? — Zakaj ne? Jeli ona vu nami oztaje? Jeszu gréshniki vu ztalishu gréha szvétì? — Bili sze mogli gréshniki prez miloztche Bosje poszlujuche na pokoru genuti? — Jelisze gréshnikom miloztcha poszlujucha takaj podelyiva? Zakaj?

*Kaj je mi-
loztcha po-
szlujucha?*

7.

*Kaj je milo-
loztcha po-
szvétchuju-
cha?*

Kak sze pako zove ona miloztcha, ko-
ja vu nami oztaje, y nasz detczu Bosju chi-
ni? Jeli hoche Bog da mi szamo kad kad szvé-
ti jeszmo? — Jeli sze nahadya miloztcha po-
szvétchujucha, koja vu nami oztaje? Zakaj?
Kaj veli sz. Pavel: po kem je lyubav Bosja
vu nasha szerdcza vlejana? — Jeli to vu na-
mi oztaje, kaj vu nasz vlewa sze? — Kaj zle-
va Dùh szvéti vu nasha szerdcza? — Jeli
anda lyubav Bosja vu nami oztaje? — Vu
chem ztojí anda miloztcha poszvétchujucha?
Jeli zbudyavamo mi nepreztancze chin lyuba-
vi Bosje? — Jeli ov chin vszevdily vu nami
oztaje? — Moremoli mi vszigdar pripravní
y nagneni biti Boga lyubiti? — Imash ti
vre kakvu pripravnost vu kakvem rukotvor-
ztvu? — Jeli ti vezda kaj delash? Jeli zato,
kajti vezda nikaj nedelash nemash pripravnost
vu rukotvorztvu? — Jeli oztaje anda pri-
pravnost lyubavi Bosje vu nami? — Jeli zto-
ji, miloztcha poszvétchujucha vu chinu lyu-
bavi Bosje? Vu chem anda?

8.

*Kak y gde
poszvétchu-
je nasz Dùh
szvéti?*

Kak poszvétchuje nasz Dùh szvéti? —
Gde poszvétchuje nasz Dùh szvéti? —

9.

*Jeli Bog
vszakomu
podaje po-
trebnu mi-
loztchu?*

Jeli Bog szamo nekoje lyudi zvelichiti
hoche? — Komu daje Bog anda potrebnú
miloztchu? Zakaj vszem lyudem? — Jeli za-
to vszi lyudi pobosni y zvelicheni poztaju?
Jeli je miloztcha zrok tomu? — Ako chlo-
vek pred szvétloztjum ochi zapira, moreli on
videti? Je pako szvétlozt zrok, da on nevi-

di? — Nego gdo? — Ali ako chlovek szvo-
je jakozti nepotrebuje, jeli on kaj vchiniti
bude mogel? — Jeszu jakozti zrok? Nego
gdo? — Ako pako koj chlovek miloztchu ne
potrebuje, gdo je zrok onda, jeli chlovek,
ali miloztcha?

I. Dokànychanye Nàvuka.

*Bog szam pokazuje Izraelczem pri od-
hotku iz Aegyptusha po danu po Obla-
ku, po nochi po ognenom stùpu putà
vu Kanaan.*

Poklamkam detcza Izraela chetiri zto y trideszet
let vu Aegyptushu ztanuvali, poklamkam zadnich Fa-
rao po szmerti pervorodyeneh Aegyptusha preztra-
shen, k-nyihovomu odhotku privolyil je, tak izishel je
czeli shereg lyudztva izraelzkoga, koj prez detcze y sen
shezt zto jezer lyudih iznashal je, jeden y on izti dan
iz Aegyptusha. Bog szam pokazal je nyemu putà na
jeden chudnoviti nachin; ar on puztil je jednoga Obla-
ka vszevdily pred nyimi hoditi, koj po dnevu tmichen,
po nochi pako szvetel kakti ogeny bil je, po tom zpo-
znali szù oni, po kojem putu iti, y kada na szvojem
putuvanyu pochinuti imali jeszu. Dapache ov chudno-
viti oblak szlusil je nyim, da sze oni proti navalenyam
faraonzkoga sherega, koj nye na zapoved, y pod vo-
dyenyem iztoga Faraona doztichi, y vu szusanztvo na-
zad dopelyati imal je, szegurne vchiniti jeszu mogli;
ar kada Izraelczy pri bregu cherlenoga Morja shatore
szvoje poztavili jeszu, da sze ovde nekuliko dnevoz
pochineju, y shereg faraonov nye vre zkoro doztigel

bi bil, tak oblak, koj predi vszevdily pred nyimi ishel je, puztil sze je med obodva sherege tak, da zkupa doйти nészu mogli; y da ov od ztrani Izraelczev szvétel, od ztrani pako sherega faraonovoga chizto tmi-chen bil je.

Dan najzadnih je naztal; y Mojsesh na zapoved Gozponovu zprusil je ruku zverhu Morja, ter taki ja-ki vetri raztirali szû vodu vu morju ztulikum jakozt-jum, da Izraelczí po szredini Morja na szuhom prejtí jeszu mogli; ar voda ztala je iz deszna y iz leva kakti zidi. Prevzetno podal sze je takaj Farao z-szvo-jem sheregom vu morje, y hotel je Izraelcze na putu, kojega Bog nyim za nyihovo oszlobodyenye pripravil je, doztichi. Ali nyegva kola, nyegvi konyaniki, y nyegov czeli shereg nészu mogli dalye iti. Vsza dozpela szû vu zmutnyu, kotachi na kolih poterli szû sze; y vezda zpoznal je Farao, da nyegov trud zapztuyn bibil, y da Bosja vszamoguchnozt z-Izraelczí je. On hotel je nazad povernuti sze, ali bilo je prekeszno; Mojsesh zopet na zapoved Gozponomu, koj z-nyim iz Oblaka govoril je, zprusil je szvoju ruku zverhu morja, na kaj vu hipu voda z-halabukum vu szvoje lesaliztche povernula sze, y czeli aegyptonzki shereg zakopala je.

Dragi! Gdo ne zpozna vu ovem ognenom y obla-chnem ztupu, koj Izraelczem ne szamo puta vu Ka-naan pokazal, nego nye takaj proti navalenyam aegyp-tonzkoga sherega tak moguchno branil je, kipa milozt-che Dùha szvétoga? Jeli néje ova, koja nasz nepreztan-cze razszvétchuje, y na putu vu vekivechnu domovinu proti vszem prechkam y navalenyam dùha peklenzkoga brani? Tak je; miloztcha je, koja nam tulikoputi volyu Bosanzku za zpoznati daje, koja vu nasz znanqzt Zve-lichenya zleva, y nasz od iztine vére kerztchanzke tak jako vputyuje. Ova je, koja nam véru hasznovitu vchi-

ni, koja nagnenya szerdcz nashih popravlya, y nasz vu szredini szuprotivchin ovoga sivlenya vzigdar vu krépozti ztalne y gyegyerne zadersi. Ova je, z-jednum rechjum, z-kojum vsze moremo, z-kojum vsze prechke na putu krépozti obladatai, y vsze podhmanyozti dùha peklenzkoga z-nishchetiti moremo. O zahvalimo vszaki dan Gozponu, da on po miloztchi, po koji on razuma nashega razszvetchuje, y volyu nashu poszvetchuje, nash vodya vu nebo, y nash moguchi branitely biti hoche. Terszimo sze ali takaj, da vszigdar nyegvem razszvetchenyam, y gibanyam nyegve miloztche véno szledujemo, dobro vchinimo, zlo pakq besimo. Amen.

II. Dokànchanye Nàvuka.

*Apostoli dobivaju Dùha szvètoga,
y chiniyu chùda.*

Jesush zapovedal je szvojem Apostolom pri szvojem zasztuplenyu vu nébo, da sze tak dugo vu Jeruzalemu naj zadersavaju, doklam Dùha szvetoga dobili budú. Polec ove zapovedi oztali szú oni vszevdily vu Jeruzalemu, zadersavali sze zkupa vu jedni hisi, molili, y chakali dana, vu kojem obechana batrivozt, Dùh szvéti dojtí ima. Kada anda dan trojachki doshel bi bil, takvi vchinyen je na jedenput iz neba jeden jaki stropot, kakti shum jednoga jakoga vihra, koj czelu hisu, gde zkupa bili szú, ztepel je, oni videli szú ognene jezike zverhu glave vszakoga, y poztali szú napunyeni z-Dùhom szvètem.

O kak veliko bilo je chùdo, koje vu ovom hipu z-Apostoli vchinyeno je! Oni pocheli szú ztranzke jezike govoriti, y odichene chine Bosje dichiti. Ovo chùdo vnosinu lyudih je povleklo; videli szú sze tak domachi, kak ztranzki sidovi, koji onda iz vszeh dersavih vu Je-

ruzalemu bili szû sze zpravili za obszlusavati, Trojachkoga szvétka, vu kupeh dohadyati, y hisu onu obkoliti, gde Apostoli bili jeszu. Nekoji oszupnuli szû sze, kada chuli szû Apostole z-vszakojachkemi jeziki govoriti, od kojeh znano je bilo, da predi nikakvoga drugoga zvan materiazkoga jezika govorili nészu; drugi pak o zespotavali szû sze govorechi: da szû pijani. Za tém vszoy vnosini ovoj zкупzpravlyeni prodekuval je szvéti Peter, y rekel, da Jesush, kojega na kris zazpeli jeszu, y pak od mertveh goreztal je, vu nebo zasztupil, y od ovud nyim Dùha szvétoga poszlal je, koj vu nyih ova dugovanya, koja vidé, chini. Pokazal je nyim, da Kriztush, kojega szû oni razpeli bili, Mesziash je bil. Vnogi, koji pri ovom szvétoga Petra prodechtvu bili szû, genyeni kajali szû sze za gréhe szvoje, y dali sze josche on dan kerztiti; bilo je pako obernyenéh okolo tri jezera.

Nut, Dragi! kaj dosheztek Dùha szvétoga vu Apostolih, y po nyimi vu tulikih lyudih vchinil je. O da bi miloztcha Dùha szvétoga ovakvo premenénye takaj vu nami vchinila! O da bi ona szerdcza nasha z-ognyem nyegve Bosanzke lyubavi vusgala, y z-szvojemi traki nashega razuma razszvetila, da ovak y mi jedenkrat bi pochimali drugi lyudi poztati! Da bi ona nashega jezika ravnala, da vishe govorenja nebi vadili, koja proti postenyu, proti vèri, proti szvétoj Czirkvi jeszu, nego da bi govorili, koja jedino za diku Bosju, za dobro nashega blisnyega, za povekshavanye vére szlusiju. O da bi najzadnich takaj tak szrechni bili, da po jakozti ovemiloztche Apostolom zpodobno vnogi na zpoznanje iztine, y szvojih bludnoztih bi sze genuli! O kak batrivno szvedochantzvo bi to bilo za nasz! jedno szvedochantzvo najmre, da Dùh szveti takaj zverhu nasz doshel je, y da nyega prijeli jeszmo. Amen.

III. Dokànychane Nàvuka.

Zàdnyi Szùdnyi dan, je dan ztràha za greshnika.

Kak ztrahovit Dragi! bude jednoch dan, vu kojem Jesush Kriztush, koj po podnesheni muki odiche-no vu nebo zasztupil je, od onud zopet doshel bude szuditi sive y mertve. Poklamkam szùncze y meszecz szvétlozt szvoju zgubili budû, y vszi sivi lyudi z-tmiczami obdani budû; poklamkam ogeny iz neba vsza posderl bude; poklamkam morja z-ztrashnem stropotom szvoja lesalischa oztavila, y vsza zemlya ztreshla sze bude; poklamkam Angeli z-trubentum y glaszom velikem mertve, koji vu grobih lesiju, pred szùd dozvali, y mertva tela z-szvojum dushum nazad sze zjedinilâ budû; o Bose! kaj budemo onda videli! Mi budemo videli szina chlovechjega dojduchega vu oblaku z-oblaztjum velikum y zmosnoztjum. Onda vidyeno bude znamenye szvétoga Krisa, y oztalo orudelje muke nyegve vu zra-ku; oblaki szlusili budû za tronush, na kojega sze on zpuztil, y lyudi szudil dude.

Jesush Kriztush onda pravichnem, koji na nyegvi deszniczi jeszu, rêkel bude: *Hodte blaseni Otcza mojega, vsivajte vam od pochetka szvéta pripravlyeno Kralyeztvo.* (Matth. 25.) *Hodte*, vashe szuprotivchine, pregoni y vasha bol vezda koncza imaju. *Hodte!* vi sziro-maski duhom, vi krotki, vi terplyivni kerztcheniki! *Hodte*, vi mirovni, vi pravichni, vi miloszerdni, vi chiztoga szerdcza, vi preganyani y obtersheni lyudi! *Hodte*, vashe je vezda kralyeztvo nebezko, ovo naj bude vasha vekivechna platcha! *Hodte, vsivajte od pochetka szvéta vam pripravlyeno kralyeztvo.* Onda obernesze k-greshnikom, y reche nyim: *Odhadyajte od mene prokleti vu ogeny vekivechni, koj je pripravlyen vrugu, y angelom nyegovem. Odhadyajte*, koji moju milozt-

chu zlo potrebuvali, y moje zapovedi hotoncze zame-
tavali jezte! *Odhadyajte* vi oholni, vi zkupczy, vi ne-
chizti, vi nepriatelzki, vi prazniki! *Odhadyajte vu ogeny*
vekivechni.

Ah! kak bude greshniku onda pri szerdczu! Kak
sze bude saloztil, kak sze bude plakul! pun zdvojnozti
bude krichal: *Vi gore zrushite sze na me, vi bresanyki*
pokrite mene. Tak proszim y zapriszesem vasz vezda,
o greshniki! po vrednozti one kervi, koju Jesush za
me y za vasz na krisu prelejal je, neoztanite vu grehah va-
shih doklam ov ztrashni dan dojde! Hitrite vnogobolye,
dapo jednom iztinzkem premenanyu sivlenya vashega
jednoga tak ztrahovitoga izrechka od vasz odvernete!
Oplachite vezda josche z-szuzami pokore hmanyoche
vashe, kada josche ove izbriszati morete, da morebiti
jednoch zapztuny y prez haszni plakali sze nebudete.
Amen.

NÀVUK 9.

*Od Czirkve, y od obchinztva szvè-
teh.*

PITANYE 1.

Kuj sadersava vu szebi devèti kotrig Vére?

Razláganye.

Devèti kotrig vére izgovarja sze ovak: ^{1.} *Znamenuva-
nye rechi:
kerztchan-
zka Czirkva*
*Szvetu Czirkvu katholichanzku, szvèteh Ob-
chinztvo. Vu vezdashnem pitanyu budem ja
szamo od Czirkve kerztchanzke govoril. Po
kerztchanzki Czirkvi nerazmeva sze zidana
hisa molitve, nego jedno drustvo jedna ob-
china pravoverneh kerztchenikov, tak kak po
rechi skola ne vszigdar skolna hisa, nego vi-
sheputi drustvo skolne detcze razmeva sze.*

Jesush Kriztush poztavil je Czirkvu kerzt- ^{2.} *Poztavlya-
nye y raz-
shiravanye
Czirkve
kerztchan-
zke.*
chanzku, kajti on sham najpervich novoga
zakona nazveztil, y lyudi na pravu véru o-
bernul je. Iz pochetka bila je Czirkva kerzt-
chanzka, iliti drustvo pravoverneh kerztche-
nikov szamo vu sidovzki zemlyi, y jako ma-
lo. Po dosheztku Dùha szvetoga pako prode-
kuvali szû Apostoli ne szamo vu sidovzki zem-
lyi, nego takaj po czelem szvétu navuka Je-
susha Kriztusha, y obrachali vsze zmirom vi-
she y vishe lyudih na véru, ter tak bila je

Czirkva kerztchanzka vsze bolye y bolye raz-shirjena.

3.
K-kerzt-
chanzki
Czirkvi zpa-
daju dobri y
zlochezti
kerztcheni-
ki.

K-kerztchanzki Czirkvi zpadaju vszi pravoverni kerztcheniki, dobri y hmanyi Neli vu skoli nahadyaju sze marlyivi y léni Vucheniki, metemtoga k-skoli zpadaju takaj léni, kajtisze k-skoli brojiju, valuju; ravno ovak zpadaju takaj hmanyi kerztcheniki k-Czirkvi, kajti pravoga navuka Jesusha Kriztusha, y szebe k-kerztchanzki Czirkvi valuju, oni szú pravi kotrigi Czirkve, akoprem mertvi kotrigi, kajti po gréhu sivlenye mizlozche zgubili jeszu.

4.
Vredyenyé
Czirkve
kerztchan-
zke.

Czirkva kerztchanzka vu szvétom pizmu med oztalemi prizpodablya sze Kralyeztvu, ovcharniczi, teltu. Kralyeztvo ima Predpoztavlyenie y podlosnike, ovcharnicza ima paztire y ovcze, telo ima glavu y kotrige. Ovak takaj vredyena je Czirkva kerztchanzka. Vu Czirkvi kerztchanzki nahadyaju sze predpoztavlyeni y podlosniki, paztiri y ovcze, jedna Glava y kotrigi. Kak dugo josche Kriztush sivel je, tak bil je on szam Poglavar, Paztir y glava. Po nyegvi szmerti poztavil je on Apostole za poglavare y paztire, szvétoga Petra pako za vidyenu glavu. Apostole szledeli szú Biskupi, szvétomu Petru pako szledi rimzki Papa vu chazti. Vezda jeszu anda Biskupi Poglavari y paztiri, rimzki pako Papa vidyena glava Czirkve kerztchanzke.

5.
Laztozito-
zti Czirkve
kerztchan-
zke.

Szamo jedna je prava Czirkva Jesusha, ar Kriztush néje danasz ovak zutra pako drugach govoril; on néje jednomu to, drugomu pako kaj drugo veruvati zapovedal. Je pako szamo jeden jednaki navuk Jesusha, tak

more takaj szamo jedna véra, anda szamo jedna prava Czirkva Jesusha biti. Zvun ovo jedine Czirkve, néje nikakve prave vére, and niti zvelichenya. Prava Czirkva Jesusha je *vidyena*; ar pravoverni kerztcheniki moraju szvoju véru valuvati, y poleg ove chiniti ovo pako chujemo y vidimo. Prava Czirkva je prez koncza y nemre faleti; ar Kriztush, rekel je szvojem Apostolom: *Ja zvami jeszen vsze dneve, do koncza szvéta.* (Matth. 28.) On ravna ovu, kakti nevidyena glava po Dùhu szvètem, ona anda vu szvojih Vére y dersanya nàvukih faleti nemre.

Nahadyaju sze drustva, zmed kojeh vno-ga szebi ime kèrztchanzke Czirkve pridrusila jeszu; kak anda pravu Czirkvu Jesusha Kriztusha od vszeh drugeh, koje szebi ovo ime krivo jerilyu, razluchavati moremo? Po szledèchih chetverih znameniyh. *Pervich* Czirkva Jesusha mora biti jedna, tojezt: ona mora imati szamo jednu Glavu, jednoga nàvuka, jednoizte Shakramente; ar Kriztush szamo je jednu glavu, jednoga nàvuka, y jednoizte Shakramente poztavil. *Drugoch* ona mora biti szvèta; szvèta vu nàvukih, szvèta vu Shakramentih, szvèta vu szvojih kotrigih. *Trejtich* prava Czirkva Jesusha Kriztusha mora biti obchinzka iliti katholichanzka, kajti nyu Jesush za vsze lyudi, za vsza vrémèna, y za vsza mezta poztavil je. *Chetertich* ona mora biti Apostolzka, tojezt: nyén nàvuk, y nenyi pàztiri moraju od Apostolov izhadyati; kajti Kriztush po Apostolih szvoju Czirkvu razshiril je.

6.
Znamènya
prave Czirkve.

Schloissnigg Ixtipe Vére. Del I.

7.
Ova zname-
nya nahu-
dya mo mi
vu rimzki-
katholichan-
zki Czirkvi.

Rimzku Czirkvu imenujemo onu, koja z-Rimzkem Biskupom zjedinjena je. Rimzko-katholichanzka Czirkva je jedna; ar vszi rimzki katholichanzki kerztcheniki imaju jednake navuke, jednake Shakramente, y zpoznavaju szamo jednu najvisheshu glavu vidyenu najmré rimzkoga Papu. Rimzko-katholichanzka Czirkva je szvêta, nyoj nikakvi nepobosni navuki dokazati sze nemreju, ona more metemloga vnoge szvête muchenike, zpovednike y devicze pokazati. Rimzko-katholichanzka Czirkva je Apostolzka, ar ona vuchi y véruje, koja takaj Apostoli vuchili y véruvali jeszu, y nyeni Biskupi jeszu nametzniki Apostolov. Rimzko-katholichanzka Czirkva je obchinzka; ar vszigde, vszako vréme, y od vszeh fel lyudih nahadyali szû sze rimzko-katholichanzki lyudi, y josche nahadyaju sze. Rimzko-katholichanzka Czirkva je anda prava Czirkva Jêi usha Kriztusha.

R a z g o v o r i.

1.

Kaj je
kerztchan-
zka katholi-
chanzka
Czirkva?

Kak sze izgovarja deveti kotrig vére?
Kaj je szvêta kerztchanzko-katholichanzka Czirkva? —

2.

Gdo je
kerztchan-
zku Czirkvu
postavil, y
razshiril?

Gdo je kerztchanzku Czirkvu postavil?
Gdo je predi novoga zakona nazveztil? Jesush ali nyegvi Apostoli? — Jeli je Czirkva kerztchanzka iz pochetka velika bila? — Jeli je Kriztush po czelem szvétu prodekuval? — Koga je Kriztush po szvétu poszlal? — Po

kém je anda Czirkva kerztchanzha razshirjena?

3.

Koji lyudi zpadaju k-kerztchanzki Czirkvi? Pobosni ali hmanyi? — Jeszu vszi vucheniki marlyivi? Zpadaju pako léni takaj k-skoli? — Jeszu vszi kerztcheniki pobosni? Zpadaju pako hmanyi takaj k-Czirkvi? — Verujuli takaj hmanyi vu návuk Jesusha? Zakaj zpadaju anda takaj hmanyi kerztcheniki k-Czirkvi? — Jeli je véra prez chinov siva? — Jeli poztavlyaju hmanyi kerztcheniki dobre chine? — Kakvi kotrigi Czirkve jeszu hmanyi kerztcheniki? sivi, ali mértvi?

Koji lyudi zpadaju k-kerztchanzki Czirkvi.

4.

Jeli vu jednom kralyeztvu nahadyaju sze szamo podlosniki? nikakvi Poglavari? — Jeli prizpodablya Kriztush Czirkvu jednomu kralyeztvu? — Jeli nahadyaju sze vu Czirkvi Poglavari y podlosniki? Zakaj? — Ali jeli ima télo chlovechanzko kotrige prez glave? Jeszu kotrigi Czirkve prez glave? Zakaj ne? Kak dugo Kriztush sivel je, gdo je bil glava y poglavar? — Koga je pako Kriztush po szvoji szmerti za Poglavare poztavil? — Y koga je Kriztush za vidyenu glavu naredil? Gdo szledi Apostolom vu nyihovi chazti? — Koji szú anda vezda Poglavari Czirkve? — Gdo szledi pako Petru vu nyegvi chazti? — Gdo je anda vezda vidyena glava Czirkve?

Kak je Czirkva kerztchanzka vreúyena?

5.

Jeli je Kriztush dahasz ovak, zutra pako drugách govoril? Zakaj ne? — Ali jeli je Jesush jednomu to, drugomu pako drugo kaj

Jeli je vi-she kak je-ána prava Czirkva Je-

*susha Kri-
ztusha?*

za véruvati zapovedal? — Je anda Kriztush za vsze jednako navuchal? — Jeli je vishe kak jedna véra? Zakaj je szamo jedna véra? — Y ako szamo jedna véra je, morejuli onda vishe Czirkve biti? — Jeli je vishe, kak jedna prava Czirkva? — Zakaj szamo jedna? Jeli je vishe kak jedna véra?

6.

*Koje szû la-
ztovitozti
prave Czir-
kve Jesusha
Kriztusha?*

Jeli je Czirkva Jesusha Kriztusha vidyena? Zakaj? Jeszuli lyudi nevidyeni? — Pochem pokasuju pravoverni kerzticheniki szvoju véru? — Zakaj je anda prava Czirkva Jesusha Kriztusha vidyena? — Kak dugo bude Czirkva Jesusha Kriztusha ztala? — Moreli Czirkva Jesusha vu návukih vére y dersany faleti? — Ako Kriztush z-Czirkvum je, moreli ona onda faleti? — Kak dugo obechal je Kriztush z-szvojum Czirkvum biti? Zakaj je anda Czirkva Jesusha prez koncza, y nefalena?

7.

*Zakaj mora
prava Czir-
kva jedna
biti?*

Koja szû znamenya prave Czirkve? — Zakaj mora prava Czirkva jedna biti? — Kada je pako Czirkva jedna? — Kada vszaki druge návuke, y druge Shakramente ima? Ali morebiti ima jedno telo vishe kak jednu glavu? — Ako anda Czirkva jedna je, kuli-ko more ona Glav imati? Zakaj mora prava Czirkva szvêta biti? — Gdo je pochetnik prave Czirkve? — Neli Jesush zevszema szvêt? Morali prava Czirkva katholichanzka biti? — Kaj hoche ova rech rechi: *katholichanzka*? Kam je Jesush Kriztush szvoje Apostole poszlal? — Jeli je anda Kriztush szvoju Czir-

kvu szamo za nekoja mezta, za nekoje lyudi poztavil? Zakaj za vsze? — Y kak dugo ohechal je Kriztush z-szvojum Czirkvum ozdati? — Za koja vrémèna je Kriztush szvoju Czirkvu poztavil? — Zakaj za vsza? — Zakaj mora anda prava Czirkva katholichanzka biti? — Za koja mezta, lyudi y vrémèna je Kriztush szvoju Czirkvu napravil? — Po kém je Kriztush szvoju Czirkvu razshiril? — Zakaj mora prava Czirkva Apostolzka biti? Ako pako návúki y paztiri kakve Czirkve od Apostolov nedohadyaju, je onda ona Czirkva Apostolzka? Zakaj ne? — Koju Czirkvu imenujemo Rimzko-katholichanzku? — Jeli je vishe drustvih, koja sze kerztchenike ozi-vaju? — Jeli je vszako zmed ovéh prava Czirkva? Zakaj ne? — Jeli je vishe pravih Czirkvih Jesusha Kriztusha? — Jeli je Rimzko-katholichanzka *jedna*? — Jeli ima ona vishe Glav? Koga zpoznavaju Rimzko-katholichanzka Czirkva za szvoju vidyenu glavu? Imali vu Czirkvi rimzko-katholichanzki vszaki szvoje návuke vére? — Ali jeli ima vszaki druge Shakramente? Zakaj je Rimzko-katholichanzka Czirkva jedna? Jeli nema ona jedne Vére návuke, jednu Glavu? — Je rimzko-katholichanzka Czirkva szvétà? Jeli sze nahadya kaj neszvètoga vu nenyih Návukih? Imali ona, anda jednoga szvétoga návuka? Zakaj? — Imali rimzko-katholichanzka Czirkva takaj szvète kotrige? Odkud znamo to? — Iz kojega izpisza? — Zakaj je ona anda szvétà? — Jeli sze szamo vu jednom meztu nahadyaju rimzko-katholichanzki kerztcheniki? Kojà zmed vszeh kerztchanzkih Czirk-

kvih je najboljše razširjena? — Jeli je anda rimzko-katholichanzka Czirква obchinzka? Zakaj? — Kada sje je rimzko-katholichanzka Czirква pochela? — Y jeli je ona od vremenih Apostolov kada preztala? Odkud dohadyaju nenyi návukf y paztiri? — Je rimzko-katholichanzka Czirква takaj Apostolzka? Zakaj? Vu koji Czirқvi nahadyamo mi znamenya prave Czirқve? — Koja je anda prava Czirқva? Zakaj rimzko-katholichanzka?

PITANYE 2.

Kaj sadersava vu ssebi devéti kotrig vére od obchinztva szvéteh?

Razlåganye.

1.
Kakvo ob-
chinztvo
med kotrigi
téla prebiva.

Obchinztvo imati znamenuje tuliko, kak Dobro med szobum deliti. Kotrigi nashega téla imaju med szobum obchinztvo, kajti jeden Dobra drugoga delnik je, y jeden od drugoga haszen ima. Ruka ima haszen od ochih, kajti ova leseshe posluje, ako oko vidi.

2.
Czirқva je
duhovno télo,
pravoverni
kerztcheniki
imaju ob-
chinztvo.

Ravno ovak je vu Czirқvi; kerztchanzka Czirқva je télo Jesusha, od kojega Jesush nevidyena glava, pravoverni kerztcheniki kotrigi, Duh szvéti pako sivlenye ovoga téla je. Kerztchanzka Czirқva je jedno duhovno télo, kajti kerztcheniki szamo po véri, ufanyu y lyubavi zjedinyeni jeszu.

Telovna dobra imenujemo ona, koja té-
lu na vremenito sivlenye szlusijsu; dühovna
pako ona, koja dushi na vekivechno sivlenye
haszniju. Jesush Kriztush szvoji Czirkvi né-
télvna, nego dühovna dobra podelyil, ova-
kva jeszu szvéti shakramenti, aldov szvète
Meshe, molitva, dobra déla y najemi vérneh
kerztchenikov. Kada anda pravoverni kerzt-
cheniki obchintzvo imaju, tak vszi delniki o-
véh duhovnéh dobrih jeszu; kaj jeden Do-
broga ima, to ima y drugi, kaj jeden dobro-
ga chini, tak ovoga vszi delniki poztaju.
Obchintzvo szvèteh ztoji anda vu tom, da vszi
kotrigi Czirkve delniki dobréh dühovnéh je-
szu. Ovo obchintzvo imenuje sze obchin-
zvo szvèteh, ne kak da vszi kerztcheniki szvè-
ti bi bili, nego kajti vszi k-szvètozti pozva-
ni jeszu.

3.
Vu chem ob-
chi nztvo
szvèteh zto-
ji, y zakaj
ovo obchin-
zvo szvèteh
imenujemo.

Vre szù pred nami vnogi pravoverniki
bili, koji vszi pomerli jeszu. Ali nyihove du-
she siveju josche, oni moreju z- Czirkvum
zjedinyeni biti, kajti Czirkva jedno duhovno
télo je. Szamo dushe prokleteh nészu vishe
z-Czirkvum zjedinyene, kajti prez lyubavi
prez miloztche poszvetchujuche preminule je-
szu. Dushe vu Purgatoriumu y szvetczi vu ne-
bu jeszu josche z-Czirkvum zjedinyene, kajti
vu lyubavi preminule jeszu. Kotrigi Czirkve
anda, koji med szobum obchintzvo imaju, je-
szu Vérni na zemlyi, Szvetczi vu nebu, Du-
she vu Purgatoriumu.

4.
Koji kotrigi
Czirkve ob-
chintzvo
imaju.

Mi vérni na zemlyi imamo med nami
obchintzvo, kajti nasha molitva, y vrédnozt
dobreh del drugem takaj na haszen dojdeju.
Mi imamo obchintzvo z-szvètczi vu nebu, kaj-

5.
Kak kotrigi
Czirkve ob-
chintzvo
imaju.

ti mi ove postujemo, y oni za nasz pri Bogu prosziju. Mi imamo obchinztvo z- dushami vu Purgatoriumu, kajti mi nyim z-nashemi dobremi dèli pomasèmo, one pako jednoch za nasz pri Bogu prosziti moreju.

Razgovori.

1.

*Imaju kotri-
gi téla ob-
chinztvo?*

Imash ti vnoge kotrige vu tvojem télu? Vu peldi koje? — Kada oko nikaj nevidi, more onda ruka poszluvati? — Jeli jeden kotrig nepoztaje delnik Dobra drugoga? Imaju anda kotrigi téla tvojeja obchinztvo med szobum? Zakaj?

2.

*Kakvo télo
je Czirkva.*

Chije télo je Czirkva? — Gdo je nevidyena glava Czirkve? — Gdo szu kotrigi Czirkve? Kakvo télo je Czirkva? — Po chem sze kerztcheniki zjediniyu? Prez Vére, ufanya y lyubavi? — Zakaj je Czirkva anda jedno dühovno télo?

3.

*Koja szú
dühovna Do-
bra Czirkve?*

Koja Dobra imenujemo télovna? Kojapako dühovna? — Je Kriztush szvoji Czirkvi penez ali télovna Dobra dal? Nego kakva? Kojaszú dühovna Dobra Czirkve? Nészu sz: Shakramenti dühovna Dobra? Ali aldov sz: meshe, molitva, dobra déla? Kakvaszú ovo Dobra? — Jeli sze szamo nekoji kotrigi vsivaju Shakramentov ali Aldova sz: Meshe? — Ali ako jeden kotrig kaj dobroga chini, jeli drugi nikaj od toga néma? — Kakvih Do-

brih jeszu vszi kotrigi Czirkve delniki? —
Vu chem ztoji anda obchinztvo szvèteh? —
Jeszu vszi kerztcheniki pobosni? — Zakaj
imenujemo obchinztvo, obchinztvo szvèteh?
Jeszu vszi kerztcheniki k-szvètozti pozvani?

4.

Nészu pred nami nikakvi pravoverni kerzt-
cheniki bili? — Kam szû ovi dozpeli? — Je-
szu dushe nyihove takaj pomerle? — Mo-
rejuli ali dushe nyihove josche z-Czirkvum
zjedinyene biti? — Zakaj? Jeli Czirkva né
jedno dùhovno télo? — Morejuli takaj dushe
prokleteh z-Czirkvum zjedinyene biti? Za-
kaj ne? Jeszu one vu lyubavi preminule?
Kak szû pako dushe vu Purgatoriumu y szvet-
czi vu nebu iz ovoga szvéta preminule? —
Moreju Dushe vu Purgatoriumu y szvètczi
vu nebu z-Czirkvum zjedinyene biti? Zakaj?
Koji kotrigi Czirkve imaju anda med szobum
obchinztvo?

*Koji kotrigi
Czirkve
imaju med
szobum ob-
chinztvo?*

5.

Kakvo obchinztvo imamo mi pravover-
niki na zemlyi med nami? — Kakvo imamo
z-szvètczi vu nebu? Moremo mi nye postu-
vati, y oni za nasz moliti? — Kakvo ima-
mo z-Dushami vu Purgatoriumu? Po chem
moremo mi nyim pomochi? — Kaj moreju
one za nasz chiniti? —

*Kakvo ob-
chinztvo i-
maju kotrigi
Czirkve med
szobum?*

I. Dokàunchanye Nàvuka.

*Barka Noema je kip Czirkve kerst-
chanzke.*

Kakgoder taki po ztvarjanyu szvéta broj lyudih povekshal sze je, ovak povekshala sze je takaj hmanyocha lyudih. Bog vsza mogucha je vehinil, da nye na pobolshanye sivlenya dopelya. Dugo vrémèna puztil je on nye po Noemu, jednom mudrem y pobosnem chloveku opominyati; ali vszi opomenki bili su zahman; oni puztili szû Noema govoriti, y vehinili szû, kaj szû hoteli. Na jedenput dokonchal je Bog vsze ove zlochezte lyudi iz zemlye izbriszati, szamo Noema zkupa z-nyegvemi hotel je zachuvati. Iz ovoga Czilya zapovedal je Bog Noemu jednu neizmerno veliku ladju napraviti, vu koji lyudi y sivina ztanuvati budû mogla; on povedal je nyemu kak vizoka, kak shiroka y duga ova ladja biti mora. Noe y nyegvi Szini delali szû ovu, akoprem od drugéh lyudih oszmehavani bili jeszu. Kak berse ladja gotova bila je, tak zapovedal je Bog nyemu z-senûm, szvojemi tremi szini y nyihovemi senami vu ovu ztupiti, y vszakoverztu sivinu z-szobum vzeti, koja vu vodi siveti néje mogla. Komaj da to zversheno bilo je, tak puztil je Bog jakoga desgya, koj 40 dnevo y nochih nepreztancze zleval sze je, y zkupa iz vszeh zkrovnih meztih zemlye, iz zviranykih y iz zdenczo izishle szû vode, koje najvisheshe gore pokrile jeszu. Vszi lyudi po tom zgubili szû sivlenye. Szamo Noe z-szvojemi oszlobodil sze je, pokehdob ladja, vu koji on bil je, od raztuche vode vsze zmirom holye podignyena, nyemu szegurnozt doprineszla je.

Jeli je potrebno, Dragi! da vam z-vnogemi rechmi povem, koja iz ovoga pripovedanya navchitisze morete? Jeli neznate vu ladji, vu koji Noe y

nyegvi oszlobodyeni jeszu, kipa nashe szvète jedine blaseno chineche Czirkve? Jeli néje Czirkva ona ladja, na koji Jesush Kriztush 33 let tak nezatrudlyivo delal je, da vsze one od zkvarjenja oszlobodi, koji sze vu ovu ladju podaju? Tak je: Czirkva, vu koje naruchaju mi porodyeni, y do vezda tak zkerblyivo odhranyeni jeszmo, je ona Barka, zvun koje Zvelichenya ufati sze néje! Hvalimo anda predobromu Bogu, koj nasz k-Czirkvi ovi pozval, pred tulikemi millioni lyudmi izebral, y za naveke blasene vchiniti hoche. Zpoznajmo ali takaj nashu dusnozt, koju nam ravno ovo miloztche puno Zvanye nalase! Hochu rechi: obdersavajmo vsza ona, koja ova Czirkva nasz vuchi, dersimo ova iztinita y nedvojena; ar szamo ono véruvati hoteti, kaj Bog odperto ochituval, kaj razlosno vu Evangeliumu zadersava sze, ne pako takaj ono, kaj ova nam za véruvati napervoztavlya, nasz od poganinov razluchavalo nebi. *Koj Czirkvu neposzlusha, veli szam Jesush, nyega za poganina dersi. (Matth. 18.)* Amen.

II. Dokànchanye Nàvuka.

Kriztush postavlya Petra za glavu Czirkve.

Kak dugo Jesush, pochetnik Czirkve kerztchazke, po szvétu hodil je, tak bil je on szam Glava ove; ali kajti on na zemlyi za navéke oztati né imal, nego po dovershenom poszlu nashega odkuplenya k-otczu szvómu nebezkomu povernutisze je moral, kaj je vchinil Jesush, da szvoju ztoprav vtemelyenu Czirkvu prez Poglavara prez glave neoztavi? Chujte dragi! Jednoch kada Shimon Peter vu imenu vszeh drugih Apostolov Bosanztvo Jesusha ochito bi bil valu-

val, tak rekel je Zvelichitely nyemu: *Ti jeszi Peter, y zverhu ove pechine podignul budem Czirkvu moju: — Tebi dam klúche kralyestva nebezfgoga, y kaj goder zavesesh na zemlyi, bude zavezano y na nebu; y kaj god odvasesh na zemlyi, bude odvezano y na nebu.* (Matth. 16.) Po oveh rechih ohechal je anda Kriztush Petru, da on nyemu po szvojem odhotku vszu oblazt zverhu zkupchine pravoverneh kerztchenikov podeliti hoche.

Priblisavala sze je vura odhotka Jesusha iz ovoga szvéta, y Jesush, koj za vsze pri Otczu nebezkom molil je, da nye vu véri zdersati bi hotel, proszil je zadnich oszebito za Petra, da nyegva véra pomenshala sze nebi. *Shimon!* tak oszegural je Jesush nyega szam; *Shimon ja szém za te proszil, da tvoja véra nepomensha sze, y ti, kada sze jednoch præobernesh, tak objachi tvoju bratju.* (Luc. 22.)

Zadnich izkazal sze je Kriztush pri Tiberionzkom Morju Apostolom, koji ravno ribe lovili jeszu. Po jedni z-chúdom vchinyeni lovini rib pozval je Jesush Petra k-szebi, y poztavil nyemu pitanye ovo: *Shimon szin Jonasha lyubishli mene?* Peter odgovori: *Gozpone! ti znash, da lyubim tebe.* Onda rekel je Jesush nyemu: *paszi ovcze moje.* Chez mali chasz pital je zopet Jesush Petra: *Shimon szin Jonasha lyubishli mene?* Peter zopet odgovoril je: *Gozpone! ti znash, da lyubim tebe.* Y takaj Jesush ponovil je: *paszi ovcze moje.* Zadnich pital je Jesush trejtich Petra. *Shimon Szin Jonasha lyubishli mene?* Nato razsaloztzil sze je Peter, y prebojal sze kajti Jesush jedno, y onoizto pitanye vre triputi nyemu poztavil je; metem toga on priszigava, da on Jesusha lyubi: *Gozpone! veli on: ti jeszi vszaznajuchi, ti znash, da lyubim tebe, y vezdu rekel je Jesush k-nyemu: paszi ovcze moje.* (Joann 21.)

Zpoznejte, Dragi! iz ovoga pripovedanya, vu Petru Oblazt, koju nyemu Jesush Kriztush predal je; ar Petru je on obechal, da on na nyim Czirkvu podigel, y nyemu klúche Neba predal bude; za Petra je on pred szvojom mukum oszebito za zdersavanye y jakozt vu véri proszil; Petru po szvojem goreztajanyu izruchil je on pazti Ovcze nyegve, tojezt: rávnanye zverhu vszeh pravoverneh kerztchenikov prez razlúke: Peter anda po zasztuplenyu Jesusha bil je vidyena glava Czirkve, y predpoztavleni pravoverne Obchine. Ali jeli Peter josche sive? Gdo je nyegov pravdeni Nameztnik? Jeli ne-ovo rimzki Papa, koj, kagoder vu chazti, Petru, ovak nyemu y vu oblazti szleduje? Ov anda josh dan danashni ima oblazt zverhu pravoverneh, kak nyu Peter inal je. O chuvajte sze anda, Dragi! da od ove Glave Czirkve kerztchanzke zametavajuch nebi miszlili, ali govorili; zatisznite, kuliko moguche je, bedaztem blaznikom proti nyegvoj Oblazti, hmánya vuzta, reczite nyim; da Papa otec, najvekshi paztir, prvi Poglavar, od iztoga Kriztusha odluchena Glava Czirkve je, y da zametavanye ali vrazenye ovoga, jedno zametavanye y vrazenye iztoga onogaje, koj nyega za Glavu Czirkve odluchil je. Amen.

III. Dokànychanye Nàvuka.

*Obchinstvo szvèteh nass pritiravati mora,
da dobro chinimo.*

Vre prvi pravoverniki vchinili szú jedno obchinstvo szvèteh. Oni bili szú jedno szerdcze y jedna dùsha. Oni nészu imali szamo vrémenita obchinzka dobra odkuda siveli jeszu; nego oni szu takaj zkupa, y jeden za drugoga molili, aldove zvershavali, y Boga dichili. Oni postuvali szu szvète vu nyihovih grobih, y proszi-

li nye za nyihov zagovor, puni najszegurneshe zaufanozti, da y oni za nye vu Nebu pri Bogu proszili budú. Zadnich molili szû oni takaj za dushe pokojneh vu Purgatoriumu Boga, da ovak y ovi jednoch pri tronushu Bosanzkem, pri Bogu za nye prosziti bi hoteli. Dragi! kulika je to miloztcha za nasz, da y mi vu obchintvu szvèteh sivemo? Kuliko veszelye mora sze vu szerdczu nashem zbuditi, da mi kotrigi jedne Czirkve jeszmo, koja detczu szvoju z-tak velikemi miloztchami nadeluje? Kuliku hvalu najvishnejemu Bogu davati moramó, koj nasz prez nashih zaszlusbih iz szame miloszerdnoztii k-Czirkvi szvoji pozval je?

Naj bude anda jedino terszenye nashe, da sze Czirkve ove chverzto dersimo, y nigdar od ove ne oddrusimo! Terszimo sze ali takaj vsze zmirom vishe y vishe dobra vchiniti, ar z-chem vishe dobra vchinili budemo, ztem vekshega dela od Dobrih drugeh vernieh imali budemo! Ovo obchintvo Szvèteh pri nami najvchini, da jeden drugoga vu Kriztushu Jesushu bratinzki lyubimo. Vszi jednako govorimo; da nebude med nami neszlosnozt y razdrusenye, nego da zversheni budemo, y jedni vu pameti, y mishlenyû. Na kratkom, terszimo sze, da vszigdar sivi kotrigi Czirkve oztanemo, da y mi jednoch vredni budemo, kotrigi preobladajuce Czirkve vu nebu poztati. Amen.

NÀVUK 10.

*Od deszetoga, jedenàiztoga y dwa-
nàiztoga kotriga Vére.*

*Od gréhov odpuztchanya, téla gore-
ztajanya, y sitka vekivechnoga.*

PITANYE 1.

Kaj zadersava vu szebi deszeti kotrig Vére?

Razláganye.

Deszeti kotrig vére ízgovarja sze ovak: ^{1.} *Prava Czír-
Gréhov odpuztchanye.* Ov kotrig Vére vuchi <sup>keg ima o-
blazt gréhe</sup> odpuztchati. Kriztush rekel je
szvojem Apostolom: *vzemeté Dúha szvétoga,
kojem odpuztite gréhe, odpuztcheni budú,
kojem pak zadersité, zadersani budú.* (Joann.
20.) Ovde Kriztush nechini nikakvu íznem-
bu. Czírka ima anda oblazt vsze grehe, ku-
liki, y kak veliki bi bili, odpuztchati.

Metemtoga vendar nedaje Kriztush ovu ^{2.} *Ovu oblazt
vu Czírki
inaju szamo
Biskupi y
Meshniki.*
oblazt vszem pravovernikom vu Czírki, ne-
gó szamo Apostolom. On hotel je pako, da
Czírka nyegva do koncza szvéta terpi, anda
morala je oblazt ova na nameztnike Aposto-

lov prenezi sje. Nameztniki Apostelov vu o-
vi oblazti jeszu Biskupi y Méslniki. Vu pra-
voj Czirki imaju anda Biskupi y Meshniki
oblazt gréhe odpuztchati. Vszi pravoverniki
moreju odpuztchanya gréhov delniki poztati,
ali ne vszi pravoverniki imaju oblazt gréhe
odpuztchati. Ali takaj Biskupi y Meshniki ne
odpuztchaju gréhe vu szvojem imenu, nego
vu imenu Bosjem, koj oszebito po gréhu
zbantuje sje, y anda takaj szam iz laztovite
mochi gréhe odpuztcha. Meshniki jeszu sza-
mo Szlusbeniki Bosji, oni moreju anda szamo
vu imenu Bosjem, y na mezlu Boga gréhe
odpuztchati.

3.

*Kaj odpuzt-
chanye gré-
hov zrokuje.*

Kakoder miloztcha poszvetchujucha po
gréhu iz dushe pretirava sje, ovak ova takaj
zopet vu dushu povratcha sje, kada gréhi od-
puztcheni jeszu. Od toga szegurne nasz chini
sz. Pavel govórechi: *Vi jezte oprani, vi jezte
poszvetcheni, y opravicheni po imenu Gozpo-
na nashega Jesushu Kriztusha, y po Dùhu
nashega Boga. (1 Cor. 6.)* Zato zove sje
oproztchenye gréhov *Opravichenye*, kajti gré-
shnik po tom pravichen y szvét poztaje. Ali
néli, ako jednoga guhavoga z-josh tak lepe-
mi opravami odevali budemo, tak nyega ven-
dar josche chiztoga ozvati nebudemo mogli?
Ravno ovak y nasha dùsha nigdar pravichna
y szveta ozvati sje nebi mogla, ako zname-
nya gréhov szamo bi sje pokrivala, ne pako
iztinito izbriszala. Gréhi anda pri opraviche-
nyu iztinzko izbrishaju sje, y dùsha poztaje
lepa y chizta, kak ona pred gréhom bila
je.

Razgovori.

1.

Kak sze ízgovarja deszeti kotrig vére? *Je Kriztush szvoji Czirkvi oblazt dal gréhe odpuztchati?* — Kaj nasz vuchi deszeti kotrig vére? — *Je Kriztush szvoji Czirkvi oblazt dal gréhe odpuztchati?* — Zakaj velish ti, da Kriztush szvoji Czirkvi oblazt dal je? — Kaj veli Kriztush szvojem Apostolom? — Komu szû gréhi odpuztchani? komu zadersani? — Jeli Kriztush pri podelyivanyu ove oblazti vchinil kakvu iznembu? — Kada anda gréhi vnogi y veliki jeszu, tak onda ovi od Czirkve odpuztchati sze nemreju? Zakaj moreju?

2.

Morejuli vszi pravoverniki odpuztchanya gréhov delniki poztati? — Moreju ali takaj vszi pravoverniki gréhe odpuztchati? — Zakaj ne? — Komu je rekel Kriztush: *kojem vi odpuztite?* Zakaj nemreju anda vszi gréhe odpuztchati? — Kak dugo imala je Czirkva Jesusha Kriztusha obztati? — Jeszuli anda y nameztniki Apostolov oblazt gréhe odpuztchati imati morali? — Zakaj? Gdo szû nameztniki Apostolov? Czeszari ali Kralyi? — Gdo ima anda vu pravoj Czirkvi oblazt gréhe odpuztchati? — Zakaj Biskupi y Meshniki? Jeli Meshniki vu szvojem imenu gréhe odpuztchaju? — Gdo sze navlaztito po gréhu zbantuje? Meshnik? — Gdo more anda iz laztorite mochi gréhe odpuztchati? — Jeli Bog vszigdar szam iz Neba dojde, da nasz od gréhov odvese? — Koga je Bog za ovu szlusbu odredil? — Vu chijem imenu odpuztchaju anda meshniki gréhe? —

3.

*Kada gréhi
odpuztchaju
sze, jeli do-
bivamo mi-
loztchu po-
szvetchuju-
chu?*

Po chem pretirava sze miloztcha po-
szvetchujucha iz dushe nashe? — Po chem sze
Bog zbantuje? — Kada sze pako miloztcha
Bosja povratcha? Kak dugo gréhi odpuztche-
ni nézu? — Gdo veli to? Jeli veli sz. Pavel
szamo: *Vi jezte oprani?* Kada anda nam
grehi odpuztchaju sze, jeli sze onda milozt-
cha poszvetchujucha povratcha? — Kaj veli
sz. Pavel? — Y kada gréshnik opravichen
je, kak sze ov chin zove? Jeli ovo né opra-
vichenye? — Jeli poztajemo mi po odpuzt-
chanyu gréhov pravichni y szvéti? — Kak
sze zato imenuje oproztchenye gréhov? Za-
kaj opravichenye? — Jeli je gubavi chizt?
Ako ov pako vu lepih opravah oblechen je,
jeli je on, onda chizt? — Ako anda na-
shi gréhe chizto nebi sze izbrizali, billi sze
onda pravichni y szvéti ozvati mogli? — Kaj
hiva anda po opravichenyu? Jeli sze ovde
nashi gréhi zakrivaju?

PITANYE 3.

Kaj zadersava vu szebi jedenáisti kotrig Vére?

Razláganye.

*1.
Kaj sze po-
tela gore-
zajanyura-
zmeva.*

Jedenaizti kotrig Vére izgovarja sze ovak:
Tela goreztajanye. Po tela goreztajanyu ra-
zmeva sze, da Bog vu zadnyem dnèvu prebu-
di vsze mertve, y da lyudi z-télmi, koja szû
imali vu sivilènyu, goreztaneju sze.

Vi znate, moja Detcza! da mertvo télo
vu grob polase sze, tam zegnije, y prah po-
ztaje. Nijeden chlovek nezna, gde vszi pra-
sheki zegnitoga téla lesiju, josche menye mo-
re chlovek zegnito télo czelo y sivo nazad
vchiniti. Bóg szàm ovo zna, on vre iz po-
chétka napravil je télo chlovechanzko iz pra-
ha zemlye, y zjedinil ovo z-dushum, on an-
da takaj raztepeno télo zopet czelo y sivo
vchiniti more.

2.
Bóg szàm
more mer-
tve prebudi-
ti.

Ali jeli to vchinyeno bude? Jeli Bog
mertve jednoch prebudil bude? Tak je, mo-
ja Detcza! Jesush Kriztush ovo je rekel: *doj-
de vura, kada vszi oni, koji vu grobèh lesè,
glasza szina Bosjega chuli budù; koji do-
bra vchinili jeszu, budù na sùlènyè, koji
pako zlo vchinili jeszu, budù na zkvarjenye
ztali sze.* (Joann. 5.) Vu grobih jeszu mer-
tva téla, téla anda ztala sze budù. Ali télo
prez dùshe siveti, ztati sze nemore; téla an-
da zopet z-dushum zjedinila sze budù. Lyudi
anda z-szvojemi télmi, koja vu sùlènyu ima-
li jeszu, ztali sze budù. Od toga szegurne nasz
chini Job govorechi: *Znovich budem z-kosum
mojum oblechen, y vu mojem télu budem vi-
del Boga mojega.* (Job. 19.)

3.
Bóg mertve
vu nyika-
vom lústo-
vitom télu
prebudil bu-
de.

Akoprem pako lyudi z-onemi iztemi tél-
mi, koja vu sùlènyu imali jeszu, ztali sze
budù, tak vendar z-télmi ovemi chudnovito
bude premenenye. Od toga vnoga nam pri-
poveda sz. Pavel (1 Cor. 15.) On prízpo-
dablya mertvo télo jednomu szemenu, koje
sze poszeje. Szeme dohadya vu zemlyu, mert-
vo télo takaj dojde vu zemlyu. Szeme vu vno-
go lepshi zpodobi ízhadya, nego predi bilo

4.
Goreztaju-
ngypobosnek
bude tepo y
odícheno.

je; télo takaj vnogo lepshe ztalo sze bude; nego ovo predi bilo je, Predi bilo je vmertelno; potlam bude nevmertelno. Predi bilo je zametavano, potlam bude dichno. Predi bilo je szlabo, potlam bude puno jakozti. Predi bilo je grubo y sivinzko, (animale) potlam bude fino, y duhovno. Od vszeh oveh laztovitoztih szegurne nasz chini sz. Pavel po peldi goreztajuchega Jesusha.

5.

Goreztajanye hmannyeh bude odurno.

Vi vre gori chuli jezte, moja Detcza! réchi Jesusha, da szamo oni, koji dobro vchinili jeszu, na sívlenye, oni pako, koji zlo vchinili jeszu, na zkvarjenye ztali sze budú. K-zkvarjenyu né potrebno lepo télo, niti lepo goreztajanye; kak goder jeden zpametni Otecz szamo dobromu detetu lépu, zlocheztomu pako zlocheztu opravu daje, ovak y Bog szamo pobosnem dusham lépo, hmanyem pako gerdo y odurno télo dal bude.

6.

Zrok goreztajanya je, da dusha vu szvojem télu naplatčena ali kustiguvana bude.

Akoprem dusha prez téla siveti more, tak vendar ona télo szvoje lyubi. Ona sze nera rada razdrusuje od nyega po szmerti, ona sze rada zjedini z-nyim pri-goreztajanyu; kajti ona ne kak Angeli, prez téla, nego k-télu odredyena je. Ona chùti nad jednem lepem y zdravem télom veszelje, anda je jedno szrečno goreztajanye za nyu jedna platča. Ona chùti nad jednem gerdóm y boli punóm télom salozt, anda je jedno neszrečno goreztajanye za nyu jedna kastiga. Télo szlusiło je dushi vu ovem sívlenyu za orudelje dobra ali zla, pravo anda je, da ona vu szvojem télu ali platchu ali kastigu prime. Iz ovoga zroka bude takaj goreztajanye tél.

R a s g o v o r i.

1.

Kak sze izgovarja jedenàizti kotrig Vére? *Kaj sze razmeva po téla goreztajanyu?*
Kaj sze razmeva po téla goreztajanyu?

2.

Kaj sze pripetcha z-télom vu grobu? — *Gdo more Jeli ono ovde lépo y czelo oztaje? — Znali mertve prebuditi.*
Koj chlovek gde vszi prasheki zegnitoga téla lesiju? — Moreli koj chlovek zegnito telo nazad czelo y sivo vchiniti? — Nego gdo zna gde vszi prasheki zegnitoga téla lesiju? Gdo je télo chlovechanzko iz zemlye napravil? — Gdo more razdvojeno télo nazad szlòsiti? Zakaj Bog? — Gdo je dushu z-télom z-pervincze zjedinil? — Gdo more anda télo nazad sivo vchiniti? Zakaj Bog? —

3.

Budeli pako Bog lyudi zopet prebudil? *Budeli Bog Odkud znamo to? — Kaj veli Kriztush, ko mertve prebudili vu ja vura bude doshla? — Moreli sze pako télo prez dushe goreztati? More télo prez dushe siveti? — Z-kem anda téla nazad zjedenyena budû? — Buduli sze lyudi z-jednem drugem télom ztali, nego vu sivlenyu imali jeszu? —*
lyuztoritom telu?

4.

Jeli téla pri szvojem goriztajanyu nebudu drugu zpodobu na sze vzela? — K-che-mu prizpodablya szvétì Pavel mertvo télo? *Vu kakvi zpodobì budû téla podobneh ztala sze?*
Kam dohadya széme kada sze széje? kam dojde pako mertvo télo? — Kaj je lepshe, szeme ali czvet? — Vu kakvi zpodobì izhadya anda széme? Vu ztari? — Vu kakvi zpo-

dobí bude anda télo pobosnéh iz zemlye goreztalo sze? — Kakve laztovitosti bude télo pobosnéh imalo? — Je nashe télo vezda nevmetelno? Kakvo pako onda bude? — Je vezda nashe télo odicheno? — Kakvo pako po goreztajanyu bude? — Je nashe télo vezda jako? — kakvo pako po goreztajanyu bude? — Je nashe télo vezda fino, y dúhu zpodobno? kakvo onda bude? — Po kakvi peldi nasz szegurne chini od odichenoga goreztajanya szvétí Pavel? —

5.

*Vu kakvi
zpodobizta-
la sze budú
téla kma-
nyeh?*

Na taj sze budú goreztali oni, koji zla vchinili jeszu? — Jeli k-zkvarjenyu potrebno lépo télo? — Koji detczy daje jeden zpametni Otecz lépu opravu? Koji pako zlocheztu? Kakvo télo bude anda Bog pri goreztajanyu hmánjem dal? —

6.

*Zakaj bude
goreztajane
tél?*

Jeli sze dusha rada razluchava od téla? Jeli sze ona rada zopet z-nyim zjedinila bude? Kaj chùti dusha nad jednem lepem y zdravem télom? Kaj pako nad betesnem y gerdom? Jeli je pravo, da dusha takaj vu szvojem télu naplatchuje sze? — Jeli je nyoj szlusilo télo za'orudelje dobrih chinov? — Y ako dusha zla vchinila je, jeli né nyoj takaj télo k-tomu szlusilo? — Je anda pravo da dusha takaj vu szvojem télu kastiguje sze? Zakaj? — Bili sze pako mogla dusha vu szvojem télu naplatchati ako nikakvo goreztajanye nebi bilo? Ali bili sze mogla ova kastigovati vu szvojem télu? — Zakaj bude anda goreztajanye tél?

PITANYE 3.

Kaj zadersava vu szebi dvanaizti kotrig Vére?

Razláganye.

Dvanaizti kotrig vére izgovarja sze ovak: *Kaj sze po sitku vekivechnem razmeva.*
Sitek vekivechni. Z-ovemi rechmi verujemo y valujemo blasenzstvo vekivechno, koje selju blaseneh y odebraneh zversheno zpunilo y zashtilo bude. Vre vu pervem kotrigu vére, kada od ztvarjanya (Navuk 5. pit. 3.) govoril jeszem, vam raztolnachil jeszem, da mi selimo, da sze vszi zkupa za naveke zvelichimo, y od ovud vam pokazal jeszem, da dusha naša na vsze veke sivele bude. Ali kakoder na ovom szvétu vszi jednako sívlenye némajú, ovak y na drugem szvétu vszi jednako sívlenye imali nebudú. Nekoji budu za naveke szrechno, drugi pako za na veke ne-szrechno sivele.

Dusha vre na oszebnom szúdu taki po szmertí ali vu Purgatorium, ali vu pekel obszudyena bude, ali pak vzeme sze vu nebo. Vu Purgatorium obszudyuju sze dushe oneh, koji, akoprem vu miloztchi Bosji vumerli jeszu, vendar zhog vu sívlenyu vchinyenih gréhov praviczil Bosanzki zadozta vchinili nészu. Vu pekel dojde dusha onoga, koj vu szmertnem gréhu vumira. Vu Nebo dojde dusha onoga, koj vu miloztchi Bosji vumerl, y za vchinyene gréhe ali vu ovom, ali vu drugem sívlenyu zadovolyno vchinil je.

2.
Dusha vre na oszebnom szúdu obszudyena bude.

3.
*Purgatō-
rium naha-
dya sze.*

Purgatorium je mezto, gde dushe vrémenitu kastigu za gréhe terpiju, za koje vu sívlenyu zadovolyno vchinile nészu. Y mezto vremeniteh kastig nahadya sze; ar tuliki lyudi vumiraju vu malih y lehkó odpuztlivéh grehíh. Ovì nemreju taki vu nebo dojtí, kajti josche chizti nészu. Oni nemreju vu pekel dojtí, kajti szamo vu maléh gréhíh, ne pako vu szmertnih vumerli jeszu. Oni moraju anda vu jedno vrémenito mezto kastig, tojezt vu purgatorium dojtí. Zvun toga opominya nasz szvèto pismo: *da za mértve naj molimo, da od gréhov odveseju sze.* (2 Machab. 12.) Mertvi pako nemreju od szmertnih gréhov, ali od vekivechnih kastig oszloboditi sze, nego od vrémeniteh kastig; anda vuchi nasz izto szvèto pismo, da mezto vrémeniteh kastig iliti purgatorium nahadya sze.

4.
*Od pekla, y
od vekivech-
noga ne-
szrechnoga
sívlènya
proklèteh.*

Vekivechno neszrechno sívlenye je vu peklu. Pekel je mezto, gde dushe prokleteh na veke trapiju sze. Dùsha jednoga vu szmertnem grèhu vumirajuchega taki po szmerti dojde vu pekel. Tak veli szvèto pismo od onoga bogatusha: *Bogatush je vumerl, y vu pekel zakopan.* (Luc. 16.) Na szudnyi dan budù prokleti za na veke z-télom szvojém vu pekel obszudyeni, ar szudecz nyim rekel bude: *Odhadyajte prokleti od mene vu ogeny vekivechni.* (Matth. 25.) Moraju pako za na veke od Boga odztupiti, tak y za naveke vidyènya Boga mentuvani budù. Moraju prokleti vu ogeny vekivechni iti, tak budù oni takaj vekivechnu neizmernu bol na télu y na dushi terpeli. Zato sívlenye prokleteh vishe vekivechna szmert, nego vekivechno sívlenye vu szvètom pismu oziva sze.

Vekivechno blaseno sívlenye pako je vu nebu. Nebo je najszrecheshe prebivalische blaseneh, vu kojem Bog vérnem szlugam szvojem szebe od licza do licza izkasuje, y nyim szamoga szebe za platchu vekivechnu podaje. Pravichne y ochitztchene dushe dojdeju taki po szmerti vu nebo, zato zdihava Pavel govorechi: *ja selim raztaviti sze, szamo da z-Kriztushem budem.* (Philipp. 1.) Na szùdnyi dan budu pravichni takaj z-télom vu nebo prijeti, ar szùdecz Bosanzki nyim bude rekel: *hodte szim blaseni Otcza mojega, vsivajte kralyeztvo, koje vam je pripravlyeno. Onda pravichni vu vekivechno stulenye ztupili budú.* (Matth. 25.)

5.
Pravichni
z-télom y
z-dùskum
dojdu vu
Nebo.

Vu nebu je pravo blasenztvo. Pravo blasenztvo je vekivechno vsivanye vszega dobra. Vu nebu vsivaju sze pravichni vszega dobra, ar Bog je najvekshe dobro. Pravichni pako vu nebu budu Boga videli y vsivali sze, ne morebiti szamo vu nyegvih ztvorenyih, ali vu kipu, nego *od licza do licza kak je.* (1 Cor. 12.) Kak malo komu voda pomenkati more, ako on pri zviranyku je, ravno ovak malo more pravichnomu vu Nebu kakvo dobro na tèlu y na dùshi pomenkati; kajti on pri Bogu je, koj zviralishe vszega dobra je. Poleg toga, kak lepo mora Nebo biti, gde Bog szebe od licza do licza pokasuje. Kak vugodno mora pajdastvo vu nebu biti, koje iz szamèh angelov y szrechnih lyudih szloseno je! Vidite anda, moja detcza! da Szvetczi vu nebu za na veke vszega dobra, anda jednoga pravoga blasenztva vsivali sze budu, zato takaj sívlenye szvetczev vu Nebu vekivechno sívlenye imenuje sze.

6.
Vu nebu je
pravo bla-
senztvo.

R a z g o v o r i.

1.

*Kuliko ver-
ztno je ve-
kivechno si-
vlenye?*

Kak sze izgovarja dvanàizti kotrig vére?
Kaj vérujemo y valujemo z-rechmi dvanàiztoga
kotriga vére? — Jeli josche vnogi lyudi na
szvétu siveju? — Jeli ali vszi szrechno sive-
ju? — Kak dugo bude dusha vszakoga chlo-
veka sivela? — Jeli bude ali takaj vszaka
dusha na veke szrechno sivela? — Kuliko
verztno je anda vekivechno sívlenye? —

2.

*K-chemu
sze bude du-
sha na o-
szebнем
szudu ob-
szudila?*

K-chemu sze bude dusha na oszebнем
szûdu obszudila? — Koje dushe obszudyuju
sze vu Purgatorium? — Gdo dojde vu pe-
kel? — Gdo dojde vu nebo? —

3.

*Jeli sze na-
hadya Pur-
gatorium?*

Kaj je Purgatorium? — Jeli nevumiraju
vnogi lyudi vu malih gréhih? — Jeli ovi vu
nebo dojdú? Zakaj ne? Moreli kaj nechizto-
ga vu nebo dojtí? — Ali jeli dojdú ovi vu
Pekel? Zakaj ne? — Jeli nasz mentuju mali
gréhi miloztche poszvetchujuche? — Kam
moraju anda oni dojtí, koji vu malih gréhih
vumiraju? — Jeli sze anda nahadya Purga-
torium?

4.

*Kada dojde
dusha vu
pekel?*

Gde je vekivechno sívlenye? — Kaj je
pekel? — Kaj veli szvêto pizmó od boga-
tusha? — Kam je pokopan po szmertí? —
Kada dojde anda dusha vu pekél? — Zakaj
taki po szmertí? — Kada dojde pako takaj y
télo greshnika vu pekél? — Kada bude za-
dnyi szûd? — Kaj bude onda szudecz Bosan-

zki gréshniku rekel? Budeli on rekel: *hodte k-meni?* — Od koga budú anda prokleti odztupiti morali? — Chesza budú anda za na veke mentuvapi? — Y kam budú prokleti iti morali? — Kaj budú oni za na veke ter-peli? — Zakaj ozivamo sivlenye prokleteh vekivechnu szmert?

5.

Gde je pako vekivechno sívlenye? — *Kada dojdú pravichni z-dushum*
Kaj je Nebo? — Zakaj je selel Pavel raz-
ztaviti sze? Z-kem da bude? — Kam dojdú *kada z-télom vu nebo?*
anda ochiztchene dushe taki po szmertí? —
Kada budú pako pravichni takaj z-télom vu
Nebo prijeti? — Kaj bude Kriztush onda
pravichnem rekel? — *Odhadyajte od mene?*
Kam budú pravichni onda prijeti? —

6.

Gde je pravo blasenzstvo? — Jeszi ti *Gde je pravo blasenzstvo?*
iztinzki szrechen kada tebi kaj dobroga po-
menka? Kada anda? — Y kak dugo bude
vsivanye dobra terpelo? — Gdo je najvek-
she dobro? — Koga budu szvetczi vu nebu
videli, y vsivali sze? — Jeli budu szvetczi
onda Boga szamo vu kipu videli? — Nego
kak? — Kakvoga dobra budú sze szvetczi vu
nebu vsivali? Moreli komu voda pomenkati,
koj pri zviralischu nahadya sze? — Gdo je
zviralische vszega dobra? — Pri kém szú
szvetczi vu nebu? — Moreli szvetczem vu
nebu kaj na télu ali na dushi pomenkati? —
Kak mora nebo zgledeti? — Iz chesza je
szloseno pajdastvo vu nebu? — Je ovo paj-
dastvo vugodno? — Kuliko dobra budú sze
anda szvetczi vu Nebu vsivali? Y kak dugo

budû sze ovoga vsivali? — Gde je anda pravo blasenzstvo? — Zakaj vu Nebu?

I. Dokànychanye Nàvuka.

Makabeanzka mati nagovarja szvoje szedem szine po pogledu nèba na sztalno podnashanye mùk.

Antiokus, on nepobosni Kraly, hotel je jednoch sidove, koji onda pravoverniki jedini bili jeszu, k-bolvanztvu prisziliti. On zapovedal je Czirkvu Jeruzalemzku ozkruniti, y ovu Czirkvu Jupitra ozvati. Czirkvu pako vu Goriczim odluchil je k-tomu, da sze poganimi nutri goztiti, y vszakojachka neszramna delati budû mogli. Sidovzke szobote y drugi szvetki nészu sze szvetili, y nigdo né szmel vishe valuvati da Sidov bi bil. Dapache oni priszileni bili szû, da na narodyeni dan kralya szvetka Bakusha obvershavati y ovomu alduvati jeszu morali, ako z-najodurneshum szmertjum vumreti nészu hoteli. Metemtoga vre onda imal je Bog szvoje, koji nyemu y poleg naj chutlyivesheh mukah vénni oztali jeszu. Pripetilo sze je med oztalemi, da szedem szini zkupa z-materjum popadyeni pred kralya dopelyani, y proti zapovedi szvinzko meszo jezti primorani bili jeszu. Metemtoga vendar oni rajshî hoteli szû vumreti, nego ovoga gréha vchiniti. Zato razszerdil sze je Kraly, y zapovedal, da najztareshemu zmed szedem szinov jezik sze naj odrese, kosa od glave pochemshi szleche, perzti na rukah y nogah odszecheju. Za tem dal je nyega vu razbelenu pech hititi, y sivoga zpèchi. Doklam on ovak nutri trapil sze je, tak nagovarjali szû sze Mati y oztali brati med szobum na zpo-

dobnu ztalnozt, *Bog*, rekli szû oni: *Gorpon na iztinitozt gledel bude, y nasz batrivel.* (Machab. 7.)

Komaj bil je pervi zkonchan, tak pograbili szû drugoga. Y ovomu szlekli szû kôsu od glave pochemshi, y pitali nyega, jeli od prepovedanoga mesza jezti hoche, ali pako na zpobobu brata muchiti sze. On pako rekel je: ja to vchiniti nechû, ako ti o kraly! *nam taki sivlenye vzemesh, tak nasz kraly szvéta, za chijega zapoved mi vumremo, pri goreztajanyu na vekivechno sivlenye prebudil bude.* Y nut takaj ov, kak perveshi bil je obszechen, zpechen y zkonchan. Ovak vchinyeno je z-trejtem, chetertem, petem y sheztem, koji vszi z-kupa z-jednakum ztalnoztjum jednake muke podnashali jeszu. Vezda zaoztal je josche najmenshi zmed nyih. Kraly stimal je, da vendar ovoga po obechanyu vremeniteh dobrih, na prekorachenye Zakona genul bude; ali mali né gâ poszluhnul, y mati nehotecha szina szvogâ na nevernozt nagovoriti, rekla je: *Moje dete, proszim té, poglej na nebo.* Nebojsze haharov, nego vchini, kak y tvoji Brati, vumri kak oni, y onda dojdesh k-tvojem bratom, y budesh sze jednoch z-nyimi na vekivechno sivlenye goreztal. Doklam mati josche govorila je, tak rekel je mladencz kralyu: kaj chakash, ja hochu mojemu Bogu pokoren biti, y ne tebi, ja rad vumrem; neodvlachi szamo z-mukum. Na to bil je on na jeden josche kervolochneshi nachin, nego nyegvi Brati, zkonchan zkupa z-materjum szvojum.

Tuliko, Dragi! vchinilo je ufanye jednoga buduchega sivlenya pri makabeanzki materi y nenyih szedem szinih. Jeli nebi moralo ovo ufanye ravno tuliko, dapache josche vishe, ako to Bog bi potrebuval, pri nami vchiniti? Jeli pri vszakoverztnih nevolyah ovoga szvéta nebi morali y mi na nebo pogledati, y nasz z-blasenem ufanyem ovoga batrivoti? Tak je, obter-

sheni Roditelyi! kojem szmert detczuiz naruchaja ztergnula je; poglejte na nebo, tam nyu jednoch videli budete, prez da ovu y kada vishe iz vashe nazochnoztu zgubite. Neszrechni Gozpodari! kojem jedna neprevidyena neszrecha vez szmetek vzela je, poglejte na nebo, tam ztoverztu zadobili, y dobra vekivechnoga sitka prijemali budete. Sziromaski beteslyivi kerztcheniki! koje najchutlyiveshe boli vupozteli vre dugo vrémena privezane dersiju, poglejte na nebo, tam jednoch z-Krztushem na veke razveszelili sze budete, poklamkam ovde z-nyim vremenito terpeli jezte. Zadnich vi vszi, koji krise, pregone, zametavanye y potrebcchinu terpite, poglejte na nebo, tam z-vekivechnum zmoznostjum vasha kratka traplenya naplatchuvana budú. Amen.

II. Dokànchanye Návuka.

Jesush razglashenoj gréshnicst opraztcha gréhe.

Poklamkam Jesush jednoch pri jednom prestimaneshem Farizeushu na goztchenyu bi bil, tak ztupila je jedna sena vu lisu, koja do vezda razvuzdano sive-la, ali vezda ovo sivlenye iz szerdca posaluvala je. Ona taki hiti sze pred nóge Jesusheve, kushuje ove, mochi ove z-szuzami szvojemi, y zbriszava nye z-laszmi glave szvoje. Dapache, kaj vishe je, ona ima poszúdu drage mazti, z-kakvum premoguchi y prestimani Gozti poleg navade mazali sze jeszu, y ovu puztila je ona na noge Jesusha kapati. Vsza ova glédel je Farizeush z-szerditoztjum, y on chudil sze je, da Jesush od jedne takve pershone szamo doteknuti sze dá. O! miszlil szl je on: da bi on znal, kakva ova zlochezta se-

na je, on zajzto ovo nyoj nebi dopuztil. Metemtoga pochel je Jesush szledechega razgovora z-nyim, y rekel nyemu: Shimon, (ovak zval sze je Farizeush,) imam ti nekaj povedati. Mester, odgovoril je Farizeush, ja szém selyen znati y chùti, povech!

Nekoj poszudbenik, veli Jesush, imal je dva dusnike, jeden bil mù je desetputi vishe dusen, kak drugi. Obodva pako nyega zplatiti nèszu mogli. Poszudbenik bi bil moget nye prodati dati y ovak szebe napatiti; on metemtoga obodvem prikazal je dúga. Koj zmed obodveh, miszlish ti, bude nyemu zahvalneshi, y nyega bolye lyubil? On zajzto, odgovori Farizeush: komu desetputi vishe prikazal je. Pravo szì szùdil, odgovoril je Jesush, y oberne sze nazad k-seni. Vidish ovu senu Shimon? vidish ti nenyó genyeno, y salozti puno szerdcze? Ja szem kakti gozt k-tebi vu hisu doshel, ali vode nogam mojem nészi dal, ova pako z-szuzami polevala je noge moje, y z-laszmi szvojemi brisala; ti priatelzkoga kushcza meni nészi dal, ova pako, od kada je doshla, né preztala kushuvati noge moje. Ti glavu moju z-oljem nészi namazal, ona pako izte noge moje mazala je z-dragum maztjum. Nyoj anda pripetcha sze kak y dusniku, koj vishe lyubi, kajti nyemu vishe prikazano je; zato y tebi velim: da sze nyoj vnogi gréhi odpuztchaju, kajti vnogo lyubila je. Odpuztchaju sze tebi gréhi tvoji, rekel je Jesush pokorni greshniczi. Ove rechi videle szù sze Farizeushu y oztalem goztom zpachlyive y kastige vrédne; Jesush pakorekel je josche jedenput seni: *Véra tvoja je tebe zvelichila, hodi vu miru.* (Luc 7.)

Vezda, Dragi! jedno kratko pitanye. Jeli ne Jesush vu ovoj lepi priliki ochitno pokazal, da on oblazt ima gréhe odpuztchati; y jeli né on ovu iztu oblazt szvojem Apostolom dal, kada pri szvojem vu nebo zaztuplenyu nyim rekel je: *Vzemite Dúha szvètoga, kojem*

gréhe odpustíte, nyim odpustcheni jeszu. (Joann. 20.)
 Y jeli ne nahadya sze ova oblazt jasche zmirom pri
 Biskupih y Meshnikih, koji nameztniki Apostolov je-
 szu? — O! vputite sze anda, kak dober y miloszer-
 den Gozpon, Bog nash je, koj neche, da sze gdo zkva-
 ri, nego da sze vsi oberneju, y siveju: livalitenyemu,
 da on vashoj szlabochi, koja vasz vu tak vnogi gréh po-
 rine, na jeden tak lyubljeni nachin na pomoch dojtí
 je hotel; y potrebujte ovo nepreczenyeno dobrochin-
 ztvo, kulikoputi tak neszrečni jezte, da vu gréh opad-
 nete prez odvlachenya, da morebiti vu gréhu nevum-
 rete, nego da po miloztchi Bosji vu Jesushu Kriztushu
 zopet opravicheni vekivechno sívlenye zadobite. Amen.

III. Dokànchanye Nàvuka.

*Vera vu jedno budúche goreztajanye je
 moguchi nachin szuprot stráhu
 smérli.*

Nikaj né ztrahoviteshega, nego da mi jednoch z-
 ovemi iztemi télni, koja vu sívlenyu imali jeszmo,
 zopet goreztali budemo. Ova iztina z-najrazlosneshemi
 y z-najodperteshemi rechmi vu szvétom píszmu zader-
 sava sze. Chujmo szamo kaj Jesush Kriztush vu szvétom
 Evangeliumu veli: *ztanovito ztanovito velim vam, doj-
 de vura, y vre je vezda, vu kojoj vszi, koji vu gro-
 beh jeszu, chuli budu glasza Szina Bosjega; y pojde-
 ju, koji dobro vchinili jeszu, na goreztajanye sívle-
 nya, koji pako zlo vchinili jeszu, na goreztajanye szú-
 da. (Joann. 5.)* Kaj je odperteshega, kaj je vputlyi-
 veshega, kak ov ízgovor izte vekivechne iztine, koja
 dapache ovoga z-priszegum podtverdyava: *Ztanovito,
 ztanovito velim vam.* Doshlo bude anda jedno vréme
 koje nigdo nezna, jedno vréme, gde szin Bosji,

szvoje Angele razposhilyal bude, da z-glaszom velikem tija vu nuterno zemlye kriche: *Ztanete sze mertvi, y dojdite na szûd.* Doshlo bude jedno vrême, gde nash pepel nazad osivel, nashe kozti zopet zjedinile sze, nasha téla ztala sze, y mi nasz pred szudcza Bosanzkoga poztaviti budemo morali, da iz nyegvih vuzt nepremenlyivi izrehek nashe vekivechne odluke chujemo.

Gde szû vezda oni ztrashlyivczy, koji sze pred szmertjum nerazumno bojiju? Naj bude, da szmert nasz z-szilum iz ovoga sivlenya ztergava, da ona nashe télo zkoncha, da ona nasz na prah y pepel oberne! Batrivozt je dozta za nasz, da zadnich y pak jeden dan doshel bude, vu kojem mi szmertí na szram nashu glavu zopet iz praha podignuli, y jedno novo sivlenye vu kotrigih nashih chutili budemo. Ja znam, tak govoril je vre negda Job na batrivozt dushe szvoje: *Ja znam, da moj Odkupitely sive, y vu zádnyem dnévu od mertveh goreztanem sze, y znovich budem z-kosum mojum oblechen, y vu mojema telu budem videl Boga mojega.* (Job. 19.) O batrivna miszel! dabi ti szamo vszigdar y nasha bila. Dabi ti oszebito szerdcza oneh napunila, koji vre pri szamem zmishlavanyu szmertí derhtaju, y ztrashiju sze! Dabi ti nyihovu nevalyanu, dapache vnogiput kastige vrednu plashlyivozt pretirala, y vu nye vnogo bolye jednu szvetu selyu, nazkorom raztavití sze, zaszadila! Ar znati, da nash Odkupitely od mertveh ztal sze je, znati, da ravno ov Kriztush takaj na szudnyi dan raz od mertveh zopet prebudil bude, znati, da mi onda z-ovem iztem télom obdani, Boga vu szvetlozti nyegve zmosnozti y nyegvoga velichantzva od licza do licza videli, lyubili, y prez koncza vsivali sze budemo! kulika batrivozt, kuliko radoztno vmiřeny je ovo za szerdcze nashe! Amen.

(Konecz ztrani I.)

[illegible]

Österreichische Nationalbibliothek



+Z183065805

